

বিলম্বজল ব

(পৌরাণিক নাটক)

[বাদবচন্দ্র বন্দ্যোপাধ্যায়ের দলে অভিনীত]

ঔধনকৃষ্ণ সেন

প্রকাশক—শ্রীহরিদাস চট্টোপাধ্যায়
শ্রীহরিদাস চট্টোপাধ্যায় এণ্ড সন্স,
২০৩/১/১, কর্ণওয়ালিস্ স্ট্রীট, কলিকাতা

প্রিণ্টার—শ্রীনরেন্দ্রনাথ কোঁড়া
ভানুস্বৰ্ণ প্রিণ্টিং ওয়ার্কস্
২০৩/১/১, কর্ণওয়ালিস্ স্ট্রীট, কলিকাতা

আষাঢ়—১৩৩১

নাট্যোন্নিখিত ব্যক্তিগণ

পুরুষ

কৃষ্ণ, নারদ, বিশ্বমঙ্গল ।

সুদেব	বিশ্বমঙ্গলের ভৃত্য ।
সুকর্মা	কল্যাণপুর নিবাসী জনৈক বণিক ।

রাধিকা, বৃন্দা, বিশাখা, ললিতা ও শ্ৰামা ।

শান্তি	বিশ্বমঙ্গলের স্ত্রী ।
শোভা	ঐ পালিতা ভগ্নী ।
নন্দা	সুকর্মার স্ত্রী ।
চিত্তা	বিশ্বমঙ্গলের স্নেহিতা বোহা ।
চিত্তা	জনৈক বোহা ।

বিলম্বজল ব

প্রথম দৃশ্য

[বিশাখাপুরী]

শান্তি ও শোভার প্রবেশ

শান্তি । পার্বে ত ?

শোভা । তুমি কি মনে কর ?

শান্তি । পার্বে ব'লেই ত বিশ্বাস করি ।

শোভা । তবে আর এত গিঞ্জাসা ক'রুচ কেন ?

শান্তি । কাজটা যে বড় শক্ত ।

শোভা । শক্ত হ'লেও কাজ সহজ হ'লেও কাজ ; যখন কাজ, তখন
ক'রতেই হবে ।

শান্তি । দেখি ।

শোভা । দেখাই আছে ! তা নৈলে আর শোভা এলে শান্তির সঙ্গে
মিলিত হয় ।

শান্তি । সত্য ক'ব ।

শোভা । সত্য সেই সত্যের শ্রীহরি । যখন তোমার চরণে কীৰ্ত্তন
অর্পণ ক'রেছি, যখন তুমিই আমার শাস্তার সত্য-মুক্তি-করুণী
হ'য়েছ।

যখন তোমার কাজে প্রাণ দিতেও কাতর নই, তখন এ সত্য ত প্রথম হ'তেই করা আছে।

শান্তি। শোভা! তুই বৈ যে অভাগিনী শান্তির সংসারে কেউ নাই!

শোভা। তাহ'লে আর ভাবনা কি? তাহ'লে ত শোভাকে নিরুই শান্তি নিশ্চিত হ'য়ে থাকতে পারে! তাহ'লে আর এত চিন্তা কেন? তাহ'লে আর এত মর্মান্তিক বেদনা কেন? তাহ'লে আর এত উতোষিক যাতনা কেন?

শান্তি। তা কি তুই জানিস না শোভা? শান্তির এই অশান্তিময় জীবন-শ্মশানে তুই যে একমাত্র জুড়াবার স্থান! শান্তির এই অহর্নিশি প্রজ্জ্বলিত তীব্র চিতানলে তোর সাঙ্ঘনা-বচনই যে একমাত্র শীতল বারি! সধি রে! সংসার আমার পক্ষে মরুভূমি, তুই সে মরু-মাঝে তরুছায়া। প্রাণ যখন একান্ত সস্তাপিত হ'য়ে উঠে, তখন তোর আশ্রয়ই অবলম্বন ক'রে, সেই সস্তাপ শীতল করি। তা নৈলে শোভা! তা নৈলে কি শান্তি এই অশান্তির ভার এতদিন বহন ক'রতে সমর্থ হ'ত?

শোভা। অশান্তির ভার বহন কর, সেই শান্তিদাতা শ্রীহরিকে সাক্ষী রাখ, শান্তির পরিণামে শান্তির পুরস্কারই লাভ হবে।

শান্তি। হৃৎধাতুে সুখ, বিশ্বপতির এই বিশাল বিশ্বরাজ্যে এই নিয়মই চ'লে আস'চে বটে; কিন্তু সধি রে! এই অভাগিনী শান্তির হৃৎধের জীবন যে নিতান্তই সে নিয়মের বহির্ভূত! সুখের নন্দনে যখন নিরানন্দের প্রবল দাবানল প্রজ্জ্বলিত হ'য়েচে, তখন তার পরিণাম যে মহাশ্মশান, তাতে আর কিছুমাত্র সন্দেহ নাই।

শোভা। পরিণামের কথা সর্ব-পরিণামদর্শী সেই শান্তিদাতাই জানেন; তুমি আমি তার বিচারকর্তা নই। এখন কি ক'রতে হবে, তাই বল।

শান্তি। সংসার-ত্যাগ।

শোভা । সঙ্গী কে হবে ?

শান্তি । যার পক্ষে সংসার সংসার নয়, সেই সঙ্গী হবে ।

শোভা । সংসার-ত্যাগ ত সামান্য কথা, তোমার সঙ্গে জীবন-ত্যাগেও
কাতর নই । তার পর ?

শান্তি । তার পর বেষ্ঠাগৃহে বাস, অথবা বেষ্ঠার দাস ; তুই দাস আমি
দাসী ।

শোভা । তার পর ?

শান্তি । তার পর সেই পরাৎপর পরমেশ্বরই জানেন, তাঁর যা ইচ্ছা,
তাই হবে ।

শোভা । প্রথমে পরিত্যাগ, সংসার-বাস ; দ্বিতীয়ে পরিগ্রহণ,—বেষ্ঠার
আবাস ; অভিলাষ বা উদ্দেশ্য কি ?

শান্তি । উদ্দেশ্য ?—এ জীবনের উদ্দেশ্য-সাধন ; নারী-জন্মের সার্থকতা-
সম্পাদন ; প্রাণপতির শ্রীচরণ-দর্শন ; যেখানে জীবনের অধিষ্ঠাতা
দেবতা বিরাজমান, সেইখানেই স্থানের সংস্থান ক'রব ; যে চিন্তার
প্রণয়-বিলাসে স্বামী আমার বিমোহিত, যে চিন্তার চিন্তা-সরসে স্বামী
আমার নিমজ্জিত, শান্তি আজ সেই চিন্তার আশ্রয়ের ভিখারিণী !
চিন্তা বেষ্ঠা হ'লেও আমার পক্ষে পরম দেবী । তার উপাসনাতেই যে
আমার জীবন-দেবতা মন-প্রাণ সমর্পণ ক'রেচে । চিন্তার গৃহ বেষ্ঠালয়
হ'লেও আমার পক্ষে বৈকুণ্ঠধাম । সেইখানেই যে আমার জীবন-
দেবতা অর্হর্নিশি বিরাজমান আছেন । সখি রে ! এ রাজ-কুটালিকায়
কেবল নিরাশা । সুখের বাসা সেইখানে, সেইখানেই স্বামীর চরণ-
দর্শন হবে ।

শোভা । স্ত্রী-জীবনে স্বামী-সোহাগই যে একমাত্র সুখ, স্বামী-সোহাগিনী
না হ'লেও তা বিশেষ জানি । স্বামী-বিরহিণী রাজরাণী আর স্বামী-

সোহাগিনী ভিখারিণী, এ ছ'য়ে তুলনা ক'রলে, রাজরাণী বড় হুঃখিনী, আর ভিখারিণীই রাজরাণী ; কারণ, সে যে স্বামী-সোহাগরূপ অতুল ঐশ্বর্যের অধিকারিণী ; উদরে অন্ন না থাকলেও মনে তার সুখের অভাব কখন নাই । তবে এ ক্ষেত্রে একটা কথা বলবার আছে ।

শান্তি । কি ব'লবি শোভা ?

শোভা । জিজ্ঞাসা করি, এই লোকজনপূর্ণ সংসার-ভবন, আর মানবশৃঙ্খল নিবিড়-কানন, এ ছ'য়ের মধ্যে শান্তি-নিকেতন কোন্টা ?

শান্তি । কেন শোভা ?

শোভা । বল না কেন ?

শান্তি । সংসারে শান্তি থাকলে, যোগিজন সংসার ত্যাগ ক'রে, বনের মাঝে আশ্রয় লবেন কেন ?

শোভা । আর একটা কথা, মানবরূপী পতির অনিত্য-প্রেম, আর সেই বিশ্বপতির নিত্য অনন্ত-প্রেম, এ ছ'য়ের মধ্যে শান্তিময় কোন্টা ?

শান্তি । মনুষ্যের প্রেমে চির-শান্তিলাভ হ'লে, পতি পত্নীর প্রেমে জলাঞ্জলি দিয়ে, পত্নী পতি-ভক্তি বিষ্মত হ'য়ে, পিতা পুত্র-বাৎসল্য ভুলে গিয়ে, সেই প্রেমময় বিশ্বপতির প্রেম-অন্বেষণে জীবন-মন সমর্পণ ক'র্বে কেন ?

শোভা । তাই যদি সত্য হয়, তাহ'লে তেমন শান্তিময় বিজন-কানন থাকতে, শান্তি আজ অশান্তির নরক-সমান সেই বেষ্টা-ভবনে আশ্রয় নিতে অভিলাষিণী কেন ? তাই যদি সত্য হয়, তাহ'লে সেই বিশ্বপতির তেমন অপার প্রেম উপেক্ষা ক'রে, শান্তি আজ মনুষ্য-পতির এমন অনিত্য-প্রেমে অহুরাগিণী কেন ? চল না, বনবাসে যাই ; চল না, সেই প্রেমময়ের নিত্য-প্রেমে প্রাণ দিই ;—মনুষ্যের উপাসনার প্রয়োজন কি ? সে প্রেমে স্বার্থ নাই, চরিতার্থতা নাই, বিচ্ছেদ নাই,—সদা শান্তি, সদা মিলন !

গীত

তাই যদি গো জেনেছ মনে তবে মিছে কেনে ।
অমার প্রেমে সঁপিয়ে প্রাণ, দাহন হবি নিশিদিনে ।
তাজি এ ছার গৃহবাসে, চল না যাই বনবাসে,
একান্তে সেই পীতবাসে, সঁপিব প্রাণ তার চরণে ।
বিচ্ছেদ নাই তার প্রেমে কখন,
সদা শান্তি সদা মিলন,
বিরহে প্রাণ হয় না দাহন,
সদা থাকে সুখ-সন্মিলনে ।

শান্তি । জানি সখি ! আমার মত পতি-বিরহিনীর সেই বিশ্বপতিই একমাত্র
আশ্রয় । জানি ভাই ! আমার ছায় অনাথার সেই অনাথনাথই
একমাত্র উপায় । কিন্তু শোভা ! এখন যে আমার সে উপায় অবলম্বন
করবারও উপায় নাই !

শোভা । পাগলের কথা !

শান্তি । কেন শোভা ?

শোভা । যিনি অল্পপায়ের উপায়, তাঁর আশ্রয় নিতে তোমার উপায় নাই ?
এর চেয়ে আর পাগলের কথা কি হ'তে পারে ?

শান্তি । সখি রে, কথাটা বড় পাগলের কথা নয় ! যার নামে জীবের
সকল উপায় হ'রে থাকে, তাঁর শরণ গ্রহণ ক'রতে আজ আমার
উপায় নাই । কথাটা বড় জ্ঞানের কথা শোভা ! কথাটা বড় জ্ঞানের
কথা !

শোভা । তোমার মাথা ।

শান্তি । তাই না হয় হ'ল ? কিন্তু একটা কথা বল দেখি ?

শোভা। বল।

শান্তি। যতদিন মানুষের সংসারের প্রতি বিরাগ বা পত্নীপুত্রের প্রতি
অস্নেহ না জন্মায়, ততদিন কি মানুষে সংসার-ত্যাগে সমর্থ হয় ?
যখন মানুষে বুকুতে পারে এ সংসার কিছুই নয়, পত্নীপুত্র কেউ নয়,
মানুষের দ্বারা মানুষের আকাজক্ষা চরিতার্থ হয় না, তখন ত সে সংসার
পরিহ্যাস ক'রে, নিদান-বন্ধু পরাৎপর পরমেশ্বরের প্রেমে মনঃপ্রান
সমর্পণ করে। মানুষের প্রেমে প্রেম-পিপাসার পরিতৃপ্তি না হ'লেই ও
লোকে হরি-প্রেমের ভিখারী হয় ?

শোভা। তাতে কি আর সন্দেহ আছে !

শান্তি। তবে সধি ! আমার আর দোষ কি ? আমার পতি-প্রেম-
পিপাসার পরিতৃপ্তি দূরে থাক, পতি-প্রেম যে কেমন, তার ত আমি
এখনও কিছুই জানি না ! পতি-প্রেমের আশ্বাদ না বুঝলে, কেমন
ক'রে প্রেমময় বিশ্বপতির অপার-প্রেমের আশ্বাদ গ্রহণ ক'রুব ?
পতি-পত্নীর প্রেমের ভাব উভয়ে উভয়ের কাছে শিক্ষা পায়। সে
শিক্ষা না হ'লে কি কেউ বিশ্বপতির প্রেমের শ্রেনিক হ'তে পারে ?
সধিরে ! আমার যে এখনও পতি-প্রেমের পরিতৃপ্তি-সাধন হয় নাই।

শোভা। সেই প্রেমেরই পরিতৃপ্তি-সাধন কর ;—এখন কি ক'রতে হবে,
তাই বল।

শান্তি। যারা জন্মের মত সংসার ত্যাগ ক'রবে, তাদের আর করবার বেশী
কাজ কি আছে ভাই ? অকূলে ভাসতে হবে ;—অকূল-কাণ্ডারী
শ্রীহরির শান্তিময় নাম স্মরণ ক'রে, অকূলে ভাসি গে চল। শোভা
রে ! পরিণামে শান্তির যে হরিনামেই শান্তিলাভ হবে !

শোভা। সেই শান্তিময় যেন শান্তির কামনা পূর্ণ করেন। তবে আর
বিলম্বের প্রয়োজন কি ? হরি ব'লে, শ্রীহরি করাই ত, ভাল হ'চ্ছে।

শান্তি। একটু আয়োজন ক'রতে হবে।

শোভা। আয়োজন আর কি কারতে হবে? এ ত আর তীর্থ-যাত্রা ক'রতে যাই নাই যে, পথের সম্মল বেঁধে নিয়ে যাব?

শান্তি। কি ব'ল্গি,—কি ব'ল্গি শোভা? এমন অজ্ঞানের কথা ব'ল্গি কেন? সতীর যে পতিই পরম-দেবতা। যে রমণী সতী পতির চরণ-দর্শন ক'রে, তার কি আর তীর্থ-দর্শনের প্রয়োজন হয়? স্বামীর চরণ মহাতীর্থ; আমি আজ সেই তীর্থ-দর্শনে যাব সখি! আয়োজনের বিশেষ প্রয়োজন।

শোভা। কি আয়োজন ক'রতে হবে?

শান্তি। বেশ-পরিবর্তন।

শোভা। কোন্ বেশ প্রয়োজন?

শান্তি। অস্তিমের বেশ,—সংসার-ত্যাগের বেশ। আমি যোগিনী, তুই নবীন যোগী; কেমন শোভা! এই একাদশে যোগীবেশে তোকে ত কেউ চিন্তে পারবে না!

শোভা। চিন্তে পারুক আর না পারুক, চিন্তে পেলেই বাঁচি এখন। কিন্তু এই চুলকটাই যে গোল বাধাবে?

শান্তি। জটা বেঁধে দিব; জটাতে শোভার শোভা আরও বেড়ে উঠবে।

শোভা। ব্যবস্থা ত সবই হ'ল কিন্তু দেবতা-দর্শন ঘ'টবে কি ক'রে?

শান্তি। কেন শোভা?

শোভা। তীর্থক্ষেত্রে স্থান পাওয়াই ত সন্দেহের কথা।

শান্তি। সহজে সন্দেহের কথাই বটে; কিন্তু চলনার অতি সহজেই হবে।

শোভা। চলনার কি পাপ নাই?

শান্তি। চলনা বা প্রবঞ্চনার যদি পাপ না থাকত, তাহ'লে ইহসংসারে

সত্যের পরিবর্তে মিথ্যারই আদর হ'ত। কিন্তু শোভা! যে ছলনার কখন কারও অপকার নাই, বরং উপকার আছে, সে ছলনার যে পাপ নাই, এ কথা সাহস ক'রে ব'লতে পারি। কেন সখি! যে মিথ্যা ব্যবহারে প্রত্যক্ষ নিজের ইষ্ট সাধন, পরোক্ষ পরের অনিষ্ট-নিবারণ, সে মিথ্যার দোষ কি?

বিষমঙ্গলের প্রবেশ

বিষমঙ্গল। শোভা!

শোভা। কে গো?

বিষমঙ্গল। (অগ্রবর্তী হইয়া) চিন্তে পার নাই?

শোভা। কে আপনি? শোভার ত আর চিন্তে পার নাই যে, চিন্তে পারবে না।

বিষমঙ্গল। আমি এখানে কি ক'রতে এসেছি, তা ব'লতে পার?

শোভা। কাকে জিজ্ঞাসা ক'রছেন?

বিষমঙ্গল। তোমাকে।

শোভা। আমাকে? কথাটা মন্দ নয়; কিন্তু আপনার বাড়ী, আপনার ঘর, আপনার সর্কস্ব। আপনি আপনার সেই বাড়ীতে কি ক'রতে এসেছেন, এ কথার উত্তর এই অসুগতা, আশ্রিতা, আপনার অশ্রিতা-প্রতিপালিতা দাসী আপনাকে ~~দান~~ দান ক'রবে? রাজ্য আছে, রাজ্যেশ্বর নাই; আমরা সহায়শূত্র, উপায়শূত্র, এই অরাজক পুরীতে আশ্রয়শূত্র। কুমার! এ মহা-শূত্র পূর্ণ ক'রতে, আপনি ভিন্ন আর কেউ নাই! এ দুটি অবলার জীবন-লতিকায়, আপনিই যে একমাত্র অবলম্বন-তরু, আজ আমরা মরুভূমির উত্তপ্ত সিকতা-মাঝে নিপতিতা! রক্ষা কর কুমার! আমাদিগকে রক্ষা কর।

বিল্বমঙ্গল। কেন শোভা ! এমন কথা ব'ল্চ যে ? আমি ত তোমাদের অরক্ষার কাজ কিছুই করি নাই ! যদিও রাজকূলে জন্মগ্রহণ করি নাই, কিন্তু রাজতুল্য ধন ঐশ্বর্যের অধীশ্বর হ'য়েছি ; আজ সেই সম্পদ, সেই সম্পত্তি সকলই তোমাদের । কই, আমি কি কিছু নষ্ট ক'রেছি ?—তোমাদের গ্রাসাচ্ছাদনের কোনরূপ অভাব হবার কি সম্ভাবনা ক'রে দিয়েছি ? তবে এমন কথা ব'ল্চ কেন ? যদিও কিছু নষ্ট ক'রে থাকি, কিন্তু শোভা তুমিই বল দেখি, এই বিপুল ঐশ্বর্যের তুলনায় সে কি অতি সামান্য নয় ?

শোভা। আমি কি সেই জন্তই এত কথা ব'ল্চি ? আমরা কি উদরের চিন্তায় এত চিন্তিত ? আমরা কি ঐশ্বর্যের জন্তই এত কাতর ? আপনার ধন, আপনার সম্পদ, আপনি নষ্ট করুন, দান করুন, ব্যয় করুন, সঞ্চয় করুন, আমাদের তাতে দেখবার অধিকার কি ?

বিল্বমঙ্গল ! তবে কিসের জন্ত ব'ল্চ ?

শোভা। তাও কি আপনাকে ব'লে দিতে হবে ? অতুল রাজ-ঐশ্বর্যের অধিকারিণী হ'য়েও, রাজরাণী আপনাকে অতি দুঃখিনী জ্ঞান করে কিসের অভাবে ?

বিল্বমঙ্গল। সে কথা তোমরাই ব'ল্তে পার ।

শোভা। কুমার ! রক্ষা করুন । সেই চির-সোহাগিনী শান্তির দশাটা একবার চেয়ে দেখুন । দেখুন, দেখুন সেই শরতের শশিকলা, পূর্ণিমায় পূর্ণ হ'তে না হ'তে, সুধময় চতুর্দশী-বাসরেই দুঃখরূপী দারুণ রাহুর কবলে নিপতিতা হ'য়েচে । সে শোভা নাই, সে কান্তি নাই ; শান্তিরূপিনী মূর্তিমতী শান্তি আজ অশান্তির প্রজ্জ্বলিত-পাবকে দিবানিশি দগ্ধ হ'চ্ছে !

বিল্বমঙ্গল। আমি কি ক'রব বল ?

শোভা। আপনি কি ক'রবেন ? হাসির কথা বটে, কারার কথা বটে, ততোধিক দুঃখের কথাও বটে ! আশ্রিতা অবলাকে পদতলে দলিতা ক'রে আবার ব'ল্চেন আমি কি ক'র্ব ? হায়, হায়, কুমার ! কে এই নন্দনের আনন্দরূপিণী প্রফুল্ল পারিজাত বৃন্তচ্যুত ক'রে, দুঃখের দাবানলে নিষ্ফেপ ক'রেচে ? কে এই রাজমুকুটের শোভা-স্বরূপিণী অমূল্য পদ্মনাভমণি স্থান-বিচ্যুত করে, শ্মশান-চিতায় বিসর্জন দিয়েচে ? কে এই সংসার-নন্দিরের সস্তাপ-হারা শাস্তি-প্রতিমা, যষ্টির বোধনে বিজয়ার বিদায়দানে, চিরদিনের জন্তু অপার অশাস্তি-সাগরে নিমজ্জিত করেচে ? বলুন, বলুন কুমার ! কে এই নিরপরাধিনী পতিব্রতা সাধবী-শিরোমণিকে কতদিন কাঁদিয়েচে, দিবানিশি কাঁদাচ্ছে, এখনও কাঁদাবার জন্তু পাষাণে প্রাণ বেঁধে রেখেচে ?

বিষমঙ্গল। কি ক'র্ব শোভা ? উপায় নাই।

শোভা। কেন ?

বিষমঙ্গল। সকলই মনের কাজ।

শোভা। আপনার মন কি আপনার নয় ?

বিষমঙ্গল। আমার হলেও আমার বশীভূত নয় ! শাস্তিতে শাস্তি পাই কই ?

শোভা। কি ব'ল্লেন ? কি ব'ল্লেন কুমার ! শাস্তিতে শাস্তি পান না ? কিন্তু জিজ্ঞাসা করি, শাস্তিকে অশাস্তি-জ্ঞানে বিসর্জন দিয়ে, চিন্তার উপাসনাতে কি শাস্তিলাভ ক'রতে পারবেন ? শাস্তির বিনিময়ে চিন্তা ক্রম ক'রলে, চিন্তার অশাস্তি-অনলে কি চির-জীবন দহ হ'তে হবে না ?

বিষমঙ্গল। (অশ্রুমনে) কি ব'ল্লে শোভা ?

শোভা। কুমার ! সুধাতে প্রাণ শীতল না হ'লে, তীব্র গরমে কি শীতল

ক'রুতে সমর্থ হবে ? নিৰ্মল নিৰ্বরিণী-নীরে পিপাসা না গেলে, মক্ৰভূমির মরীচিকায় কি সেই পিপাসা দূর ক'রুতে পারবে ? স্বর্গে মন্দাকিনীর পদন-হিল্লোলে জালা না জুড়ালে, নরকের নিদারুণ বৃশ্চিক-দংশনে কি সেই জালায় উপশম ক'রুবে ?

বিষমঙ্গল । বুঝতে পারলেম না ।

শোভা । এখন তা ত পারবে না ; মায়াবিনীর ইন্দ্রজালে দৃষ্টিপথ সমাচ্ছন্ন, কু-আশার কুহকবশে জ্ঞান-শক্তি অবসন্ন, প্রহোভনের প্রহেলিকা-পীড়নে বিবেক-বল ছিন্নভিন্ন ; কুমার ! শাস্তি ও চিন্তা এ দু'য়ে প্রভেদ কত, তা কি বলতে পারেন ?

বিষমঙ্গল । ভাল ক'রে বুঝিয়ে বল ।

শোভা । ভালমন্দ কিছুই নাই, বুঝে দেখলেই হ'ল ! চিন্তার হাত হ'তে পরিভ্রাণ পাব ব'লে, লোকে শাস্তির অন্বেষণ ক'রে থাকে ; আর আজ আপনি শাস্তিকে দূরে নিষ্ক্ষেপ ক'রে, চিন্তার জীবনসমর্পণে সমুগ্ধ হ'য়েছেন ?

বিষমঙ্গল । তুমি কি শাস্তি ও চিন্তার সঙ্গে এই শাস্তি ও সেই চিন্তা এক ক'রুতে চাও ?

শোভা । নিঃসন্দেহ, তাতে কি আর ভুল আছে ? শাস্তি ও চিন্তার যত প্রভেদ, এই শাস্তি ও সেই চিন্তার ততই প্রভেদ । শাস্তি, সুখা—জীবনের সঞ্জীবনী ; চিন্তা, বিষ—স্পর্শে প্রাণাস্তকারিণী ; শাস্তি, সংসার-প্রাস্তরে স্নানীতল তরুচ্ছায়া ; চিন্তা, মক্ৰভূমিতে মৃত্যু-সঙ্গিনী মরীচিকা মায়া ; শাস্তি, স্বর্গের মন্দাকিনী ; চিন্তা, নরকের কালানল-স্বরূপিণী ; কেবল জালা, কেবল জালা, পরিণামে পরিতাপের অনন্ত জালা । কুমার ! তাতে আর কোন মতেই পরিভ্রাণ নাই ।

গীত

মোহবশে, স্মৃথের আশে, গেছ কি ভুলে ।
 স্মৃধাভ্রমে, বিষ-পানে, প্রাণ বাঁচে না কোন কালে ॥
 শান্তিতে মেলে না শান্তি, এ কি গো মনেরই ভ্রান্তি,
 চিন্তার চিন্তায় পায় গো শান্তি, বিযম ভ্রান্তি ভবতলে ॥
 চিন্তা-বিষে যাহারই মন করিয়াছে আক্রমণ,
 সে জানে তার জালা কেমন, শীতল হয় না কোন কালে ॥

বিষ । (স্বগতঃ) কি বলে বালিকা !—
 শান্তি শান্তি-স্বরূপিনী !—
 মরুমাঝে তরুছায়া শীতলতাময়ী—
 জীবনের সঞ্জীবনী মহাশক্তিরূপা !
 চিন্তা সদা চিন্তার আগার,
 অশান্তির প্রতিমূর্তি, পাপ-তাপময়ী ;
 নরকের কাল-বহি মরীচিকা-মায়া !
 এই কি রে সত্য-কথা ? হ'তে পারে তাহা ।
 কিন্তু আজ সে বিচারে কি ফল আমার ?
 মন মম চিন্তা-অমুরত,
 শান্তিতে না পাই শান্তি,
 চিন্তার চিন্তায় স্মৃথ, চিন্তাগত প্রাণ ।
 চিন্তারূপ ব্যাপিয়া জগৎ,
 ক্ষণে চিন্তা হারাইলে হই প্রাণহারা ।
 চিন্তা, চিন্তা, দেখি ভাবি—বুঝি একবার,
 না, না, চিন্তা সারাৎসার ;

চিন্তা প্রেমের আধার, শান্তির আগার ।

তাই সত্য, তাই সত্য, অত্যা কি তার ?

(প্রকাশে) না, পারলেম না ।

শোভা । কি পারলেন না কুমার ?

বিষমঙ্গল । তোমার কথা সমর্থন ক'রতে ।

শোভা । আমার কোন্ কথা ?

বিষমঙ্গল । মন ফিরাতে ।

শোভা । তা ত পারবেন না । ব্যাধের বংশীধ্বনি শুনে, কুরঙ্গিনী যখন
সেই দিকে ধাবিতা হয়, তখন তাকে কি কেউ ফিরাতে পারে ?

বিষমঙ্গল । তুমি কি ব্যাধের বংশীধ্বনির সঙ্গে চিন্তার প্রণয়ের তুলনা
কর ?

শোভা । শতবার ! বেস্তার মাঝাকে প্রণয় ব'লে, পবিত্র প্রণয় কথাটী
অপবিত্র করা হয় । এখন না হয়, তাই বলাই যাক্ ; কুমার !
বেস্তার প্রণয় প্রজ্জ্বলিত পাবক-শিখা, পুরুষের মন তাতে পতনশীল
পতঙ্গ । পতঙ্গ আগুনে পড়ে, কেবল জ'লে পুড়ে মরবার জন্ত ;
একবার এই সংসার রঙ্গভূমিতে দৃষ্টিপাত করুন ; এরূপ পতঙ্গ-গীলার
অভিনয় অনেক দেখতে পাবেন ।

বিষমঙ্গল । যুক্তিহীন কথা !

শোভা । কেন ?

বিষমঙ্গল । তাহ'লে মন সেই দিকে যায় কেন ?

শোভা । এ কথার উত্তর পূর্বেই ত দিয়েছি ! পতঙ্গ আগুনে প'ড়তে
যায় কেন ?

বিষমঙ্গল । বেস্তায় কি ভালবাসতে পারে না ?

শোভা । পাষাণে কি পিপাসা দূর ক'রতে পারে ? কুমার ! বেস্তার

ভালবাসা মোহিনী বিছাৎছটা ;—দেখতে বড়ই মনোরম, কিন্তু স্পর্শ
ক'লেই নিশ্চয় মরণ।

বিশ্বমঙ্গল। চিন্তা আনায় প্রাণ অপেক্ষাও ভালবাসে।

শোভা। রাক্ষসীরাও বালক-বালিকা পোষে, বড় হ'লে তাদের শোণিত
পান ক'রবার আশায়! বেঞ্জার ভালবাসা মায়াবিনী রাক্ষসীর
কুহকিনী মায়া,—স্বার্থসিদ্ধির কুহকিনী আশা। পাষাণে জল পাওয়া
যায় না, নরকে পারিজাত ফোটে না, অনলে শীতলতা থাকে না,
বেঞ্জার হৃদয়ে প্রকৃত প্রণয়ের স্থান হয় না ;—বেঞ্জা ঐশ্বর্যের দাসী,
প্রণয়ের দাসী নয়।

বিশ্বমঙ্গল। এ কথা শুনে চাহি না।

শোভা। কেন কুমার ?

বিশ্বমঙ্গল। চিন্তা, ঐশ্বর্য চায় না, কেবল আমাকে চায়।

শোভা। মায়াবিনীর কুহকবিস্তার, ভ্রান্তির পূর্ণ অধিকার। আপনার
নিভাস্ত ভুল ; সে এখন ঐশ্বর্য চায় না, কেবল পরে সর্বস্ব গ্রহণ
ক'বে ব'লে। সে যখন দেখবে যে তার কুহকজাল সম্পূর্ণ বিস্তার
হ'য়েছে, যখন দেখবে আপনি পূর্ণভাবে তার মায়ায় আত্মহারা হ'য়েছেন,
তখন সেই মোহিনী মোহমন্ত্রের অমোঘবলে, একে একে আপনার ধন
ঐশ্বর্য সুখ সম্পদ সকলই গ্রহণ ক'বে ; কিছুই থাকবে না, কিছুই
রাখবে না,—ধনের সুখ, মনের সুখ কোন্ দিকে চ'লে যাবে ! কুমার !
সেই কুহকিনীর কুহকবলে কোন্ দিকে চ'লে যাবে ! তখন দেখতে
পাবেন, আপনার পূর্বপুরুষ-সঞ্চিত অক্ষয় ধনভাণ্ডার শূন্য হ'য়ে প'ড়ে
আছে ! মণিমাণিক্য রত্নপ্রবালের পরিবর্তে কপর্দিকেরও অভাব
হ'য়েছে ! এই রাজতুল্য বিপুল অট্টালিকার ইষ্টক পর্য্যন্ত ভূমিসাৎ
হ'য়ে গেছে ! তখন দেখতে পাবেন, আপনি রাজপুত্রের ভার অতুল

ঐশ্বর্যের অধিকারী হ'য়েও, সম্বলহীন পথের ভিখারী সেজে দণ্ডায়মান হ'য়েছেন ; তখন দেখতে পাবেন, যে আজ আপনাকে প্রাণের ভিতর স্থান দিয়েচে, সে আর চরণতলেও স্থান দিচ্ছে না। আপনার ঐশ্বর্যের শেষ, তারও ভালবাসার শেষ। তখন দেখবেন, আর সে চিন্তা নাই, চিন্তার সে ভালবাসা নাই ;—আছে কেবল পরিতাপ, আছে কেবল মনস্তাপ, আছে কেবল নয়নজল, আছে কেবল চিন্তার অনল।

বিষমঙ্গল। নিতাস্ত অসম্ভব। অনুমানেও আসে না।

শোভা। একান্ত সম্ভব। অনুমান নিশ্চয়োজন, প্রত্যক্ষ দেখলেই ত হ'ল ! দৃষ্টান্তের অভাব নাই। এই সংসারের দিকে দৃষ্টিপাত ক'রে দেখুন না কেন, কত হতভাগ্য বুদ্ধির বিকারে জ্ঞানহারা হ'য়ে, পতিব্রতা-পত্নীর প্রেমে জলাঞ্জলি দিয়ে, বেষ্ঠার কুহকে আত্ম-বলিদান দিয়েছিল ; কত কত মন্দবুদ্ধি পাষণ্ড, সাধবী সতীর অঙ্গ-আভরণ উন্মোচন ক'রে বেষ্ঠার অঙ্গের শোভা-বর্ধন ক'রেছিল ; স্বর্গের দেবীর আসনে পিশাচীকে স্থান দিয়েছিল ; কিন্তু আজ দেখুন, আজ তাদের সে বিকার কেটে গেচে, সে কুমারের আঁধার তিরোহিত হ'য়েচে, আজ সেই হতভাগ্যগণ অবিরত নয়নজল নিক্ষেপ ক'রে, নিজ পাপের প্রায়শ্চিত্ত ক'রচে ;—পূর্বকৃত দুষ্কর্মজনিত অনুতাপ-বহ্নিতে মুহূর্তে মুহূর্তে দগ্ধ হ'চ্ছে। একদিন যে পত্নীর দিকে নয়ননিষ্ক্ষেপও করে নাই, আজ তার পদতলে শীতল ছায়ায় উপবিষ্ট হ'য়ে, বেষ্ঠার বিষের জ্বালা সুশীতল ক'রচে। কুমার ! দাম্পত্যপ্রণয় স্বর্গের সুধা, পত্নী-প্রেম নরজীবনে শান্তির আধার। যে পুরুষ, জীব ভালবাসার মধুর আনন্দ বুঝতে পারে না, পত্নী-প্রেমে সুখশান্তি অনুভব করে না, সে বড়ই ছর্ভগ্য ; বিধাতা তার জন্ত সুখশান্তির বিধান করেন নাই। এ সংসারের একদিকে স্বর্গ, অন্যদিকে নরক ; একদিকে সুধা,

অন্যদিকে গরল। সে জন্মগ্রহণ ক'রেচে, সংসারের নরকের দিক
দর্শন করবার জন্ম ; সে জন্মগ্রহণ ক'রেচে, সংসারের অশান্তি গরলে
জর্জরিত হবার জন্ম ; স্বর্গ বা সুখার সৃষ্টি বিধাতা তার জন্ম
করেন নাই।

বিল্বমঙ্গল। (স্বগতঃ) পত্নীপ্রেম দাম্পত্য-প্রণয়—

স্বর্গের অমৃতধারা শান্তি-সরোবর ;
অশান্তি-তাপিত নর সংসার-কারায়
শান্তি, ক্লান্তি করে দূর, হয় সুশীতল
সেই সবোবর-বারি করি পরশন !
পত্নী দেবী প্রণয়-প্রতিমা,
ধর্ম-অর্থ-প্রেম-বিধায়িনী
বারাঙ্গনা নরকের জীব, পিষাচরুপিণী
অশান্তি, অশান্তিময়ী সুখের কণ্টক !
বেশ্যতে নাহিক প্রেম, নাহি ভালবাসা,
বেশ্যা অর্থে বশীভূতা ঐশ্বর্যের দাসী,
মায়াবিনী, কুহকিনী, নহে প্রণয়িনী !
ষতদিন পায় অর্থ,
ততদিন ভালবাসা তার,
সম্পদের বিনিময়ে করে প্রেমদান,
ঐশ্বর্যের দাসী নহে জীবন-সঙ্গিনী !
পত্নী দেবী, পত্নী প্রেমময়ী,
জীবনের সুখ-দুঃখ সমান-ভাগিনী ;
পতি যদি হয় রাজা, পত্নী রাজরানী,
যতপি তিথারী পতি, পত্নী তিথায়িনী,

পতির মরণে সতী যার মরিবারে,
 হাশুমুখে পতিসনে এক চিতানলে !
 ধন্য পত্নি ! ধন্য ধন্য দাম্পত্য-প্রণয় !
 কিন্তু কোথা কে শুনেছে, উপপতিসনে
 বেড়া যার মরিবারে ?
 মরণ দূরের কথা, কাঁদেনা ক কভু !
 কিবা ছঃখ তার !
 তখন দ্বিতীয় পতি করে অন্বেষণ !
 ধিক্ বেড়া, ধিক্ তোরে পিশাচী পাপিনি !
 তবে এক কথা,
 ভালমন্দ দুই দিক আছে সকলেতে,
 ভালতেও ভালমন্দ আছে দুই দিক,
 মন্দতেও ভালমন্দ পাবে দেখিবারে,
 বিষ প্রাণ-সংহারক, কিন্তু সেই বিষে,
 প্রাণরক্ষা হইতেছে ঔষধরূপেতে ।
 জীবের জীবন জল, সে কারণে তার—
 জীবন দ্বিতীয় নাম ; কিন্তু সেই জলে,
 কত জীব করিতেছে প্রাণ বিসর্জন !
 বিচিত্র ব্যাপার !
 কিবা ভাল, কিবা মন্দ, কে পারে বলিতে !
 কুম্ভে কীটের বাস,
 ফণীর শিরেতে মণি,
 ধন্য বিধি বিধাতার, কে পারে বুঝিতে ?
 বেড়া কিছু জন্মে না ক পৃথকরূপেতে,

কুলের অঙ্গনা গিয়ে হ্রম বারান্দা,
 পতি ত্যজে, উপপতি ভজে,
 মজে পুর-পুরুষের প্রেমে ।
 তবে দেখ ভেবে,
 নহে সতী পতিপ্রাণা সব কুলনারী ।
 সকল হৃদয়ে নাই পবিত্র প্রণয় !
 আজ সতী, কাল কলঙ্কিনী,
 নহে অসম্ভব কথা ;
 আজ বেশা, কাল প্রণয়িনী,
 অসম্ভব কিসে তবে ?
 সাগরেতে আছে রক্ত, বিরাজে কুন্তীর,
 কারও ভাগ্যে রত্নলাভ, কারও প্রাণনাশ ।
 বেশাতেও আছে বিধ, আছে ভালবাসা,
 কেহ বিধে অর্জরিত, কেহ কত সূখী !
 চিন্তা বেশা সত্য, কিন্তু নাহিক সংশয়,
 রত্নরূপা সংসার-সাগরে !
 যত্নে তারে ক'রেছি ধারণ ;
 সূখী, সূখী, সূখী আমি, নিশ্চয় নিশ্চয় !
 (প্রকাশে)

আচ্ছা শোভা ! বেশা কি সকলেই সমান ?

শোভা । তারও কি আবার প্রমাণ দিতে হবে ? বেশার কি ভালমন্দ আছে ? যারা ধনের মোহে মুগ্ধ হ'য়ে সতী-ধর্ম বিসর্জন দেয়, যারা ইন্দ্রিয়-সুখ-পরিভূষণের জন্ত পুর-পুরুষকে আলিঙ্গন করে, এ সংসারে তাদের আর কোন্ কার্য অসাধ্য ? যারা সুখের প্রলোভনে পতি

ত্যাগ ক'রে থাকে, তারা যে আরও অধিকতর স্বার্থের আকাঙ্ক্ষার উপপত্তি ত্যাগ ক'রবে, সেটা কি বড় বিচিত্র কথা ! তারা সামান্ত ধনের বিনিময়ে অমূল্য সতীত্বধন বিক্রয় করে, অর্থাৎ তাদের জীবন-উদ্দেশ্য ; প্রেমময় মিষ্টবচন অথবা ভালবাসাপ্রদর্শন, কেবল অর্থ-উপার্জনের ছলনামাত্র ! যারা বিশ্বাসঘাতিনী, তাহিগে যে বিশ্বাস করে, তারা যদি জ্ঞানবান্ হয়, তবে এ সংসারে জ্ঞানের নামমাত্র না থাকাই ভাল ।

বিল্বমঙ্গল । তোমার কথার কোন মূল্য নাই ।

শোভা । আজ না থাকতে পারে ; কিন্তু একদিন এমন সময় আসবে, যখন আমার এই মূল্যহীন কথাই আপনার পক্ষে নিতান্ত অমূল্য ব'লে মনে হবে এবং আমার এ কথার যে কত মূল্য, তখন তা ভালরূপেই বুঝতে পারবেন ।

বিল্বমঙ্গল । শান্তি !

শান্তি । কি ব'লছেন ?

বিল্বমঙ্গল । আমি এখানে কি ক'রতে এসেছি, তা জ্ঞান ?

শান্তি । এখানে আসবার আপনার কোন অধিকার আছে কি ?

বিল্বমঙ্গল । আছে বৈকি ! আমারই এ বাড়ী, সুতরাং আমারই সম্পূর্ণই অধিকার ।

শান্তি । তবে আর এমন কথা জিজ্ঞাসা ক'রছেন কেন ? আপনার গৃহ, আপনি এ গৃহের অধীশ্বর । আপনার গৃহে আপনি কি ক'রতে এসেছেন, এ কথার কি কোন উত্তর আছে ?

বিল্বমঙ্গল । কিছুদিনের জন্য বিদায়-দিতে হবে ।

শান্তি । কাকে ?

বিল্বমঙ্গল । আমাকে ।

শান্তি । কিসের বিদায় ?

বিষ্মমঙ্গল । কিসের বিদায় শান্তি ? কি বলিব আমি !
 আত্মহারা, জ্ঞানহারা, প্রাণহারা হ'য়ে,
 চিন্তারূপে বিকিয়েছি, সঁপিয়াছি মন ;
 রূপে অমুপমা চিন্তা, প্রেমের প্রতিমা,
 সংসার-মরু-প্রান্তরে শান্তি-স্রোতধিনী ;
 রূপ-তৃষ্ণা, প্রেম-তৃষ্ণা বড়ই দুর্কার,
 তাপিত-পথিক আমি, সে তৃষ্ণা-প্রভাবে ;
 প্রমত্ত-মাতঙ্গসম প্রবল বাসনা,
 না পারি বৃষ্টিতে হার, নাহি মানে বাধা,
 সেই স্রোতধিনী-নীরে সুখের হিল্লোলে,
 ভাসিব, ভাসিব সদা হইব শীতল ।
 অথবা চিন্তার রূপ-অনল-শিখায়,
 উদ্ভ্রান্ত পতঙ্গ আমি মরিব পুড়িয়া ।
 বিদায়, বিদায় আজ সংসার-সকাশে,
 বিদায়, বিদায় আজ সমাজের কাছে,
 বিদায়, বিদায় আজ বিবেক তোমায়,
 বিদায়, বিদায় আজ জ্ঞানপথ হ'তে,
 বিদায়, বিদায় আজ দাও শান্তি মোরে ।

শান্তি । শান্তি বিদায় দিলে, আপনি সুখী হ'তে পারবেন ?

বিষ্মমঙ্গল । সম্পূর্ণভাবে ।

শান্তি । তবে আপনাকে বিদায় দিলাম ; স্বামীসুখের সুখের পথে বাধা-
 স্বরূপ হ'য়ে থাকতে, শান্তি কখনই ইচ্ছা করে না এবং তাতে শান্তি
 মুহূর্তের জন্যও সুখী হ'তে পারে না । আমি আপনাকে বিদায় দিলাম ।

শোভা । তুমি কি পাষণী ?

শাস্তি । কেন ভয়ি ? পতির সুখেই সতীর সুখ, পতির সুখ-সাধনই সতী-
জীবনের মহাব্রত । কখন কি লক্ষহীরার কথা শোন নাই শোভা ?
আমারই মত একজন ব্রাহ্মণ-বালা, স্বামীর সুখ-সাধনের জন্ত, সমাজ-
পতিতা বেষ্টার গৃহে দাসীত্ব স্বীকার ক'রেছিল ; আর আজ আমি
সেই স্বামীকে বিদায়দানে সুখী ক'রতে সঙ্কুচিত হব' ? পতির সুখের
জন্ত, সতী আত্ম-বিসর্জন দিতে পারে ; আর আজ আমি সেই পতির
সুখের জন্ত, সামান্ত স্বার্থ-বিসর্জন দিতে পারব না ? সখি রে !
হৃদয়ে আমার বল আছে, মনে আনার বিশ্বাস আছে । চিন্তা আমার
স্বামীসঙ্গ কেড়ে নিয়েচে সত্য, কিন্তু আমার স্বামী ভক্তি কেড়ে নিতে
কখনও কি সে সমর্থ হবে ? বল, বল সখি ! চিন্তা আমাকে পতিধনে
বঞ্চিতা ক'রেচে সত্য, কিন্তু আমার হৃদয়-মন্দিরে এই পতিরূপী
পরম-দেবতার পবিত্র প্রতিমূর্তি যা প্রতিষ্ঠিত আছে, তেমন শত শত
চিন্তাও কি আমাকে সে ধন হ'তে বঞ্চিতা ক'রতে সমর্থ হবে ? তবে
তাকে সে সুখ হ'তে বঞ্চিত করা কি পতিব্রতা সতীর উপযুক্ত কার্য
হ'তে পারে ? এখন বুঝলে সখি ? আমি প্রাণপতি পরকে প্রদান
ক'রলাম, কেবল তাতে স্বামী সুখী হবেন বলে ।

গীত

কেন সখি এমন কথা বলিলে ।

পতির সুখে সুখী সতী, তাও কি তুমি ভুলিলে ॥

সেই মোহন-রূপেতে মন ভুলে আছে,

হৃদয়-মাঝে আলো ক'রে, সে রূপ সদা বিরাজিছে,

কেউ নাই গো এ সংসারে,

আমার সে ধন কেড়ে নিতে পারে,
 ওগো রাধি সদা যতন ক'রে,
 মনপ্রাণ তার আছে ভুলে ॥
 সতীর পতি গতি-মুক্তি সংসারে,
 পতির সুখের বাধা সতী কভু কি হ'তে পারে,
 পতির সুখ-বিধান-আশে, বেষ্ঠাবাসে দাসীবেশে,
 ছিল সতী অনাগ্রাসে, শোন নাই কি কোন কালে ॥

শোভা । কুমার ! আজ এই সতী-কুলবালার কথা শুন্লেন ত ? আবার
 একদিন অসতী কুলটার কথাও শুন্তে পাবেন । তখন বুঝবেন, প্রেম-
 ময়ী স্ত্রী ও পাপচারিণী পর-স্ত্রীতে কত প্রভেদ ? তখন বুঝবেন, পর-
 মার্ধপ্রদ পত্নী-প্রেম ও স্বার্থময়ী পরস্ত্রীর আসক্তিতে কত প্রভেদ ? তখন
 বুঝবেন, শাস্তির ভালবাসা ও চিন্তার শোণিত-পিপাসা এ দুয়ে কত
 প্রভেদ ? তখন বুঝবেন, সুখ-মাগরের কূলে বাস ক'রে তৃষ্ণা
 নিবারণের অল্প, বিষহুদে নিমগ্ন হ'য়েছেন ।

বিষমঙ্গল । (স্বগতঃ) এই কি রে সতীর জীবন ?

এই কি রে শাস্তির হৃদয় ?

এত প্রেম, এত ভক্তি, এত ভালবাসা,

একাধারে এত গুণ ! নাহিক উপমা !

সর্বস্বার্থময়ী যেন সুর-শৈবলিনী !

হায় ! তুমি হতভাগ্য রে বিষমঙ্গল !

প্রেমের জীবন্ত-মুক্তি গৃহেতে তোমার,

তুমি আজ পরপাশে প্রেমের ভিখারী ?

হায় ! তুমি জ্ঞানঅন্ধ অসংযত মন ?

পরম রতন কাছে না পাও দেখিতে ?
 স্বর্ণ-আশে ধাইতেছ ফণী অবেষণে ?
 এত প্রেম বিরাজে কি চিন্তার হৃদয়ে ?
 এত ভক্তি আছে কি রে চিন্তার মনেতে ?
 এত আত্ম-বিসর্জন চিন্তা কি শিখেচে ?
 ধিক্ চিন্তা, শতধিক্ সে চিন্তায় মন ;
 কিংক-কুসুম চিন্তা রূপের পুতলী,
 “বিষকুস্ত পয়োমুখ” নাহিক-সংশয় ।
 কুলটার প্রেম-দীক্ষা কে পেয়েছে কবে ?
 বিদায় চিন্তার চিন্তা ! দূর হও আজ ;
 শান্তি, শান্তি, শান্তি-প্রেমে হইব দীক্ষিত ।
 কিন্তু বিচার বিষয় আছে এক কথা,
 কি পরীক্ষা করিয়াছি চিন্তারে লইয়া ?—
 তার প্রেম, তার ভক্তি, তার ভালবাসা,
 সসীম, অসীম কিম্বা জানিহু কেমনে ?
 সুধা কি গরলময়ী, দেবী কি পিশাচী,—
 তাই বা দেখিহু কবে ? তবে কি কারণে,
 বিনা দোষে শান্তি দান, সিদ্ধান্ত বিষম ?
 হ’তে পারে, অতি উচ্চ শান্তির হৃদয়,
 হ’তে পারে অমুপম শান্তির প্রণয় ;
 কিন্তু জিজ্ঞাস্ত এখন,
 উচ্চতর নহে যে সে চিন্তার হৃদয়,
 অপার অনন্ত নয় চিন্তার সে প্রেম,
 এ কথার স্মীমাংসা কে পারে করিতে ?

তবে কেন এ বিকার ? দূর হও এবে ।

চিন্তা, চিন্তা, চিন্তা প্রাণময়ী,

কল্পতরু, প্রেমগুরু সুধা-সঞ্জীবনী !

(প্রকাশে) শান্তি !

শান্তি । কেন নাথ !

বিশ্বমঙ্গল । দেখ শান্তি ! (অন্তর্মনে) কি ব'লছিলাম ; না,—হ'য়েচে,—

শান্তি ! তুমি কি কিছু ব'লতে চাও ?

শান্তি । কাকে ?

বিশ্বমঙ্গল । কেন, আমাকে ?

শান্তি । যাকে বিদায় দিয়েচি, তাঁকে আর বলবার কি আছে ?

বিশ্বমঙ্গল । আমাকে তোমার বলবার কিছুই নাই ?

শান্তি । যঁার শান্তি, তিনি যখন সেই শান্তির হবেন, তখন বলবার অনেক কথা আছে বৈ কি ? কিন্তু প্রাণেশ্বর ! এখন যে শান্তির ধন শান্তির আর নাই । না, একটা কথা বলবার সময় এই বটে ।

বিশ্বমঙ্গল । কি ব'লবে বল ?

শান্তি । কেবল একটা কথা জিজ্ঞাসা ক'রে লব ।

বিশ্বমঙ্গল । কি কথা ?

শান্তি । যে দিন আমি আপনার অর্দ্ধাঙ্গিনী-সাজে, আপনার সন্মুখে উপস্থিত হ'য়েছিলাম, সেই সূদিনের কথা কি মনে পড়ে ?

বিশ্বমঙ্গল । পড়ে বই কি !

শান্তি । আমাদের সেই বিবাহের প্রাঙ্গণে, উপরে টাঁদ হেসেছিল, নীচেতে জলন্ত অনল ধু ধু ক'রে জ'লেছিল ; সেই টাঁদের আলোকে, অনলের সন্মুখে আপনার করে আমার কর স্থাপনা ক'রে, তখন যে ব'লেছিলেন, "বদ্বিদং হৃদয়ং তব, তদন্ত হৃদয়ং মম" আর আপনার বাক্যের প্রতিধ্বনি-

স্বরূপ আমিও ব'লেছিলাম, “যদিদং হৃদয়ং তব, তদস্তু হৃদয়ং মম” ; সে কথা কি মনে আছে ?

বিব্রমঙ্গল । কতক আছে বই কি !

শান্তি । তবে নাথ ! সেই দিনই ত শান্তি হৃদয় দান ক'রেচে,—সেই দিন হ'তে ত আপনি এ হৃদয়ের অধীশ্বর হ'য়েছেন ; কিন্তু সে দানের প্রতিদান কৈ ?

বিব্রমঙ্গল । হৃদয়ের প্রতিদান হৃদয় প্রদান ; কিন্তু এ হৃদয় যে চিন্তা অধিকার ক'রে ল'য়েচে ! দানের প্রতিদান দিতে পারলাম কৈ ?

শান্তি । পারলেন না ? কিন্তু না পারলেই বা নিস্তার কৈ ? আঘাত ক'রলেই প্রতিঘাত হয়, টান দিলেই টান পড়ে ; টানে টানে জগৎ চ'ল্চে, আর মানুষ সে নিয়মে না চ'ল্লে কি থাকতে পারে ? শান্তি, যদি কায়মনে আপনাকে হৃদয় দান ক'রে থাকে, তবে সে দানের প্রতিদান পাবেই পাবে, এ কথা ক্রম নিশ্চয় । একদিন না একদিন, চিন্তা দূরে যাবে, চিন্তার মহাপরাজয় হবে ! হৃদয়ে শান্তির অধিকার হবে । শান্তির চিরজয়, একথা ক্রম নিশ্চয় । শান্তির পতিভক্তি যেমন অচল, শান্তির এ বিশ্বাসও ততোধিক অটল ; তা নইলে প্রাণেশ্বর ! শান্তি কি প্রাণ ধ'রে প্রাণাধারকে বিদায় দিতে সমর্থ হয় ? শান্তি যদি সতী হয়, শান্তি যদি পতিব্রতা-নামের অধিকারিণী হয়, পতিপ্রাণার প্রতি যদি সেই প্রেমময় শ্রীপতির করুণা প্রকাশ স্বার্থ হয়, তবে নিশ্চয় জানবেন, এই পদদলিতা শান্তি ঐ স্থান পাবে ;—এই পতিপ্রেম-পিপাসিতা চাতকিনী, পতিপ্রেমের সুধা-ধারায় চিরকাল সুলীতল হবে । শান্তি পতি পাবে, শান্তির অশান্তির অনল নিভে যাবে, শান্তির অন্ত চিরশান্তির উদয় হবে । সতীকে পতিধনে বঞ্চিতা ক'রতে একদিন অন্তকণ্ঠ সমর্থ হয় নাই, আর আজ

সামান্য মানুষে তাতে সমর্থ হবে ? তা'হলে আর সতীর গৌরব কি ?
তাহ'লে আর সতীত্বের পুরস্কার কি ? তাহ'লে আর অনাথনাথ শ্রীহরির
মহিমা কি ?

গীত

নাহিক সংশয়, জেন গো নিশ্চয়,
দীনে দয়াময় হইবেন সদয় ।
যবে শান্তি পতি পাবে, চিন্তা দূরে যাবে,
পতিপদে পুনঃ পাইবে আশ্রয় ।
কায়মন-প্রাণে যদি নিশিদিনে,
নাহি ভেবে থাকি ও চরণ বিনে,
পতিভক্তি যদি, থাকে নিরবধি,
তবে বিশ্বপতির হবে করুণা উদয় ॥
হই যদি সতী, হবে না অন্তথা,
ঘুচাবেন শ্রীপতি, এ অনাথার ব্যথা,
অশান্তি-অনল, হইবে শীতল,
মিটিবে পিপাসা প্রেম-সুখা-ধারায় ॥

শোভা । কুমার ! এই সতী-বাক্যের সফলতা একদিন পূর্ণভাবেই দেখতে
পাবেন, এবং তখন ভাল ক'রে দেখে ল'বেন যে, প্রতি অক্ষরে অক্ষরে
এর মিল হ'য়েছে কি না !

বিষমঙ্গল । শোন শান্তি ! শোভা ! তুমিও শোন ; আমার এই অতুল
ঐশ্বর্য্য রইল, আর তোমরা রইলে ; এখন হ'তে সকল ভারই তোমাদের
উপর ।

শান্তি । ঐশ্বর্যের ভার ঐশ্বর্যের উপরই প্রদান করুন ; শান্তির সঙ্গে
ঐশ্বর্যের সম্বন্ধ কি আছে ?

বিদ্বমঙ্গল । (নেপথ্যে চাহিয়া) সুদেব ! কই ? কোথায় গেলে সুদেব ;

সুদেবের প্রবেশ

সুদেব । আমাকে ডাকছিলেন ?

বিদ্বমঙ্গল । হাঁ, প্রয়োজন আছে ; দেখ সুদেব ! আমার স্বর্গীয় পিতৃ-
দেবের তুমি প্রিয় ভৃত্য । তিনি তোমাকে পুত্রস্নেহে প্রতিপালন
ক'রেছেন, এখনও তাঁরই অঙ্গে প্রতিপালিত হ'চ্চ, কেমন ?

সুদেব । আমি মানুষ, না, পশু !

বিদ্বমঙ্গল । এ কথার অর্থ ?

সুদেব । আমাকে যদি মানুষ ব'লে জ্ঞান করেন, তবে আর এ কথা
জিজ্ঞাসা ক'রেন কি ? আপনাদের অঙ্গে চিরজীবন প্রতিপালিত,
আপনাদের চরণে চিরদিনের জন্ত এ জীবন মহাধনে আবদ্ধ ; এ কথা
আবার জিজ্ঞাসা করবার কি আছে ?

বিদ্বমঙ্গল । ভাল কথা । আচ্ছা, এই যে ছুটি বালিকা, এরা তোমাদের
কে হয় ?

সুদেব । আপনি আমার প্রতিপালক, সে জন্ত পিতার সমান । (শান্তিকে
দেখাইয়া) ইনি আপনার সহধর্মিণী, সেজন্ত আমারও জননী-স্বরূপিণী ।
(শোভাকে দেখাইয়া) এটাকে আপনি অল্পবয়সে ভগ্নীর স্তায় প্রতি-
পালন করেন, সেজন্ত আমিও সহোদরার স্তায় জ্ঞান ক'রে থাকি ।

বিদ্বমঙ্গল । তোমার কথায় বড়ই সুখী হলাম ; প্রতিপালিত ভৃত্যের এরূপ
জ্ঞানবান্ হওয়াই কর্তব্য ।

সুদেব । মানুষমাত্রেই এইরূপ হয়ে থাকে, তবে মনুষ্যদেহধারী পশুতে না

হ'তে পারে। যে নরাধম, প্রতিপালকের প্রতি অকৃতজ্ঞ হয়, সে যে জ্ঞানহীন পশু হ'তেও অধম জীব! কারণ, প্রতিপালিত পশুতে প্রভুর মঙ্গল-সাধনই ক'রে থাকে।

বিদ্বমঙ্গল। দেখ সুদেব! আমার ধন, ঐশ্বর্য, বিষয়, বিত্তব সমস্তই রইল; আর তোমার এই জননী ও ভগ্নী এরাও রইল; এ সকলের ভার তোমাকে আজ প্রদান ক'রে, আমি নিশ্চিত হ'লাম?

সুদেব। এ আবার কিরূপ কথা কুমার?

বিদ্বমঙ্গল! তা শোন্বার প্রয়োজন নাই; আমার আদেশপালনই তোমার কর্তব্য-সাধন।

সুদেব। আপনার আদেশ আমার শিরোধার্য। কিন্তু কুমার! রাজকূলে জন্মগ্রহণ না ক'রলেও, যিনি পিতৃ ঐশ্বর্যে রাজার তুল্য মহা-সম্মানে সম্মানিত হ'য়েছেন; রাজকুমার না হ'লেও, দেশবাসী যাকে কুমার ব'লে অভিহিত ক'রে থাকে; তাঁর কি এরূপ কার্য্য ভাল দেখায়? বাল্যকাল হ'তেই যিনি অশেষ-শাস্ত্রে সুপণ্ডিত, অশেষ-জ্ঞানে জ্ঞানবান্, তার ফল কি এই হ'ল?

বিদ্বমঙ্গল। প্রভুর কার্য্যাকার্য্যের বিচার-ক্ষমতা ভূত্যের নাই।

সুদেব। বিচার-ক্ষমতা না থাকলেও অধিকার আছে। প্রভু যদি বিপথ-গামী হয়, ভূত্য তাতে প্রতিরোধ ক'রতে সম্যক্রূপে অধিকারী। পিতা বিকারপ্রাপ্ত হ'লে, পুত্র তাঁর ঔষধবিধান ক'রতে কেন না পারবে?

বিদ্বমঙ্গল। মহৎকূলে জন্ম ল'য়েও, আমি হুঙ্সরচারী; প্রকৃতিস্থ হ'য়েও আমি পাগল; অশেষ জ্ঞানলাভ ক'রেও আমি বিশেষ জ্ঞানহীন; উপ-দেশে ফল নাই, অনুযোগে ফল নাই, অনুরোধে ফল নাই। নিফল, নিফল,—আমার কাছে আজ সকলই নিফল। পরপ্রমে আমি

একান্ত বিমুগ্ধ—রূপের বহিঃশিখার নিতান্ত বিমুগ্ধ। কুহক-মস্ত্রে হৃদয় পাষণসমান। পাষণ—পাষণ, বোধ হয় মহাশ্মশান! বোধ হয়, তাই বুঝি বিধাতার অভিপ্রেত বিধান।

সুদেব। বোধ হয় কেন, নিঃসন্দেহ। বিধাতার বিধান নাহলে, কি আর তেমন স্বর্গের দেবতা, এমনভাবে স্থানভ্রষ্ট হ'তে পারেন? (শান্তির প্রীতি) কিন্তু ভয় কি মা! যদি ঈশ্বর থাকেন, তবে আমাদেরই আবার সব হবে।

শান্তি। যদি ব'ল্চ কেন সুদেব! ঈশ্বর আছেন, তাতে আর সন্দেহ কি? আমাদেরই যে আবার সব হবে, তাতেও কোন সংশয় নাই।

সুদেব। কামনা করি, তোমার বিশ্বাস যেন অচলা থাকে মা! প্রার্থনা করি, যে সর্বনাশী আমাদের এই সর্বনাশ-সাধন ক'রেচে, তার যেন অনন্ত নরকবাস সংঘটন হয়!

শান্তি। সুদেব! এরূপ প্রার্থনা কেন ক'রুচ বাপ? যে সর্বনাশী আমাদের এ সর্বনাশ-সাধন ক'রেচে, সে ত মহানরকেই বাস ক'রুচে; নরকবাস আর কাকে বলে? এখন প্রার্থনা কর যে, সেই নরক-বাসিনী যেন স্বর্গবাসের অভিলাষিণী হয়,—সেই পাপিনীর যেন সুমতির উদয় হয়; তা হ'লেই আমাদেরও সুদিনের উদয় হবে!

বিষমঙ্গল। (সুদেবকে) আমার সঙ্গে এস, কিছু অর্থের প্রয়োজন।

সুদেব। চলুন।

[বিষমঙ্গল ও সুদেবের প্রস্থান।

শান্তি। শোভা! আমাদেরও এই মাহেন্দ্রযোগ উপস্থিত। মহাযাত্রার উদ্দেশ্যে গরি গে চল;—

চলিলাম দীনবন্ধু কৃপাসিদ্ধ হরি;

কারে আর কি বলিব, কে আছে আমার;

অস্তর্যামি ! জান তুমি অস্তরের কথা ।
 হুঃখহারি ! জান তুমি হৃদয়ের ব্যথা ।
 স্বর্ণ-অট্টালিকা ফেলি, ধন ঐশ্বর্য ভুলি,
 কুলবালা ত্যজি কুল ভাসিহু অকূলে—
 বড় হুঃখে, বড় হুঃখে, বড় হুঃখে হরি !
 ছিলাম বালিকা যবে, কত সোহাগিনী,
 করিতাম ধূলাখেলা পথে পথে ফিরি ।
 খাইতাম, শুইতাম, ঘুমাতাম কত,
 হাঁসিতাম, কাঁদিতাম আপনার মনে,
 চিনিতাম পিতামাতা, ভাবিতাম ভবে,—
 এইভাবে দিন বুঝি যাবে খেলা করি !
 কে জানিত,—কে জানিত সংসার কেমন ;
 কে বুঝিত, সংসারের সুখ-হুঃখ-ভাব ;
 কে ভাবিত, এ জীবন হাসিকান্নাময় ;
 কে ভাবিত, বাল্যকাল জীবন-নাট্যের
 সুখের প্রথম অঙ্ক ; শেষ অঙ্ক সেই—
 সুধু হুঃখ-অভিনয় দ্বিতীয় হইতে ।
 সেই অভিনয়ে আজ অভিনেত্রী আমি ।
 প্রতিপদে, প্রতিছন্দ্রে হুঃখের উচ্ছ্বাস,
 প্রতিবাক্যে, প্রতিছেদে হুঃখের সঙ্গীত !
 একি লীলা, লীলাময় ! একি বিধি তব !
 প্রতিপদে কেন জীব পরের অধীন ;
 একের জীবন কেন অস্ত্রেতে জড়িত ?
 সুখ-হুঃখ বাধা তার কেন অস্ত্রসনে ?

পরের কাছেতে পরে, সুখের ভিখারী,
 পরে কেন দুখদাতা পরের জীবনে ?
 বিষম রহস্য হরি ! কল্পনা-অতীত,
 একের সম্পদ কিন্তু পর-অধিকার !
 কত আর জানাব হে ভাবগ্রাহী তুমি,
 অনন্ত অসীম এই দুঃখের বারতা !
 ল'ল্লছি হে নারী-জন্ম কাদিতে সংসারে,
 ধ'রেছি এ শাস্তি-নাম, অশাস্তি-সন্তোগে ।
 এই ভিক্ষা,—এই ভিক্ষা ওহে মোক্ষদাতা !
 পতিপ্রেম-পিপাসিতা চাতকিনী আমি,
 হয় যেন সুশীতল সস্তাপিত প্রাণ !
 এই ভিক্ষা,—এই ভিক্ষা করুণা-নিদান !
 চিন্তারে সুমতি দিও, দিও দিব্য-জ্ঞান ;
 দিও পতি, দিও পতি শাস্তি অভাগীয়ে ।
 শ্রীহরি শ্রীহরি বলি ভাসিমু অকূলে,
 শ্রীহরি শ্রীহরি নাম জীবনে সম্বল,
 শ্রীহরি শ্রীহরি মাত্র অনাথার গতি !

গীত

তবে চলিলাম শ্রীহরি ।
 ত্যজিয়ে কুল অকূলেতে ভাসাইয়ে জীবনতরী ।
 আমি বড় অভাগিনী, পতিপ্রেম-পিপাসিনী,
 অন্তর্ঘামী জান তুমি, মনেরই বেদন ;—
 পাই যেন তার ভালবাসা, পূর্ণ হয় হে মন-আশা,

যেন ভাঙ্গে না হে আমার বাসা, দেখো হে অকুল-কাণ্ডারী ।
অন্য কিছু নাই সম্বল, তুমি বুদ্ধি তুমি হে বল,
সেই ভরসা করি কেবল, যাই হরি ব'লে ;—
কেবা জানে কিবা হবে, কেবা জানতে পারে ভেবে ;
অনাথের নাথ তুমি ভবে, কেবল তোমার চরণ শরণ করি ।

[বেগে শাস্তির ও পশ্চাৎ শোভার প্রস্থান ।

দ্বিতীয় দৃশ্য

রূপনগর

চিন্তা ও চিতার প্রবেশ

চিন্তা । আচ্ছা চিতাদিদি ! তোর কি কখন মা ছিল ?

চিতা । মা ছিল না ত, আমি বুঝি বাপের পেটে জ'ন্মেছিলাম ?

চিন্তা । আমার ত তাই ব'লে মনে হয় ।

চিতা । তোর মুখে আগুন লো !

চিন্তা । তোর যদি মা থাকত চিতাদিদি ! তবে নিশ্চয় তোকে আঁতুড়ঘরে
হুন খাইয়ে মেরে ফেলত ।

চিতা । আমার গুণের কম কিসের লো, যে আমাকে হুন খাইয়ে মেরে
ফেলতে যাবে ?

চিন্তা । গুণে তুমি আলাকুশী, রূপে যেন দাঁতের মিশি,
তাই ত দিদি ! এত খুসি, এত ভালবাসাবাসি ।

আমি কি সেজন্ত ব'ল্‌চি দিদি ! তোর মা কি আর নাম খুঁজে পায়
নাই যে, তোর চিতা নাম রেখেছিল ? তার চেয়ে হুন খাইয়ে তোকে
মেরে ফেলাই ভাল ছিল না ?

চিতা । সেই চিন্তেতেই চিন্তে বুঝি হাবুডুবু খাচ্ছে ! ওলো, আমার
নাম কি চিতে ছিল, নাম আমার চিত্রাসুন্দরী ; কেবল পোড়া
লোকেই ত চিতা ক'রে ভুলেচে ।

চিত্তা। শুনেও বাঁচলেন ; আমি ভেবেছিলাম, তুই বুঝি রাবণের চিতা
দিবানিশিই জ্বল্‌চিস্ !

চিতা। জ্বলি আর না জ্বলি, কত লোক যে এই চিতার চিতায় প'ড়ে
জ্বলে ম'রেচে, তার কি নিকেশ আছে লো !

চিত্তা। তাহ'লে তুই শ্মশানঘাট !

চিতা। তখন ছিলাম সোণার খাট, ঠাট দেখে কি ঠাওর হয় না ?

চিত্তা। খুবই হয়, নাটমন্দির চূণকাম ক'রে নিলে, এখনও বোধ হয়,
মদনমোহন রাসে উঠে !

চিতা। রাস বা দোলের সাধ নাই দিদি ! কত গোপীগোষ্ঠ পর্য্যন্ত
হ'য়ে গেচে ।

গোকুলেতে গোপের কুলে ছিলাম রাই-রূপসী,
কদমতলায় শ্রামের বাঁশী বাজ্‌ত দিবানিশি ।
মালক্ষেতে মলয়-বায়ে হাস্‌ত ফুলের সারি,
কুঞ্জে কুঞ্জে ডাক্‌ত কোকিল, নাচ্‌ত শুকসারি ।
কানাই, বলাই, শ্রীদাম, সুদাম সবাই ছিল বশে,
রাই রাখ, রাই রাখ ব'লে, আস্‌ত ঘেঁসে ঘেঁসে ।

জান্‌লি চিন্তে ! রাখাল ত রাখাল, কত নন্দভূপাল পর্য্যন্ত চিতের এই
চরণ-তলায় প'ড়ে, চিৎ হ'য়ে খাবি খেয়েচে !

চিত্তা। শেষ বেঁচেছিল ত ?

চিতা। বেঁচেছিল, ম'রেছিল, কেউ বা চিতের পুড়ে ছাই হ'য়েছিল ।
যৌবন-বনের মাঝে রূপের দাবানলে,
কি পতঙ্গ, কি মাতঙ্গ সবাই সমান জ্বলে ।

কেউ বা পড়ে অম্বনি মরে, কেউ বা দুটো ছট্‌ফটায়,
ভোজের বাজি, লাগল যদি, পালাবে আর কে কোথায় ।

চিন্তা। রূপেতে আগুন জ্বলে না কি ?

চিতা। তা নহলে আর সংসার জ্বলে যাচ্ছে কিসে ? কারো বা প্রাণ জ্বল্চে, কারো বা ধন জ্বল্চে, কারো বা মান জ্বল্চে, পরিত্রাণ আর কার রইল ? পরিত্রাণ আর কারো নাই। এ আগুন কোথাও বা জ্বলন্ত, যে পড়ে সেই ছাই ; কোথাও বা ধিকি ধিকি, যাকে ধরে তাকে কয়লা ক'রে ছেড়ে দেয়।

চিন্তা। অথবা ময়লা কাটিয়ে খাঁটি হ'য়ে চ'লে যায় ; যদি সে সোনা হয় দিদি ?

চিতা। সোনা হ'লেই খাঁটি, আর রাং হ'লেই গ'লে মাটি। মাটি হওয়াই দেখে আস্চি, খাঁটি হ'তে ত কখনও দেখ্লেম না !

চিন্তা। সোনা চেনা সব কপালে ঘটে না।

চিতা। এইবার তোমার কপালটাই একবার দেখি গো ! বিঘ্নমঙ্গল রাং কি সোনা, চিনে নিতে পারলেই বাঁচি এখন ! খাঁটি হয়, কি মাটি হয়, তাও দেখতে বেশী দিন নাই !

চিন্তা। বিঘ্নমঙ্গল খাঁটি, মাটি করা সহজ নয় ; বোধ হয়, বিধাতা তাকে খাঁটি করবার জন্তই, চিন্তার এই রূপের অনলে তাকে দগ্ধ ক'রেচে।

চিতা। খাঁটি নয় লো ! মাটি—মাটি—নিভাজ মাটি। দিদি ! আমাদের এ হিন্দের ডোবা, এতে যা প'ড়বে তাই হিন্ধ, হিম্‌সিম্‌ খেতেই হবে।

চিন্তা। তাহ'লে আর তাতে আমার সুখ কি ?

চিতা। আহা, কচি-খুকি ! সুখই যদি নয়, তবে আর পরের মনযোগাতে এ দুঃখ কেন নয় ?

চিন্তা। দুঃখ-সহাটাই বা কি আছে দিদি ?

চিতা। কিছুই নাই, কিন্তু দুঃখের অবধিও নাই। দেখ চিন্তে ! আমার জানুতে বাকী কি আছে ?—

জন্ম গেছে বাধা ব'য়ে,
 রাধার প্রেমের দায়ে ।
 আজ আমি হ'য়েচি রাজা,
 কুঞ্জা বামে পেয়ে ।

আমিও একদিন তোদেরই মত ছিলাম গো, তোদেরই মত ছিলাম !
 তোদেরই মত পরের মন-যোগান দিতে আন্চান্ হ'য়ে উঠেছিলাম ।
 আমার কাছে কি চাপা দিয়ে ছাপা রাখতে পারিস্ ? জান্‌লি ভাই !
 আমরা যে পথে দাঁড়িয়েচি, মনযোগানই ত আমাদের ইষ্টমন্ত্র । মন-
 যোগাও আর মাথা খাও ; আজ একের, কাল দুয়ের, পরশু তিনের ।
 নাচতে ব'ল্লে নাচি, হাসতে ব'ল্লে হাসি, কাঁদতে ব'ল্লে কাঁদি,
 আর খুঁটকাপড়ে বাঁধি ; ফাঁদই ত এই আমাদের ।

চিন্তা । কেন ভালবাসা কি যায় না ?

চিতা । যায় বই কি ! যতক্ষণ পয়সার আশা, ততক্ষণই ভালবাসা ; হাঁ
 লো ! যারা যৌবন বেচতে ব'সেচে, তাদের আবার ভালবাসা কি ?
 রোখা কড়ি, রোখা পয়সা, চোখা চোখা ভালবাসা, সঙ্গে সঙ্গেই
 সব ফরসা ।

চিন্তা । পয়সাটাই কি এত সরে ?

চিতা । অন্তথা কি আছে তার ? প্রেমের দায়ে কুলের বার, কিন্তু দিন দুই
 চার, দিন দুই চার ;—

সে দায় তখন যায় কেটে,
 পেটের দায়টা এসে জোটে !

আর অম্নি দিদি !—

দেখ পইতে মার ভাত,
 তা নইলে কুপোকাত ।

চিন্তা । ভালবাস্তে জানলে, বোধ হয়, কোন দায়ই জোটে না !

চিতা । তা না হয় মেনে নিলেম ; কিন্তু ভালবাগা জানাবি কারে ?

চিন্তা । যে ভালবাসে আমারে !

চিতা । আমরাদিগে ভাল কেউ বাসে না লো, ভাল কেউ বাসে না ;—

যারা ভালবাসা জানে,

তারা কি আসে এখানে ?

ভালবাসার বাসা খড়ে,

পরে কি তা দিতে পারে ?

আমরা ধনের ভিখারী, তারা যৌবনের ব্যাপারী ! এক দিয়ে এক
নিতে আসে ; অমনি কেউ কিছু দিতে আসে না লো, অমনি কেউ
কিছু দিতে আসে না !—

যতক্ষণ এই ফুলে মধু,

বঁধুর পরে আসবে বঁধু ;

যেই শুকাবে ফুলের কলি,

অমনি উড়ে যাবে অলি ।—

তখন খালি পসরা মাথায় ক'রে, গলি গলি ফিরে ফিরে, ফেরি করা
বই অন্তগতি কিছুই থাকে না দিদি, অন্তগতি আর কিছুই থাকে না !

চিন্তা । তোর কথার ত কিছু অর্থ বুঝতে পারা গেল না !

চিতা । এখন গেল না বটে ; তবে বুঝতে পারার দিন দু'দিন পরেই
আসবে, দেখতে পাবি । আজ যেটা ব'ল্‌চি, সেইটাই এখন ভাল
ক'রে বুঝে রাখ । যে পথে এসে দাঁড়িয়েচ দিদি ! এতে খাঁটী হ'লেই
মাটী,—প্রেমের কাঙ্ক্ষাল হ'তে গেলেই পথের কাঙ্ক্ষাল হবে ! তোর
এই যৌবন-বনে, বিলম্বমূল মন্ত শিকার । এ শিকার ফ'স্কে গেলে,
আধেরের কাজ ফ'স্কে যাবে,—তখন হাহাকার ক'রে ম'ঝতে হবে ।

যৌবন ভাদরের নদী ; কিনারায় কিনারায় ভরা । আজ আছে কাল
ব'য়ে যাবে, শুকনো চড়া প'ড়ে থাকবে ; তখন,—তখন কি হবে
দিদি ? যদি প্রেম চিনেছিলি, তবে পতি চিন্তে হয় ; প্রেমের মর্শ্ব
পতি জানে, পর-পতিতে রূপ কেনে । বেষ্টার ত বেচাকেনার
কারবার ; প্রেম বা পিরিতি, অথবা ভালবাসার রীতি, সে সব ব্যাপার
কুলবালার ; আমাদের নয় লো, আমাদের নয় !

চিন্তা । দিদি ! পতি থাকলে কি আর পর-পতিকে প্রাণ দিতে আসি ?

চিতা । কেন, পতি ছিল কোথা ?

চিন্তা । যম ছিল যেথা ।

চিতা । তাহ'লেও মন ত কাছে ছিল, যমের বাড়ী পর্যন্ত কি ভালবাসা
যেতে পারত না ? যম না হয় পতিকেই কেড়ে নিয়েছিল, মতিগতি
ত কেড়ে নিতে পারে নাই ? যখন দিদি ! কুলের বার হ'য়েচ,
তখনই ত পরকাল খেয়ে ব'সেচ, ইহকালটা যেন আর নষ্ট করিস্ না ।
যৌবনের দিন দু'দিন, কিন্তু বাঁচতে হবে অনেক দিন । অনেক
কাঠখড় চাই দিদি ! অনেক কাঠ খড় পুড়ে যাবে । বিষমঙ্গল ধনের
রাজা, এ কথা যেন ভুলিস্ না ; তাকে কখন মনের রাজা ক'রিস্ না ।
পরে তাহ'লে কারার আর সীমা থাকবে না ।

যোগিনীবেশে শাস্তি ও যোগীবেশে শোভার প্রবেশ

শোভা ও শাস্তি ।—

গীত

ভবের ভাব্‌খানা ভাবে ক'জনা ।

না চিন্লে কি যায় গো চেনা, কিবা রাং কিবা সোনা ॥

পরশ-রতন পরশে কেউ, রাঙেতে ক'রুচে সোনা,

কেউ বা ফেলে সোনার খনি, খুল্ছে রাঙের কারখানা ॥

মণি-আশে, ফণী পোষে, তাও ত গো গেছে শোনা,
 যত না হয় আশার সুসার, ততোধিক তার যাতনা ॥
 ধনের রাজা হ'তে পারে, মনের রাজা ক'জন হয়,
 খোঁজা গেলে যায় গো বোঝা, রাজা সাজা সোজা নয় ;
 সাজিয়ে যদি কর রাজা, সাধ ক'রে হয় কাঙ্ক্ষাল সাজা,
 দু'দিন পরে সে দেয় সাজা, মজা ত তার জান না ॥

শোভা । ধনের রাজা অনেক আছে গো, মনের রাজা মেলে না ! মনের
 রাজা মন, হৃদয় রাজ্য ধন, যতক্ষণ আপনার, ততক্ষণই আপনার ;
 পরকে যদি রাজা সাজাও, অমনি কাঙ্ক্ষাল সেজে চ'লে বাও ; মজার
 কথা বোঝা দায় !

চিতা । বেশ কথা ব'লেচ । হাঁ গা, তোমরা কে বাছা ?

শোভা । বেশ দেখেও কি বুঝতে পার্চ না ? আমি যোগী, ইনি যোগিনী ।

চিতা । এত অল্পবয়সে এ পথে দাঁড়িয়েচ ?

শোভা । তোমরাও ত এ পথে দাঁড়িয়েছিলে বাছা ?

চিতা । আমাদের কি চোখ আছে বাছা ? তাহ'লে আর কাঁটাবনে
 এসে প'ড়'ব কেন ?

শোভা । আমাদেরও কি চোখ আছে বাছা ? তাহ'লে আর বনের
 কাঁটা মুক্ত ক'রতে আস'ব কেন ?

চিত্তা । এখানে আপনাদের কি প্রয়োজন ?

শোভা । সংসার-ত্যাগীর আর অশ্রু কিসের প্রয়োজন ; ধনজন ত সবই
 বিসর্জন । তবে অল্পক্ষণের জন্য, একটু স্থানের ভিখারী ।

চিত্তা । দেবার আছে, দিতে পারি ; কিন্তু দিতে যে আমি অনধিকারী ।

শোভা । কেন বাছা ?

চিন্তা । এ যে কুস্থান ।

শোভা । কু, স্ত্র মনে মা ! স্থান সকলই সমান ; স্থানকে কু ক'রে
নিলেই কু হয় ।

চিন্তা । আমরা বেশ্যা, এটা বেশ্যালয় ।

শোভা । আমারও বেশ্যা, বেশ্যালয়েই বেশ্যালয় হবে ।

চিন্তা । আমার সঙ্গে উপহাস করা কি আপনাদের শোভা পায় ?
আপনাদের দর্শনে আমাদের মত কত পাপিনী উদ্ধার হ'য়ে যায় !

চিন্তা । দেখেও কি বুঝতে পারচিস্ না ; যোগী হ'লেও বয়স কেমন ?
ছাই মেখে চাপা দিলেও ছিটে-ফোটাটা ঢাকা পড়ে নাই !

শোভা । উপহাস আর কি ক'রলাম বাছা ? আচ্ছা, বল দেখি তোমাদের
বেশ্যা বলে কেন ?

চিন্তা । আমরা যে কুলত্যাগী, অকূলে প'ড়ে পাঁচজনকে ধ'রেচি ।

শোভা । আমরাও ত কুলত্যাগী, অকূলে প'ড়েই পাঁচজনকে ধ'রেচি ।
কখন হর, কখন হরি, কখন শ্যামা, কখন প্যারী ; আমরাই কোন্
পাঁচজন ছেড়ে থাকতে পারি ?

চিন্তা । আপনারা পরম দেবতা, এ স্থান মহানরক ; নরকে কি দেবতার
স্থান সম্ভব হয় ?

শোভা । নরক ব'লেই যদি মনে জান, তবে আর এখানে থাক কেন ?

চিন্তা । বপালে যা লিখন ছিল, তার খণ্ডন কে ক'রবে বল ?

শোভা । সবই যদি বুঝেচ ভাল, তবে স্বর্গের পথ ধ'রে চল ।

চিন্তা । পথ দেখিয়ে নিয়ে যার কে ?

শোভা । সঙ্গী কর মনকে !

চিন্তা । মনই ত এখানে এনেচে ;—নন্দনকানন দেখাব ব'লে, কাঁটাবনে
এনে ফেলেচে । মন বড় প্রবঞ্চক, বিচিত্র তার প্রবঞ্চনা ; পালাতে

ইচ্ছা ক'রলেও পানিয়ে যেতে দেয় না ! কখন দেখায় সুখের ছবি,
কখন বলে এ সংসার এইরূপই সবই, থাকতে থাকতেই সুখী হবি ।
কখনও বিষম তাড়না, কখনও সরস সান্না ; ধাঁধায় তার বাঁধা
প'ড়েচি, বুঝেও ছলনা বুঝতে পারি না ।

শান্তি । (শোভার প্রতি) সময় নষ্ট নিশ্চয়োজন ।

শোভা । হাঁ মা ! যাই চল । (চিন্তার প্রতি) একান্তই তাহ'লে স্থান
পাওয়া যাবে না ?

চিন্তা । হাঁ, হাঁ, তাই ভাল । যোগী সন্ন্যাসী মানুষের বাপু এখানে স্থান
হবে না ।

শোভা । কেন বাছা ! অপরাধ ?

চিতা । তোমাদের সঙ্গে বিবাদ করবার ত দরকার নাই ; স্থান হবে না,
সেই ভাল । অনেক গাছতলা প'ড়ে আছে, একটা খুঁজে নিলেই ত
ফুরিয়ে গেল ! অনেক যোগী-সন্ন্যাসী দেখেচি, কে কোন্ ছলে আসে,
কালের মানুষ কি চিন্তে পারা যায় ?

শোভা । চিন্তে পারলে কি কালের চিন্তে ভুলে গিয়ে, চিন্তের কাছে
কাল কাটাও আর ? মানুষ চিন্তে পারলে, কখন সোনা দিয়ে রাং
কিন্তে আসতে না !

চিতা । হাঁ গা বাছা ! এর নাম যে চিন্তে, তা কেমনে ক'রে জানতে পারলে ?

শোভা । আমরা সব জানি বাছা ! চিন্তার নাম জানা কি, চিন্তার চিন্তা
পর্যন্ত ব'লে দিতে পারি ।

চিতা । কেমন ক'রে পার বাছা ?

শোভা । আমরা যোগবলে গুণতে জানি ।

চিতা । ওমা, সত্যি কথা ! ঠাকুর তবে একটু দয়া ক'রতে হবে ;
একবার ভাল ক'রে ব'সে, এর হাতটা দেখে দাও !

শোভা। ভাল ক'রে ব'সতেও হবে না, হাতও দেখতে হবে না—কি

ব'লতে হবে, তাই বল না ?

চিতা। (চিন্তাকে দেখাইয়া) এর মনে কি কিছু ভাবনা আছে ?

শোভা। খুবই আছে ; ভাব দেখে কি বুঝতে পার না ?

চিতা। তবে বল বাছা !

শোভা। একটা পরের পাখী উড়ে এসে দাঁড়ে ব'সেচে ; সে এখন পোষ মানবে, না, শিকল কেটে পালিয়ে যাবে ; দেখা যাচ্ছে, এইটেই ত ভাবনার ভাব ।

চিতা। ও মা ! হুবহু গো, হুবহু ! তোমারা মানুষ নও ; দেবতা নিশ্চয়, দেবতা নিশ্চয় ! মনের কথা টেনে এনে দিয়েচে ! আচ্ছা, বাবাঠাকুর ! পোষ মানবে ত ?

শোভা। মানাতে পারলেই তবে মানবে ।

চিতা। কি ক'রলে মানাতে পারা যাবে ?

শোভা। দাঁড়টা খুব শক্ত বটে, কিন্তু শিকলগাছটা তত শক্ত নয় ; কেটে ফেললেও ফেলতে পারে ।

চিতা। কিসে না কাটে তাই বল দেখি ।

শোভা। সহজে হবে না, কিছু টোটকা টাটকা করা করা চাই ।

চিতা। কে তা ক'রে দিতে পারবে ?

শোভা। আমরাই পারব ।

চিতা। ওমা, তোমরাই পারবে ? আমাদের পরম সৌভাগ্য, তাই তোমা-
দিগে আজ পেয়েচি । তবে এখন যা ক'রতে হবে, তাই ক'রে দাও ।

শোভা। আমার দ্বারা হবে না, (শান্তিকে দেখাইয়া) মাতাজিকে ধর ।

চিতা। মা ! তুমি সাক্ষাৎ ভগবতী, দয়া ক'রে আজ আমাদের কামনা
সিদ্ধ ক'রতে হবে ।

শান্তি। দয়াময় পতিতপাবনই কামনা সিদ্ধি ক'রবেন। তিনি ভিন্ন

মানুষের কি সাধ্য যে, মানুষের মন ফিরাতে পারে ?

চিতা। যা ব'লবে তাই দিব মা।

শোভা। অন্য কিছুই প্রয়োজন নাই, একটু স্থান পেলেই আমাদের যথেষ্ট।

চিতা। তার আর কথা কি বাবা ! তোমাদের ঘর, তোমাদের বাড়ী, যতদিন ইচ্ছা ততদিন থাক। চিন্তে তুই ভাল ক'রে এঁদের সেবার যোগাড় কর এখন। আমি গিয়ে বাইরের ঘরটা গঙ্গাজল দিয়ে ধুয়ে দিই গে, নিরিবিলিতে বাবাঠাকুরেরা থাকবেন ভাল !

[চিতার প্রস্থান।

চিন্তা। (শোভার প্রতি) সেবার কি আয়োজন করা যাবে ?

শোভা। আয়োজন নিপ্রয়োজন। সেবার মধ্যে শ্রীহরির শ্রীপাদপদ্ম সেবা। তবে জীবনধারণ জন্ত শুষ্ক হরীতকীর প্রয়োজন, তাও আমাদের সঙ্গে আছে। নিকটেই নদী, সেই জলে স্নান ও পান, এখানে কেবল আশ্রয়-স্থান।

চিন্তা। আমার গৃহ থেকে কিছুই গ্রহণ ক'রবেন না, তাতে আমার মন বুঝবে কি ক'রে ?

শান্তি। প্রার্থনা করি, সেই জ্ঞানময় হরি যেন তোমার মনকে বুঝিয়ে দেন ! তোমার মন বুঝলেই আমার পাওনা যথেষ্ট হবে।

চিন্তা। আপনাদের কথার উপর ত আর কিছু ব'লতে পারি না !

শোভা। ব'লবার সময় অনেক আছে ; সেই দয়াময় শ্রীহরির রূপায় যেন ব'লবার দিনই উপস্থিত হয় !

চিন্তা। ব'লতে যদি কোন বাধা না থাকে, তা হ'লে একটা কথা জিজ্ঞাসা করি।

শোভা। বাধা ঘুচবে ব'লেই ত সংসার-বাধা ছিন্ন ক'রে, বাধানাথের

চরণে জীবন-মন বাধা দিয়েচি ; অবাধে সকল কথা ব'লতে পার !

চিন্তা। আমিও তাই ব'লছিলাম ; এই বয়সে সংসারের মায়া ছিন্ন ক'রলেন

কেমন ক'রে ?

শোভা। যাদের প্রতি সংসারের কোন মায়া নাই, তারা আর সংসারের

প্রতি মায়া ক'রবে কিসের জন্ম ? যদিগে সংসার বিসর্জন দিতে

পারে, তারাই বা সংসারকে বিসর্জন দিতে ভয় ক'রবে কেন ?

সংসার আমাদিগে ভুলেচে, আমরাও সংসারকে ভুলেচি ।

চিন্তা। কেন, সংসারে কি কেউ ছিল না ?

শোভা। ছিল সবই, আছেও সবই ; কেবল স্নেহ নাই, দয়া নাই, মায়া

নাই, মমতা নাই ; পরের মুখ চেয়ে ব'সে, তাতে দুঃখ বই সুখ নাই ;

সেই জন্মই ত দুঃখহারীকে খুঁজতে এসেচি !

চিন্তা। আপনাদের খুব মনের তেজ !

শোভা। মন যখন আমাদের,—আর কারও নয়, তখন তেজই বা থাকবে

না কেন ? আপনার মন পরের হ'লেই অধীন হয় ; যে অধীন তারই

দুঃখ ; তবে সাধ ক'রে আপনার ধন পরকে দিয়ে, দুঃখের ফাঁসি কিনে

এনে, গলায় পরবার প্রয়োজন কি ? যদি অধীন হ'তে হয়, তবে যার

জীবন, যার মন, যার আমি, সেই পরাংপরেরই অধীন হওয়া ভাল ;

কারণ, যে তার অধীন, সেও তারই অধীন, উভয়ে অধীন, উভয়ে

স্বাধীন ; অধীন স্বাধীন কেউ কারও নয় ।

চিন্তা। সকলে তা বুঝতে পারে কই ? তাহ'লে কি আর আপনার ধনে

কাট কিনে এনে, আপনার হাতে আগুন জ্বলে, সেই আগুনে

আপনা আপনি পুড়ে মরে ? তাহ'লে কি আর যাদের সংসার নাই,

সংসারের ভরসা নাই, কূল পাবার আশাও নাই, তারা কি কখন

আশার বলে বুক বেঁধে, সংসারের মুখের দিকে চেয়ে থাকে ? তা যদি বুকতে পারবে, তাহ'লে যদিগে লোকে চায় না, লোকের মন যারা পায় না, তারা আপনার মন লোককে দিয়ে, লোকের অধীন হ'তে ধায় কেন ?

শোভা । সেই জন্মই ত সব যায় ! পরের মন ত পাই না, আর আপনার মনও আপনার থাকে না । পরকে মন দিলে, নিয়ে ত তা রাখে না ; ফিরেও দেয় না ;—কোথায় যে তা ফেলে দেয়, খুঁজেও আর পাওয়া যায় না । সেই জন্মই ত পরের কাছ হ'তে পালিয়ে এসে, পরাৎপরের সঙ্গে প্রেম ক'রেচি ।

চিন্তা । প্রেমের ফাঁদে প'ড়লে, বোধ হয় পালিয়ে আসতে পারতেন না ?

শোভা । প্রেমের ফাঁদে ফেলতে পারে, এমন লোক কই ? তাহ'লে কি আর সন্ন্যাস-ফাঁদ সঙ্গে ক'রে, শ্যামটাদকে ধরতে আসতে হয় ? মানুষের কাছে প্রেম গেলে, প্রেমময়ের অন্বেষণে এতদূর আসব কেন ? যেখানে প্রেম সেইখানেই সেই প্রেমময় ;—প্রেমময়ই ত প্রেমের অন্বেষণ ক'রে থাকেন ।

বিদ্বমঙ্গলের প্রবেশ

বিদ্বমঙ্গল । চিন্তা ! কি ক'রুচ ? (সন্ন্যাসীকে দেখিয়া) এখানে এঁরা কে ?

চিন্তা । দেখে কি মনে হয় ?

বিদ্বমঙ্গল । মনে হয়,—মূর্তিমতী শান্তি বুঝি আনন্দের সহিত এখানে উদয় হ'য়েচে !

চিন্তা । শান্তিনামটা বুঝি এখনও ভুলতে পার নাই ?

বিদ্বমঙ্গল । ভুলেচি, ভুলেচি, ভুলেচি বৈকি ! না ভুললে কি আর চিন্তা-

নামের সাধনায় জীবন-মন সমর্পণ ক'রতে পারি ? (শোভার প্রতি)
আপনারা এখানে কি প্রার্থনায় ? কি অভিলাষে, স্বর্গের দেবতা
শ্মশানে এসে উপস্থিত হ'য়েছেন ?

চিন্তা । এটা শ্মশান বুঝি ?

বিষমঙ্গল । শ্মশান বৈকি চিন্তা ! মহাশ্মশান ! এ শ্মশানে কত মন, কত
প্রাণ, কত হৃদয়, কত বিবেক কত দিন দগ্ধ হ'য়েছে ! এ শ্মশানের
জ্বলন্ত-চিতায় কত ধন, কত ঐশ্বর্য্য, কত সুখ, কত শান্তি, চিরদিনের
জন্তু ভস্মীভূত হ'য়ে গেছে ! সুখের সংসারে এ এক মহাশ্মশান, তার
কি আরে সন্দেহ আছে ?

চিন্তা । তবে সুখের সংসার ত্যাগ ক'রে শ্মশান জেনেও শ্মশানবাসী
হ'য়েচ কেন ? ঘরে যার শান্তি, তার আর সুখের অভাবই বা
কি আছে ?

বিষমঙ্গল । সোনার কৈলাস ত্যাগ ক'রে, শঙ্কর শ্মশানবাসী হ'য়েছেন
কেন ? ঘরে যার শান্তিদায়িনী, তার ত সুখের অভাব কিছুই নাই !

চিন্তা । শঙ্কর শ্মশানবাসী হ'য়েছেন প্রেমের সাধনায় ।

বিষমঙ্গল । আমিও হ'য়েচি প্রেমের সাধনায় । শঙ্করের সাধনা চিন্তামণির
প্রেম, আমার সাধনা চিন্তার প্রেম । প্রেমের দায়ে না প'ড়লে,
শ্মশানে আর কে যায় ?

শোভা । যায় বৈ কি ! চিতার অনলে পোড়বার জন্তু পতঙ্গ যায় । তার
ত আর প্রেমের দায় নয় ?—প্রাণের দায়েই উপস্থিত হয় ।

বিষমঙ্গল । চিন্তা ! এ কথার উত্তর তুমিই দাও ;—এটা সাধনার
শ্মশানভূমি, না, মস্বার জ্বলন্ত-চিতা বহি ?

চিন্তা । সাধক হও ত প্রেমের সাধনায় সিদ্ধি পাবে ; পতঙ্গ হ'লেই রূপের
চিতায় পুড়ে ম'রবে !

শোভা । শুধু সাধক হ'লেই ত হয় না, সাধনায় আবার অধিকার চাই ।
আগে অধিকার-বিচার পরে সাধনার উপচার ; অনধিকার-সাধনায়
হিতে বিপরীতই হ'য়ে থাকে !

বিষমঙ্গল । (স্বগতঃ)

সত্য কথা, সাধকের কথা,

উপেক্ষায় নয় ।

চিন্তা-প্রেম সাধনায়, মম অধিকার,

কি আছে এমন ?

পরপত্নী, পরপ্রাণ, পরের হৃদয়,

আমি কে, কি সাধনা, কিবা সাধ্য তায় ?

কিবা শিক্ষা, কিবা দীক্ষা, কেবা দীক্ষা-দাতা,

কি আসন, কোন্ যুদ্রা, কি সংকল্প তার,

কিবা তায় উপচার, কিসের আহুতি ?

অধিকার-বিহীনের সাধনার ফল ;—

হিতে বিপরীতভাব নিশ্চয় নিশ্চয় !

না, না—কেন বা তা হবে !

বিচারেতে অধিকার সম্পূর্ণ আমার ।

হ'তে পারে পরপত্নী, কিন্তু নহে পর ;

চিন্তা শক্তি, চিন্তা স্মৃতি, চিন্তা পঞ্চপ্রাণ ;

শিক্ষা, দীক্ষা, চিন্তা-প্রেম, চিন্তা দীক্ষা-দাতা,

সঙ্কল্প জীবন তায়, মন উপচার,

সর্বস্ব,—সর্বস্বসহ হৃদয়-আহুতি ;

সাধনায় সিদ্ধিলাভ নাহিক অন্তথা !

চিন্তা । (বিষমঙ্গলের প্রতি) সহসা এত চিন্তাটা কিসের উপস্থিত হ'ল ?

বিষমঙ্গল । চিন্তার স্থান চিন্তাই অধিকার ক'রে ব'সে আছে !

শোভা । (চিন্তা প্রতি) আমরা এখন স্নান ক'রতে যাব ।

চিন্তা । স্নান ক'রতে যাবেন ? কিন্তু স্বীকার ক'রে যান, এখানে আসবেন ত ?

শোভা । যখন আশা দিয়েছি, তখন নিশ্চয় আসব ; আমাদের কথা মিথ্যা হবে না ।

[শোভা ও শান্তির প্রস্থান ।

বিষমঙ্গল । আমাদেরও স্নানের সময় হ'য়েচে নয় ?

চিন্তা । কি বোধ হয় ?

বিষমঙ্গল । তুমি "হাঁ" ব'লেই হ'য়েচে ; "না" ব'লেই হয় নাই !

চিন্তা । দেখ বিষমঙ্গল ! অতটা ভাল নয় ।

বিষমঙ্গল । কেন চিন্তা ?

চিন্তা । অতিভক্তি চোরের লক্ষণ ।

বিষমঙ্গল । এটা তোমার সম্পূর্ণ ভুল ; ভক্তিতে চোরের লক্ষণ নয়, সাধুর ; তবে একরূপ ভক্তিতেই চোরের লক্ষণ বটে !

চিন্তা । আমার ভুল, কি তোমার ভুল, মূল ধ'রে দেখলেই তার স্থল মস্ম বোঝা যায় !

বিষমঙ্গল । এখনও কি তা বুঝতে পার নাই ?

চিন্তা । বুঝতে না পারলে কি আর এমন কথা ব'লতে পারতেন ?

বিষমঙ্গল । বুঝেচ কি ?

চিন্তা । যা বুঝেছি, তাতে সম্পূর্ণ নিরাশ দেখি ।

বিষমঙ্গল । সর্বনাশ !

চিন্তা । সর্বনাশের আর বাকি কি ? তা ত অনেক দিনই হ'য়েচে !

যেটুকু বাকি ছিল, তাও আজ হ'য়ে গেল ।

বিদ্বমঙ্গল । এমন কথা ব'ল্চ যে ?

চিন্তা । অঙ্ককার যে কেটে যাচ্ছে !

বিদ্বমঙ্গল । কিসের অঙ্ককার চিন্তা ?

চিন্তা । দেখ বিদ্বমঙ্গল ! এ সংসারে বিশ্বাসের মূল্য অনেক ; অবিশ্বাস
স্বলভেই পাওয়া যায় ।

বিদ্বমঙ্গল । বিশ্বাসের মূল্য অনেক হ'লেও, ভাগ্যবানে তা বিনামূল্যেও
পেয়ে থাকে !

চিন্তা । তেমন ভাগ্য ক'জনের হয় ?

বিদ্বমঙ্গল । তোমারই যে নয়, কিসে তা জানলে ?

চিন্তা । দেখ বিদ্বমঙ্গল ! মনের কথা না ব'লে আর থাকতে পারলেম
না । আমি অবিশ্বাসিনী, কলঙ্কিনী হ'লেও, তোমাকে একান্তই
বিশ্বাস ক'রেছি । অসতী হ'য়েও, তোমাকে মন দিয়েছি, হৃদয়ও
বোধ হয় দিতে পেরেছি । তুমি পর হ'লেও, তোমাকে পতিজ্ঞানে
ভাবতে শিখেছি ! কিন্তু বল দেখি, মনের পরিবর্তে মন, প্রাণের
বিনিময়ে প্রাণ, হৃদয় নিয়ে হৃদয় দিতে তুমি কি কখন পারবে ?
বিশ্বাসেই প্রেম, প্রেমেতেই প্রাণদান । এই অবিশ্বাসিনী পর-রমণীর
এই অবিশ্বাসিনী মন, উচ্ছিষ্ট প্রাণ, অপবিত্র হৃদয়, তোমার অমূল্য
বিশ্বাসের মূল্যের কি সমান হবে ?

বিদ্বমঙ্গল । আমি কি এত অবিশ্বাসী ?

চিন্তা । শতবার তা স্বীকার ক'রতে হবে বৈ কি !

বিদ্বমঙ্গল । কি প্রমাণ পেলো ?

চিন্তা । তোমার প্রমাণ তুমিই । দেখ বিদ্বমঙ্গল ! তুমি একজনের
হৃদয়ের রাজা, আমার কাছে কেবল তোমার রাজা সাজা । একজনের
রাজ্য-ধন অপহরণ ক'রে, যখন তাকে ফাঁকি দিয়ে আসতে পেরেচ,

তখন যে আমার সর্বস্ব গ্রহণ ক'রে আমাকে ফাঁকি দিতে পারবে না, এ কথা কে অস্বীকার ক'রতে পারে বল ? যে একবার চুরি করে, সে দু'বারও চুরি ক'রতে পারে ; এ কথার আর কোন প্রমাণ দিতে হয় না। তবে চোরকে যে বিশ্বাস করে, সর্বনাশই তার পুরস্কার হয়। তাতেই ত ব'ল্ছিলাম, সর্বনাশ ত হ'য়েইচে।

বিশ্বমঙ্গল। চিন্তা ! চিন্তা ! বিশ্বমঙ্গল অবিখ্যাতী,—কেবল শান্তির কাছে। চিন্তার প্রতি অবিশ্বাস ! মনে ক'লেও যে চিন্তা-শক্তি তিরোহিত হয় !

চিন্তা। তা হ'লেও তাতে চিন্তার মন নিশ্চিন্ত নয়। যে শান্তিকে কাঁদাতে পেয়েচে, সে ত অনায়াসেই চিন্তাকে কাঁদাতে পারে ! শান্তি চাঁদের কিরণছটা, চিন্তা বিষম বিছাৎঘটা ; শান্তি প্রেম, চিন্তা হেম ; প্রেমের চেয়ে কি হেমের এত অধিক আকর্ষণ ? তুমি বল দেখি, সেই শান্তি, আর এই চিন্তাতে প্রভেদ কত !

বিশ্বমঙ্গল। বাক্যাতীত, নাহিক সন্দেহ।
 তাই ত, তাই ত চিন্তা ! শান্তি পরিহরি,
 সমাজ রাখিয়া দূরে,
 ছিন্ন করি বিবেক-বন্ধন,
 চিন্তা-সাগরেতে আসি হ'য়েচি মগন !—
 কভু বা সাঁতার দিই রূপের স্রোতেতে,
 কভু যাই ভেসে ভেসে মোহাগ-হিল্লোলে,
 কভু ডুবি, প্রেমরত্ন তুলিতে না পারি !
 কতবার ডুবি, উঠি, কতবার ভাসি ;
 দেখ চিন্তা ! দৃষ্টিশক্তি করিয়া বিকাশ,
 হৃদয় খুলিয়া দিই দেখ একবার,

চিন্তা, চিন্তা, চিন্তা বই আর ত সেখানে,
 কিছু নাই, কিছু নাই, পাবে না দেখিতে !
 দেখ, দেখ, প্রেমিকের দৃষ্টির সহায়ে,—
 চিন্তা-প্রেম-রত্ন কি নি প্রাণ-বিনিময়ে ।
 মরম-মন্দির-মাঝে হৃদয়-কোটার,
 কেমনে রেখেচি তারে, অতি সংগোপনে,
 সর্ব প্রহরী মন, সে রত্ন-ভাণ্ডারে ।
 তবে চিন্তা ! তবে চিন্তা ! এ মর্ষবেদনা,
 কেন দাও ? অবিশ্বাস প্রেমিকের নয় ।

গীত ।

ব'ল না এমন কথা দিও না মর্ষবেদনা ।
 সহে না সহে না প্রাণে, এ দারুণ বাতনা ॥
 হৃদয়-সরোজে, ও রূপ বিরাজে,
 বিমোহিত মন-প্রাণ আর কিছু চাহে না ॥
 চিন্তা সারাৎসার, প্রেমের আগার,
 ভাবি নিরস্তর এ ভবসংসারে ;—
 শাস্তি পরিহরি, চিন্তা-রূপ স্মরি,
 করি বিভাবরী ওরূপ সাধনা ।

চিন্তা । আর মর্ষবেদনা দিব না ; তবে রত্ন ব'লে আজ বা যত্ন পাচ্ছে,
 কাল তা ঝুঁটো ব'লে ধুলার গড়াগড়ি না গেলেই হ'ল ! এখন আর
 কি ব'লব, যদি কখনও মানিক পাও, আর এই রত্নের এমনি যত্ন
 রাখতে পার, তখন তোমার পরীক্ষা সাক্ষ ক'রব ; এখন যাই চল ।

[বিশ্বমঙ্গল ও চিন্তার প্রস্থান ।

তৃতীয় দৃশ্য

[গোলোক]

রাধা, বৃন্দা, বিশাখা, শ্রামা, ও ললিতা আসীনা ।

রাধা । দেখ, বৃন্দে ! বিরজার কুলে এলেই প্রাণ যেন শীতল হ'য়ে যায় ।

বৃন্দা । আজ শীতল হ'য়ে যাচ্ছে গো রাধে ! আজ শীতল হ'চ্ছে ; একদিন
কিন্তু ঐ প্রাণ জ'লে যেত !

বিশাখা । জ'লে আবার যেত কখন ?

বৃন্দা । বিশাখার বুঝি তা নাই ক স্বরণ ? আজ না হয় বিরজা প্রবাহিনী ;
কিন্তু একদিন ছিল যুবতী গোলোক-কামিনী, এম্মিই শ্রাম-সোহাগের
সোহাগিনী রাধে ! তোমারই মত এম্মি শ্রাম-সোহাগের সোহাগিনী ।
তখন যে বিরজার নাম শুন্লেও প্রাণ জ'লে যেত !

শ্রামা । তা ত যাবারই কথা ভাই ! তখন যে সে সতীন হ'ত !

ললিতা । সতীন যে সাপের বিষ, নাম শুন্লেও রিশ জন্মায় ভাই !—

হবে শুনে লাগে ব্যথা,

হওয়াই ত ভাই দূরের কথা !

সুখের ভাগও দেওয়া যায় ;

কিন্তু স্বামীর ভাগটা দেওয়া দায় ।

শ্রামা । ললিতাকে বুঝি সেই দায় পোহাতে হয় ? তাতেই এত জানাশুনা !

ললিতা । শ্রামার বুঝি তা নাই ক জানা ?—

স্বামী যার গোলোকবিহারী,

তার ত সতীন ছড়াছড়ি ।

শ্রামা । (রাধাকে লক্ষ্য করিয়া) তাহ'লেই ত সঙ্কট প্যারি ! এখন হ'তে
ললিতার সঙ্গে আমার সতীন-আড়ি ;—আমরা থাকি মাঝে পড়ি,
কঁকতালে যদি একটা ভাগ নিতে পারি ।

রাধা । তাতে কি ভয় করি কিশোরী ? রাধা আর সতীন-ছাড়া কবে
শ্রামা ? গোলোকে বিরজা, গোকুলে চন্দ্রা ; রাধার কঁাদা চিরদিনই ।

বৃন্দা । কথাটা সত্য ব'লেই মানি ; কিন্তু তবে একটা কথা এই জানি ;
রাধার কষ্ট চিরদিনই, এবং রাধার কৃষ্ণ চিরদিনই । রাধার স্মৃথে সতীন
বাধা, কিন্তু রাধার প্রেমেই সতীন বাধা ।

রাধা । সেটা তোর মনের ধাঁধা !

বৃন্দা । তাই না হয় মানে বৃন্দা ; কিন্তু রাধাকৃষ্ণের মিলন সदा, সেটাও কি
কোন মনের ধাঁধা ? শ্রামের বামেই রাধা শোভে, বিরজা আর দাঁড়াল
কবে ? বলি, শ্রীমতি ! শ্রীপতিই ত সবাই বলে, বিরজা-পতি আর
সে কোন্ কালে ?

রাধা । সেই যা স্মৃথ এ কপালে । ভক্ত-প্রেমে নিমগন, রাধার পাশে
কতক্ষণ ?

বৃন্দা । যতক্ষণ ততক্ষণই, মহাঅষ্টমীর মহাক্ষণ ! যোগী-ঋষি সেই
ধ্যানেতেই নিমগন, ইন্দ্র-চন্দ্র না পার দরশন । বলি, কিশোরি !
যুগল ছাড়ি, ভক্তের গোল একা মিটাতে পারে কি শ্রীহরি ?

শ্রামা । মরি, মরি গোলোকেখরি ! এখন মনে নাই আর ব্রজপুরী ?—
যেদিন আয়ানের চোখে ভেঙ্কি দিয়ে, শ্রাম দাঁড়াল শ্রামা হ'রে । তুমি
তার উপাসিকা শ্রীরাধিকা । সেটা কি চন্দ্রাবলীর দারে, না রাধুতে
তোমার আয়ানের ভরে ?

রাধা । সে কথা আর কেন সখি ! ব্রজের কথা মনে হ'লে এখনও চোখে
আঁধার দেখি ।

বৃন্দা । আঁধার দেখবার কারণই বা কি ? ব্রজে রাধার সুখের বাকী ছিল কবে বিধুমুখি !

রাধা । এমন কথা বলা গোর ত মানায় না সখি ! ব্রজে রাধার রোদন ছিল, বেদন ছিল, তিরস্কার-বাণী শ্রবণ ছিল, সুখের দর্শন আর কবে হ'ল ? গোলোকের এই নারায়ণী, বৃন্দাবনে কলঙ্কিনী ; বৃন্দে বৃষ্টি, সে কথা আজ ভুলে গেল ?

বৃন্দা । করা কাজ কে ভোলে বল ? রাধাকুঞ্জে রাইমানিনী, মানের দারে যায় ষামিনী ; রাই রাধ, রাই রাধ ব'লে, ধড়াচূড়া ধরায় ফেলে ; গোলোকের এই নারায়ণ, রাধার পায়ে করে রোদন ! রাধে ! বৃন্দের সে কথাটাও আছে স্মরণ ? “দেহি পদপন্নব মুদারং” বল দেখি, কার প্রেমের দারে এ কথাটা হ'ল কখন ?

শ্রীমতি । যেমনকে তেমন ! সুখের মতন ব'লেচিস্ বৃন্দে ! রাধার দারে গোলোক ছাড়ি, ব্রজে গোপাল বংশীধারী ; বিশ্বরাজা রাধালসাজে, গো-ধন ফিরায় গোষ্ঠের মাঝে ; বিশ্বহারী মধুসূদন, শিরে বাধা করে ধারণ ! শ্রীমতি ! বল না এখন, কার কারণ এত দায় পোহাতে হ'ল ?

বৃন্দে । তাতেই কোন্ মন উঠেছিল ? সকলই ত আমি জানি, মান ভাঙাতে বিদেশিনী, বিনোদিনী কত সাজে না সেজেছিল হরি !

রাধা । কিন্তু শত বর্ষের নয়নবারি, সহচরি ! তাও উচিঁত করা স্মরণ ।

বৃন্দা । তার পরটা বল এখন ! প্রভাসেতে পুনর্মিলন, পূর্ণসুখের নিদর্শন ; কেমন মধুর আশ্বাদন ? শ্রীমতি ! মেঘ উঠেছিল কেবল রোদ মিষ্টি হবে ব'লে ।

কৃষ্ণের প্রবেশ।

কৃষ্ণ। সেই কথাই ত সবাই বলে ; কেবল বলে না তোমাদের এই বিনো-
দিনী। বিচ্ছেদ-অমাবস্তার নিশা না থাকলে কি প্রেম-পূর্ণিমার
পূর্ণচন্দ্র কিরণ-ছটার এত ঘটা দেখতে পেতে ?

বৃন্দা। এতক্ষণ ছিলে কোথা ? তোমার জন্তই ত এত কথা !

কৃষ্ণ। তুমিই জান ত যত ব্যথা ? সখি, সেই পায়ে ধরার কাঁদার দিন,
তোমরাই ত তার কেবল সাক্ষী, তবে আমার দিকে আর কেন হবে
না বল দেখি ?

শ্রামা। কিন্তু কমল-আঁধি ! এখন রাধার আছে বাকী ; পায়ে ধ'রেচ,
আবার বুঝি ধ'রতে হয় বা দেখি !

কৃষ্ণ। কেন সখি ! অপরাধ ?

শ্রামা। অপরাধ ? অপরাধ রাধার-বিবাদ ! আমাদেরও মনের সাধ
প্রমাদ রাধা ত ভাল নয়, তাতেই ব'লুচি রসময় !—

বাঁধ দেখি মনচোরা !

তেমনি ক'রে ধড়াচুড়া,

গলে দিই গুঞ্জবেড়া,

ব্রজের ভাবে সাজ হরি !

রাই থাকবে মানের ছলে ;

তুমি ব'সে ধরাতলে—

রাই রাখ, রাই রাখ র'লে—

সাধ তার চরণে ধরি !

বংশীধারি ! আজ ব্রজের খেলা খেলিব,

প্রেমের মেলা দেখিব,

তেমনি বাসর সাজাব,
 কুঞ্জে কুসুম তুলিয়ে !
 আমরা যত সহচরী,
 হব' রাধার দ্বারের দ্বারী,
 যাও, যাও এস না হরি,
 ব'লে দিব ফিরিয়ে ॥

এখন এই সাধটা মিটায়ে, আপনার সাধ মিটাতে পাবে ।
 গীত ।

নব-নটবর, সুশ্রামসুন্দর,
 ধর ব্রজের ভাব বংশীধর, একবার শ্রীহরি ।
 আজ খেলুব হে ব্রজের খেলা, হেরুব শ্রাম-শ্রোমের মেলা,
 বাসর সাজাব চিকণকামা, মিলে যত সহচরী ॥
 ওহে গোলোকরাজ এ সাজ ত্যজে, সাজ হে রাধাল-সাজে,
 গোকুলে সাজিতে যেমন, তেমনি বাধ পীতধড়া,
 শিরে মোহনচূড়া, গলায় গুঞ্জবেড়া, মুনিজন-মনোহরা :
 হ'য়ে ত্রিভঙ্গ, বামে হেলে, দাঁড়াইয়ে কদমতলে,
 (বাঁকাসথা তা কি ভুলেছ হে)

জয় রাধা শ্রীরাধা ব'লে, বাজাও সাধা বাশরী ॥
 ঢাকি বসনে বদনখানি, বসিবে বিনোদিনী, মানেতে হ'য়ে মাসিনী ;
 আমরা হে সহচরী, মান-সাগরের কাণ্ডারী,
 যদি বুঝতে পারি সময় বুঝে দিব পাড়ি ;
 গোলোক-শশি হে ধূলায় প'ড়ে ভাসি ছ'নয়ন-নীরে,
 (রাধাকুঞ্জে যেমন করিতে হে)

রাই রাধ, রাই রাধ ব'লে, সাধ রাধার পারে ধরি ॥

কৃষ্ণ। হাঁ শ্রামা ! মনে আবার সহসা ব্রজের ভাবে উদয় হ'ল কেন ?

শ্রামা। শ্রাম হে ! ব্রজের ভাব বড়ই মধুর ভাব ; তাতে বিচ্ছেদ আছে, মিলন আছে, হাসি আছে, কান্না আছে ; হাসি কান্না নৈলে কি, ভাবের মধুরত্ব বোঝা যায় ? গোলোকের এই একটানা ভাবে আর মন বসে না ।

ললিতা। শ্রামার যে বড় নূতন ভাবের কথা শুনিচি ! সুখে মন বসে না, মিলনে সুখ হয় না, শ্রাম হে ! শ্রামার সুখের উপায় কর ।

বিশাখা। তা ত নয়, ধন্বন্তরীকে ডেকে আনাও ; শ্রামা বুঝি বা পাগল হয় !

শ্রামা। এ গোলোকের পাগল কি ধন্বন্তরির ঔষধে ভাল হয় ? তার ত পূঁজি নিদান বই নয় ! এ রোগের ঔষধি-বিধি নিদানেতে আছে কৈ ? তা'হলে সই ! এই রোগেতে পাগল হ'য়ে, নিদানকর্ত্তা ঈশান কেন শ্মশানেতে বাস ক'রুচে ?

বিশাখা। (কৃষ্ণকে লক্ষ্য করিয়া) তবে শ্রামার উপায় ?

শ্রামা। শ্রামার উপায় শ্রামের পায় । এখান হ'তেই পাগল হয়, আবার এখানেতেই পাগল সেরে যায় ! যেখানেতে রোগ, সেইখানেতেই তার ঔষধ ; পাগল না হ'লে এ কথাটাও বোঝা যায় । দেখ বিশাখা ! এখন আসল কথা বলি আর ; যারা প্রেমিক নয়, তারাই বিচ্ছেদে ডরায় ; বিনা বিচ্ছেদে কি প্রেমে কখনও পূর্ণত্ব জন্মায় ?

কৃষ্ণ। আমি তবে শ্রামার দিকে হই ।

বৃন্দা। শ্রাম আর শ্রামার দিক্ ছাড়া কৈ ! তাতেই ত বৃন্দাবনে বাণী ফেলে অসি ধ'রে, এলোকেশী শ্রামা হ'য়ে, জগৎবাসীকে দেখিয়ে-ছিলে,—শ্রাম আর অল্প নয় শ্রামা বৈ ।

নারদের প্রবেশ

নারদ । মরি, মরি, একি হেরি ! ভাবের সমাবেশ বলিহারি ! এ যে
 প্রেমের কোলে শান্তি, শান্তির পাশে ভক্তি, প্রীতি, শ্রদ্ধা, দয়া একা-
 ধারে বিরাজিতা ! চাঁদকে ল'য়ে চাঁদের খেলা, প্রেমের মেলা, রূপের
 মেলা ; মন রে ! তোর ত চিরদিনের পিপাসার জালা, এই বেলা
 সকল জালা মিটিয়ে লও । এ সময় যদি চ'লে যায়, তাহ'লে অসময়
 আর কখনও যাবে না ।

কৃষ্ণ । এস নারদ ! আস্তে আস্তে আবার ভাব্চ কি ?

নারদ । (অগ্রবর্তী হইয়া) গোলোক-শশী আজ যোলকলার পরিপূর্ণ, তাই
 দেখ্চি । দেখতে দেখতে ভাব-সাগরে ভেসে গেচি , কিন্তু সে সার-
 রের কুল যে কোথায় পাব, তাই ভেবে আকুল হ'য়েচি !

বৃন্দা । এখন ত হাবুডুবু খেতে থাক, তার পরেতে কুলের কথা ভেবে
 দেখ' ।

তা ত নয় বৃন্দে ! তা ত নয় ; কার সনে ক'রবে ভাবন,
 তাই মনে মনে ঠিক ক'রে আস্চেন ।

নারদ । কেন ? আমি কি তোমাদের ভাগের ভাগী যে, ঝগড়া ক'রতেই
 এসে থাকি ?

বিশাখা । হ'তে চাও, কিন্তু পার কই ? এ বহুমূল্য কেন ধন ; ভাগ
 নিতে হ'লেই, সমান মূল্য প্রদান ক'রতে হবে ।

নারদ । মূল্যের পরিমাণটা ব'লে দাও তবে ; চেষ্টা ক'রলে যদি যোগাড় হয় ।

বিশাখা । তোমার দ্বারা যোগাড় হবার নয় ; তা'হলে কি আর বেগার
 খেটে, ব্রহ্মাণ্ডটা ঘুরে বেড়াও ?

নারদ । বেগার খেটে বেড়াই ব'লে কি সঞ্চয় কিছুই রাখি না ?

বিশাখা । কই, তা ত কিছুই দেখতে পাই না ! (অনাস্তিকে বৃন্দার

প্রতি) বৃন্দে! আজ ভাল ক'রে নারদকে একবার বুঝে নাও দেখি?

বৃন্দা। (জনান্তিকে) তার আর ভাবনা কি? (নারদের প্রতি) ঠাকুর! তোমায় ঐ পৈতের স্মৃতি একগাছি আমাদের দাও না!

নারদ। কি কথার উপর, কি কথা আনলে আবার দেখ না! কৈলাসেতে ভূতের পাগল, এখানে যে কিসের পাগল, তা বলতে পারি না। বিশ্ব-পাগল! তোমরা এ সব পাগল পুষে রাখ কেবল নারদের জন্য? (বৃন্দার প্রতি) কেন, পৈতের স্মৃতির আবার প্রয়োজন কি হ'ল?

বৃন্দা। দেখ ঠাকুর! ইন্দ্রের সেই ঐরাবত হাতীটে দিন দিন গোলোকে এসে, বড়ই উৎপাত করে; ঐ স্মৃতি দিয়ে তাকে এইবার বেঁধে রাখুব! কেন, এতে ত বেশ বাঁধা হবে!

নারদ। আমাদের পাগল ভেবেই বুঝি এ কথাটা বলা হ'ল?

বৃন্দা। কেন, পাগলের কথা আবার কি বলা গেল?

নারদ। এর চেয়ে আর পাগলের কথা কি হয় বল? স্মৃতির কি কখন হাতী বাঁধা যায়?

বৃন্দা। যায় না? সেকি ঠাকুর! একগাছা স্মৃতি দিয়ে, তুমি একশ আটটা হাতী বেঁধে রেখেচ, আর একটা বাঁধা যায় না?

নারদ। তোমাদের কথার ভাব বোঝা দায়।

বৃন্দা। হার, হার, ঠাকুর! হরিনামের মালা পরা তোমার শোভা পায় না। যার ভাব বোঝা না, তেমন ভূতের বোঝা ব'লে মরায়, কেবল কৰ্মভোগ বই আর কিছুই হয় না।

নারদ। কিন্তু উপস্থিত এ কৰ্মভোগটা ততোধিক ব'লেই মনে হয়!

বৃন্দা। আচ্ছা, বল দেখি ঠাকুর! কৃষ্ণের কটা নাম?

নারদ । কৃষ্ণনাম অসংখ্য ।

বৃন্দা । কিন্তু সংসারে প্রচার কটা ?

নারদ । একশত আটটা !

বৃন্দা । আচ্ছা, এখন বল তবে, কৃষ্ণ বড় না কৃষ্ণনাম বড় ?

নারদ । কোন্টা বড় বলা যায় না ।

বৃন্দা । ভোলানাথের কাছে যাওয়া আসাটা কিছু বেশী বেশী কি না, তাতেই ত সকল কথা ভুলে যাও ! কেন, দ্বারকার সত্যভামার সেই পুণ্যক-ব্রতের কথা কি মনে পড়ে না ? তুমিই ত তখন কৃষ্ণের সঙ্গে কৃষ্ণনামের ওজন ক'রে দেখেছিলে ! তখন কি দেখতে পেয়েছিলে ?

নারদ । কৃষ্ণ চেয়ে কৃষ্ণনামই বড় দেখেছিলাম ; কারণ, কৃষ্ণনামই ভারি হ'য়েছিল ।

বৃন্দা । তবে ঠাকুর ! এইবারে বুঝে দেখ না ; কৃষ্ণ চেয়ে একটা মাত্র কৃষ্ণনাম যে এত বড়, তেমন নাম একশ আটটা একত্রে ন'য়ে, একমাত্র বিশ্বাসের স্মৃতোন্ন বেঁধে, তবে হরিনামের মালা হয় ; যখন একগাছা স্মৃতোন্ন একশ আটটা এমন হাতী বাঁধা যায়, তখন আর একটা সামান্য হাতী বাঁধা যায় না ? এই গোলোকধামে ঐ সর্কশক্তিমানের সম্মুখে যখন এতটুকু বিশ্বাস ক'রতে পার না, তখন আর নামের মালা গলার রেখেচ কি ক'রতে ? ও ত কেবল তুলসীকাঠের বোঝা বওয়া হ'চ্ছে মাত্র !

বিশাখা । ছি ছি নারদ ! এমন পুঁজি তোমার নাই ! তুমি আবার সমান মূল্য পদান ক'রে, আমাদের ধনের ভাগ নেবে ? এখন বুঝলে ত, বিশ্বাস হ'তেই ভক্তির উদয়, ভক্তি হ'তেই প্রেম, আর সেই প্রেম দিয়ে কেনা আমাদের এই প্রেমময় ; ধনের ভাগ সামান্তেতে পাবার নয় !

গীত

ছি ছি ঋষিরাজ হে, এ কৰ্মভোগ তোমার সাজে না ।
 মিছে ভূতের বোঝা বেড়াও বোয়ে, কোন ধার তার ধার না ॥
 কোন বলেতে হ'য়ে বলী, নিতে আস বনমালী,
 নামের মালা নামাবলী কেন বওয়া বল না ॥
 বিশ্বাসে ভক্তির উদয়, ভক্তিতে হয় প্রেমোদয়,
 প্রেমে কেনা সেই প্রেমময়, ওহে তা কি তুমি জান না ॥

নারদ । বিশাখা ! আর না, রক্ষা কর ; নারদের খুব শিকাই হ'য়েচে !

(কৃষ্ণের প্রতি) হাঁ হে শ্রীবৎসলাঞ্ছন ! নারদের এ লাঞ্ছনাটা আজ
 কিসের জন্তে হ'য়ে গেল ?

কৃষ্ণ । মনে কি কিছু অহকার হ'য়েছিল ?

নারদ । হ'য়েছিল বোধ হয় ; ভোলানাথের সঙ্গে ভ্রমশুলে ভ্রমণে গিয়ে-
 ছিলাম; একস্থানে একজন বেশাসক্ত উদ্ভ্রান্ত যুবককে দর্শন ক'রে,
 বৃষধ্বজকে জিজ্ঞাসা ক'রলুম, হাঁ হে ত্রিকালদর্শি ! এই কদাচারী নর-
 কের কীটের কি কখনও উদ্ধারসাধন হবে ?

কৃষ্ণ । উমাপতি তাতে কি উত্তর নিলেন ?

নারদ । আমার সেই কথায় শঙ্কর মূঢ় হেসে ব'ললেন, নারদ ! সেটা বড়
 অসম্ভব কথা নয় ; এই যুবক বেশাসক্ত হ'লেও ধেরূপ এর মনের
 ঐকান্তিক ভাব, এই ভাব কার্যবশে যদি কখনও সেই ভাবময়ের
 ভাবের ভাবগ্রাহী হয়, তখন দেখবে, এই আসক্তি প্রেমের রূপ
 ধারণ ক'রেচে এবং এই নরকের কীটই স্বর্গের দেবতারূপে পরিণত
 হ'য়েচে !

কৃষ্ণ । তার পর ?

নারদ । শঙ্করের সেই কথায় আমি নিরুত্তরই রইলেন ; কারণ কথাটা

তখন পাগলের কথা ব'লে মনে হ'য়েছিল !

কৃষ্ণ । এটা আর পাগলের কথা কিরূপে হ'ল নারদ ? জ্ঞানময় শঙ্করেরই উপযুক্ত কথা ।

নারদ । “অহং” ভাব প্রবল হওয়াতেই বোধ হয়, তখন গঙ্গাধরকে পাগল ব'লে জ্ঞান হয়েছিল ।

কৃষ্ণ । কি ভেবেছিলে ?

নারদ । ভেবেছিলাম, আমি কঠোর সাধনা ক'রেও যে প্রেমের বিন্দুমাত্র ভাবগ্রহণে সমর্থ হ'তে পারি নাই ; এই মদমত্ত ভ্রাস্ত-যুবক, সেই অপ্রেমের প্রেমের ভাবগ্রাহী হ'য়ে, আত্মোদ্ধার সাধন ক'রবে ? এইরূপ অধঃপতিত পাষাণ আবার হরিপ্রেমের অধিকারী হ'য়ে, পরমপদ প্রাপ্ত হবে ? তা হ'লে আর আমি যোগ-সাধন ক'র'চি কিসের জন্ত ? এই-রূপ কদাচারে জীবনযাপন করাই ত ভাল ছিল ?

কৃষ্ণ । নারদ ! সাধনার সঙ্গে প্রেমের সম্বন্ধ কিছই নাই । বিশ্বাসেই ভক্তি, ভক্তিতেই প্রেম, প্রেমই পতিতপাবন ;—পতিতের উদ্ধারসাধনই প্রেমের ধর্ম । যোগসাধনার অনেক সময় কর্মভোগই হ'য়ে থাকে, প্রেম-যোগ বিনা সাধনাতেও হ'তে পারে !

নারদ । তা না হয় বুঝলাম প্রেমময় ! কিন্তু যে পাপিষ্ঠ পত্নীপ্রেমে জলাঞ্জলি দিয়ে, স্বজন-সৌহৃদ্য বিস্মৃত হয়ে, সর্বস্ব সুদূরে ফেলে, পররমণীর রূপের কুহকে বিমুগ্ধ হ'য়েচে, তার সঙ্গেই বা প্রেমের সম্বন্ধ কি ?

কৃষ্ণ । আছে বই কি নারদ ! যে ব্যক্তি একজনের জন্ত সর্বস্ব ত্যাগ ক'রতে পারে, সে মহাপাপিষ্ঠ হ'লেও তার মনের বল কত বল দেখি ? যে পত্নী ভুলেচে, স্বজন ভুলেচে, সংসার ভুলেচে, একজনকে জীবন, ধন, সর্বস্ব, অর্পণ ক'রেচে, সে যদি বিপদের পথিক না হ'ত, তা হ'লে

আজ তাকে মহাযোগী ব'লতে কিছুতেই কুণ্ঠিত হ'তাম না ! কারণ, আমাতে সর্বস্ব সংযোগের নামই যোগ ; এবং এরূপ সংযোগ-সাধনে যে সমর্থ হয়, সেই ত সংযমী মহাযোগী । নারদ ! সেও ত এক-জনের প্রতি মনঃসংযোগ অচল, অটলভাবে স্থির রেখেচে ! সেই মনঃ-সংযোগ যদি কখন আমার স্বরূপধানে নিযুক্ত ক'রতে পারে, তা হ'লে তার প্রেমোদয় সহজেই হবে বৎস ! কারণ, যেখানে মনের বল, সেইখানেই বিশ্বাস,—কথা দুটো একই বোধ হয় ; যেখানে বিশ্বাস, সেইখানে ভক্তি, যেখানে ভক্তি, সেইখানেই প্রেম, প্রেমেতেই মহামুক্তির পরমানন্দ !

বৃন্দা । (কৃষ্ণের প্রতি) কথা ত অনেকই হ'ল, কিন্তু মূল-কথাটা হ'চ্ছে কাকে নিয়ে ?

কৃষ্ণ । নারদ বোধ হয়, বিশাখাপুরের বিল্বমঙ্গলের কথাই ব'ল্চে ! (নারদের প্রতি) কিন্তু বৎস ! অচিরেই হয় ত দেখতে পাবে, সেই অধঃপতিত বিল্বমঙ্গলই একদিন, কেবলমাত্র মনের বলেই প্রেমরাজ্য অধিকার ক'রে ব'সবে ।

নারদ । প্রেমময় ! তোমার কৃপাতে সবই হয় ।

কৃষ্ণ । যে কথা এখন মুখে ব'ল্চ নারদ ! কণপূর্বে তোমার মনে কিন্তু সে ছিল না ! সেইজন্যই ত আজ বিশাখার কাছে এরূপভাবে অপ্রতিভ হ'লে । আমার কৃপায় যখন সব হয়,—আমার কৃপায় যখন ঋশান-মাঝে স্বর্গের শোভাও অসম্ভব নয় ; তখন বৎস ! আমার এই গোলোকরাজ্যে কি একগাছি সূক্ষ্ম সূতার একটা বৃহৎ হস্তী বাঁধা যেতে পারে না ? নারদ রে ! যে বিশ্বাস হারায়, সে সেই সঙ্গে সবই হারায় ! বিশ্বাস বিনা কেউ প্রেমের অধিকারী হ'তে পারে না ; প্রেম বিনা আমাকেও কেউ কখন পার না !

নারদ । তবে আজ একটা কথা জেনে রাখি । আচ্ছা, প্রেমময় ! জ্ঞান

বা কর্ম কি প্রেম-রাজ্যের পথ প্রদর্শন ক'রতে পারে না ?

কৃষ্ণ । অবশ্য পারে ; তাতে কোন সন্দেহই নাই । কিন্তু বৎস ! জ্ঞান-

সাধনই বল, আর কর্ম-সাধনই, বল, বিশ্বাসই সকলের মূলাধার ।

যদি এ কথায় বিশ্বাস না হয়, তবে ভাল ক'রে বুঝিয়ে দিচ্ছি । আচ্ছা,

বল দেখি, কর্মের সাধন কাকে বলা যায় ?

নারদ । সর্বকর্মময় তুমি, তোমার উদ্দেশে সর্বকর্ম আচরণের নামই

কর্মসাধন ।

কৃষ্ণ । জ্ঞান-সাধন কাকে বলে ?

নারদ । সর্বজ্ঞানময় তুমি, তোমাকে চিন্ময় সচ্চিদানন্দস্বরূপ আরাধনার

নামই জ্ঞান-সাধন ।

কৃষ্ণ । এখন তবে বল দেখি বৎস ! আমাকে যে সর্বকর্মময় ব'লে

বিশ্বাস ক'রতে পারে না, সে কি কখনও আমার উদ্দেশে সর্বকর্মের

আচরণ ক'রতে সমর্থ হয় ? আমাকে যার সর্বজ্ঞানময় ব'লে বিশ্বাস

হয় না, সে কি কখন আমাকে চিন্ময় সচ্চিদানন্দ-জ্ঞানে আমার স্বরূপ

অবধারণা ক'রতে পারে ? নারদ রে ! কর্মই বল আর ধর্মই বল,

জ্ঞানই বল আর ধ্যানই বল, বিশ্বাসই সকলের মূল । সংসার-বন্ধ

ভূমিতে অশান্তি-আতপ-তাপে শীতল হ'তে, প্রেমই জীবের একমাত্র

আশ্রয়-তরু । বিশ্বাস সেই তরুর মূল, কর্ম তার কাণ্ড, জ্ঞান তার

শাখা, ভক্তি তার পল্লব, আর মুক্তি তার সুমিষ্ট ফল, সে ফলের

উপভোগই পরমানন্দ লাভ । একবার সে তরুর মূলে আসতে

পারলে, কাউকে কখন ফললাভে নিষ্ফল হ'তে হয় না ।

নারদ । মোক্ষদাতা ! নারদের আজ মহাশিক্ষা লাভ হ'রুচে ।

কৃষ্ণ । নারদ রে ! কানে শোনা অপেক্ষা, চোখে দেখাটা আরও অধিকতর

শিক্ষাপ্রদ । অচিরেই ধরাতলে একসূত্রে, একক্ষেত্রে, সকল সাধনার
 সিদ্ধিলাভ একসঙ্গেই দেখতে পাবে । দেখবে, বিশ্বমঙ্গলের মনের বল,
 শান্তির ভক্তি-বল, চিন্তার জ্ঞান-বল, আর কল্যাণপুরের সেই সুকর্মা-
 নামক বণিকের কর্মের বল, সকলেই আপন আপন বলের সাহায্যে,
 প্রেম-রাজ্যে বিচরণ করবে । প্রেমের স্পর্শে যদি পতিতের উদ্ধারই
 না হবে, তাহলে আর আমার প্রেমময় পতিত-পাবননাম কিসের অর্থ ?
 নারদ । চিন্তামণি ! নারদ যে অন্ধ ! স্পর্শমণি চিন্বে কেমন করে ?
 কৃষ্ণ । চল বৎস ! সকলে এখন আমরা শান্তিকুঞ্জে যাই চল । সেখানে
 তোমাকে প্রেম-তত্ত্বের মহা-রহস্য ভাগ করে বুঝিয়ে বলব ।

[সকলের প্রস্থান ।

—

চতুর্থ দৃশ্য

[রূপনগর]

শান্তি, শোভা ও চিন্তা আসীনা

চিন্তা। যারা নিতান্ত বেষ্টাসক্ত, তারাও যে বেষ্ঠাকে বিশ্বাস করে না,

এ কথা আগি বেশ বুঝি।

শান্তি। তার কারণ কি ভগ্নি ?

চিন্তা। কারণ, যারা অজ্ঞানতাবশতঃ পর-স্ত্রীতে আসক্ত হয়, তাদের এ জ্ঞানটা নিশ্চয় থাকে যে, আজ যে রমণী ধর্ম, কর্ম, লোক-ভয়, সমাজ-ভয় বিসর্জন দিয়ে, একজনকে রূপ-যৌবন বিক্রয় ক'রতে পেরেচে, সে কাল আবার তাকে ত্যাগ ক'রে, সেই রূপ, সেই যৌবন অন্য আর একজনকে বিক্রয় ক'রতে পারে। বেচাকেনার কারবারে যেখানে মূল্য বেশী, সেইখানেই আকর্ষণ বেশী। সেই জন্তই কুল-রমণী কুলটা হ'লে, সংসারে কেউ তাকে বিশ্বাস করে না।

শোভা। আচ্ছা, তোমাদের এই বেচাকেনার কারবারে লাভ কি পাও,

তা ব'লতে পার ?

চিন্তা। লাভের মধ্যে মূলধন পর্য্যন্ত উড়ে যায় ; এই লাভই ত দেখতে পাই।

শোভা। লোকে ব্যবসা করে উপার্জনের জন্ত ; কিন্তু যে ব্যবসায় মূলধন পর্য্যন্ত বিসর্জন হ'রে যায়, তেমন ব্যবসা করার ফল ?

চিন্তা। ফল তার নগ্ননঙ্গল, নিদাক্রণ অনুতাপ-অনল ! কারণ, সংসারে এমন পাষণী কেউ নাই, যাকে নিজকৃত দুষ্কর্মের জন্ত একদিন

না একদিন, নিৰ্জনে ব'সে নয়ন-জল নিষ্ক্ষেপ ক'রতে হয় । রূপের মোহ, ধনের মোহ, কু-আশার মোহিনী ছলনা, রক্তের প্রবল উত্তেজনা, কিছুদিন থাকে বটে ; কিন্তু একদিন এমন দিন আসে, যেদিন রূপের গরবিণী রূপের আদর করে না, ধনের ভিখারিণী ধনের দিকে তাকায় না, কুপ্রবৃত্তির ক্রীত-দাসী প্রবৃত্তির তাড়নায় ভয় করে না,—ইহকালের অসার-মুখে মন আর তার মজে না । তখন সে পরকালের দিকে চায়, মুগ্ধ মন তার শান্তিপথে আপনি ধায়, তখন সে নিজ-পাপের প্রায়শ্চিত্ত খোঁজে, সে যে মহাপাপিনী, এ কথা সে তখন সম্পূর্ণভাবেই বোঝে ।

গীত ।

কে না জানে হয়, এমন দিন না চিরদিন হবে ।

হইবে রে সব একাকার, যখন মায়ার বিকার কেটে যাবে ॥

কু-আশার কুহক-ছলে, কুসঙ্গে কুরঙ্গে ভুলে,

থাকে সকলে ;—

মোহনদে হয় গো মগন, ভাবে না ভাবে না কখন,

মরি মরি :—

ভাবে চিরদিন সমান যাবে, এ দিনের অন্ত না হবে ॥

পূর্ণ হবে পাপের লীলা, সঙ্গ হবে ভবের খেলা,

এ মোহ-মেলা ;—

সাধের বাসা ভেঙ্গে যাবে, রবিস্মৃত দেখা দিবে,

মরি মরি ;—

তখন স্মরণ হ'য়ে সকল খেলা,

কেবল মনাগুনে জ'লতে হবে ॥

শোভা। আচ্ছা, দিদি! আর একটা কথা জিজ্ঞাসা করি। তুমিই ত
... এখনি ব'ললে, আমাদের রূপ-যৌবনের আকর্ষণে, যারা আমাদের প্রতি
আসক্ত, তারাও আমাদেরকে বিশ্বাস করে না; কিন্তু বল দেখি,
তোমাদের রূপ-যৌবন যাদের মনকে আকর্ষণ ক'রে, তোমরা কি
তাদিগে বিশ্বাস কর?

চিন্তা। বোধ হয়, তা ক'রতে পারি না!

শোভা। কেন পার না?

চিন্তা। যারা আপনার স্ত্রীকে ত্যাগ ক'রে, অন্য স্ত্রীতে আসক্ত হ'তে
পেরেচে, তারা যে অন্যায়সে আবার তাকে ত্যাগ ক'রে, অন্য আর
একজনে অনুরক্ত হ'তে পারে, এ কথা কুলটামাত্রই জানে।
বেচাকেনার কারবারে যেখানে মূল্য দিয়ে জিনিস কিনতে হয়, সেখান
হ'তে অন্য স্থানে যদি অল্পমূল্যে ভাল জিনিস পাওয়া যায়, তবে যে
কিনবে, কেননা সে অন্য স্থানে যাবে, এ কথা কোন্ ব্যবসায়ী আর না
বোঝে? পর-স্ত্রীর কাছে কেউ কখন প্রাণ দিয়ে প্রেম কিনতে আসে
না; হেম দিয়ে আসক্তির পরিতৃপ্তিই ক'রতে আসে। হেমে কখন
প্রেমের মূল্য হ'তে পারে না; প্রেমের মূল্য প্রাণ, আর স্থানও
অন্তরে;—পর-স্ত্রীর কাছে নয়।

শোভা। আচ্ছা, তুমি যাকে ভালবাস, তাকে বিশ্বাস কর ত?

চিন্তা। তাই বা কেমন ক'রে ব'লতে পারি?

শোভা। কেন?

চিন্তা। আমিও চোর, সেও চোর; চোর কি কখন চোরকে বিশ্বাস করে?

বিদ্বমঙ্গল আমার ভালবাসে, না আমার রূপ-যৌবন ভালবাসে, এই
কথাই যখন ঠিক ক'রতে পারি না, তখন তাকে বিশ্বাস ক'রতে
পারি কেমন ক'রে বল?

শোভা । তাহ'লে তোমাদের অবিখ্যাসের ঘরকন্না ?

চিন্তা । তার আর কথা কি ! আমি যেমন একজনকে ফাঁকি দিয়ে এসেছি, সেও ত তেমনি একজনকে ফাঁকি দিয়ে এসেছে । এখন সে আমাকে ফাঁকি দেয়, কি আমি তাকে ফাঁকি দিই, এই ভাবনা নিয়েই দিবানিশি থাকি ।

শোভা । তবে তুমি তাকে প্রাণ দিতে পার নাই ?

চিন্তা । তার প্রাণে আমার অধিকারও নাই ।

শোভা । তোমার অধিকার নাই ত, কার আছে ?

চিন্তা । একদিন বিশ্বমঙ্গল যার ছিল, আবার একদিন যার হবে, প্রাণের অধিকার তারই আছে ; আমার অধিকার মনে, মনে স্থান পেলেই আমার পক্ষে যথেষ্ট হয় ।

শান্তি । ভয়ি ! কৃষ্ণ যেন তোমার বাক্য সফল করেন !

শোভা । তা হ'লেই আমাদের পক্ষেও যথেষ্ট হয় । আমরা তা হ'লেই বুঝতে পারি যে, আমাদের মহৌষধির মহাশুণ ধ'রেচে ।

চিন্তা । যোগি ! তুমি মহাজ্ঞানী যোগী হ'লেও এখনও বালক ! তাতেই আজ চিন্তাকে এমন কথা ব'ল্চ । তোমাদের ঔষধের শুণে বিশ্বমঙ্গল চিরদিনের তরে, চিন্তার বশীভূত থাকবে ; চিন্তা এত পাগল নয় যে, সে চিন্তা চিন্তার মনে কণেকের ক্ষণও স্থান পেয়েচে ; এবং সে ক্ষণও চিন্তা তোমাঙ্গিগে এত আদর ক'রে এখানে স্থান দেয় নাই ! কখনও কখনও ইহকালের চিন্তা, কখনও পরকালের চিন্তা ; চিন্তার নিদাক্ষণ চিন্তা নিরন্তর যদি তোমাদের সংসঙ্গবাসে,—যদি তোমাদের সংকথা-প্রসঙ্গে, চিন্তার সে চিন্তার কতকও উপশম হয়, এই চিন্তাতেই চিন্তা তোমাঙ্গিগকে আশ্রয় দিয়ে, তোমাদের আশ্রয় গ্রহণ ক'রেচে ! বালক ! ঔষধির শুণ রোগনাশ, ঔষধিতে কখনও রোগের বৃদ্ধি করে, প্রাণনাশ

করে না ; এবং কারও সর্বনাশের জগৎ বিধাতা ঔষধের সৃষ্টি করেন
নাই ! কোন ঔষধের গুণে বিশ্বমঙ্গল যদি চিরদিনের জগৎ চিন্তার
বশীভূত হয় ; যদি সতীসাক্ষীর শিরোমণি, অসতী বারাদনার শিরঃ-
শোভা পায়, তাহলে জানুব, জ্ঞানের অনন্ত আকর ত্রায়ের অসীম
সাগর, ধর্মের নিরন্তর আধার সেই বিধাতার দ্বারা এ সংসারের সৃষ্টি
হয় নাই ;—বিধাতানামধারী কোন লম্পট, কপট, কাপুরুষ এ সংসারের
সৃষ্টিকারী ! তাহ'লে জানুব, এ সংসারে সতীর পুরস্কার নাই, ধর্ম্যা-
ধর্মের বিচার হয় না, পাপ-পুণ্য কথা দুটো কেবলমাত্র কল্পনা !
যোগী হে ! চিন্তা জ্ঞানহীনা বারাদনা হ'লেও সতী অসতীতে যে কত
প্রভেদ, চিন্তার সে জ্ঞান এখনও তিরোহিত হয় নাই !

শান্তি । ভগ্নি ! তোমার কথা শুনে, চোখে জল এল । হায় চিন্তামণি !
কোন পাপের ফলে, এই রক্ত-খনির ভিতর এমন কালফণী প্রবেশ
ক'রেছিল ?

চিন্তা । দিদি ! সন্ন্যাসিনী হ'লেও তুমি রমণী, রমণীর মন তুমি বেশই
জান ! এত চঞ্চল, এত দুর্বল, এত ক্ষণভঙ্গুর এ জগতে আর কিছুই
নাই ! সেই চঞ্চলতা, সেই দুর্বলতা, সেই ক্ষণভঙ্গুরতাই চিন্তার
সর্বনাশ সাধন করে । এখন ব'লতে হবে, চিন্তার সেটা অদৃষ্টের
লিখন ।

শোভা । সকল কথা অদৃষ্টের উপর নির্ভর ক'রে দিলে চ'লবে কেন ?
মনকে বোঝাতে পারলেই ত সকল গোল মিটে যায় ।

চিন্তা । মন বুঝবে কি, মনই যত গোল বাধিয়ে দেয় । কখনও ভাবি,
এরূপ কুপ্রবৃত্তির দাসী হ'য়ে, আর এ অমূল্য নারীজন্ম নষ্ট ক'র্ব
না ; কখনও ইচ্ছা হয়, আশার ছলনায় বিমোহিত হ'য়ে, এমনভাবে
আর হুশিচিন্তার অধীনে থাকব না ; কখনও স্থির করি, এ পাপের

খেলাঘর ভেঙ্গে দিয়ে, যেখানে পাপের প্রায়শ্চিত্ত আছে, তারই
অন্বেষণ ক'রে বেড়াই ! কিন্তু তা পারি কই ? মন তখনই কোথা
হ'তে এসে, ছ'চক্ষেতে ভেঙ্কি দিয়ে দেয় ; সেই ভেঙ্কিবলে পরাহত
হ'য়ে, সেই ভাব, সেই ইচ্ছা, সেই কল্পনা কোন্‌দিকে পালিয়ে যায় !
তখন ইচ্ছার পথে বিলম্বঙ্গল, আশার পথে বিলম্বঙ্গল, কল্পনার পথে
বিলম্বঙ্গল—অন্তরে বাহিরে বিলম্বঙ্গল বই আর কিছুই দেখতে পাই না ।
তখন মনে হয়, বিলম্বঙ্গলই সুখ, বিলম্বঙ্গলই নরক, বিলম্বঙ্গলই স্বর্গ,
বিলম্বঙ্গলই পর, বিলম্বঙ্গলই পতি, বিলম্বঙ্গলই এই পাপজীবনের
ইহকাল-পরকালের পরিভ্রাণ গতি ।

শাস্তি । ভগ্নি ! যদি কখনও স্বামী চিন্তে পারতে, তাহ'লে বোধ হয়,
পাপের কুহকে পতিত হ'য়ে, চিন্তাকে আজ এ দুর্গতি পেতে হ'ত না ।
যে রমণী পতি-দেবতার অনুপম রূপের স্বরূপ দেখতে পায়, তার চক্ষু
কি আর পরের রূপ দেখতে চায় ? সতীর চক্ষে পতিই যে মদনমোহন !
যে রমণী স্বামীর চরণ স্বর্গস্থলের পরম-নিকেতন ব'লে বুঝতে পারে,
সে কি কখনও পরের চরণে জীবন-মন অর্পণ ক'রে, চিরদিনের জন্য
দুঃখভাগিনী হ'তে যায় ? জ্ঞানহীনে ! স্বামীর চরণই যে সর্ব্বতীর্থ
পতিতপাবন ! পতি চেননাই ব'লেই, পরকে এনে সর্ব্বস্ব দিয়ে, ইহকাল
পরকালে কেবল দুঃখ কিনে ব'সে আছ ! পরের দ্বারা পুত্রের স্থান
হয়, পরের দ্বারা কখনও পতির স্থান পূর্ণ হ'তে পারে না ! সে স্থান
পূর্ণ ক'রতে এক পতি, দ্বিতীয় সেই পূর্ণব্রহ্ম কমলাপতি, তৃতীয়
আর কেউ নাই । এখন বুঝলে ভাই ! পতিহারা হ'লেই গতিহারা
হ'তে হয়, তা ইহকালেই বল, আর পরকালেই বল !

চিন্তা । সন্ন্যাসিনি ! সে কথা আমি বেশ জানি ! বিলম্বঙ্গল আমার
পরকালের পথে কাঁটা,—পরিভ্রাণকর্তা নয় ; বিলম্বঙ্গল আমার

মহাপাপের বিষমতরুর পোষণকারী ; কিন্তু পরিণামে এই তরুশাখায়
যে বিষময় ফল ধারণ ক'রবে, আমিই তার ভোগাধিকারী—বিষমঙ্গল
তাতে কেউ নয় ; তাও আমি বেশ বুঝি ! কিন্তু বুঝেও যে সব সময়
বুঝতে পারি না !

শোভা । বুঝতে পার না সত্য, কিন্তু বোঝবার দিন যে দিন দিনই
ফুরিয়ে যাচ্ছে ! ভবের গণা দিন আর কদিন থাকবে ? পরকালের পথ
যে, দিন দিন কাঁটাগাছে বুজে যাচ্ছে ! ষাবার দিন এলে যাবে কেমন
ক'রে ?

চিন্তা । সে কাঁটা মুক্ত করবারই বা উপায় কি ?

শোভা । আছে বই কি ! জগতে উপায় ছাড়া কিছুই নাই !

চিন্তা । জগতে উপায় ছাড়া কিছুই নাই, এ কথা সহস্রবার স্বীকার
করি ; কিন্তু বালক ! আমার মত হতভাগিনী যারা, তারা যে জগৎ
ছাড়া ; তাদের উপায় কিছুই নাই । আমাদের দেহ অপবিত্র, মন
কলঙ্কিত, দেহ কলুষিত—পাপের আমরা পূর্ণক্ষুর্তি, নরকের দ্বিতীয়
মূর্ত্তি ! স্বামীতে আমরা অধিকারহীন, ধর্ম্মে আমরা বিচারহীন, কর্ম্মে
আমরা আচারহীন, ইহকাল-পরকাল দুইদিকেই আমাদের অন্ধকার ।
চারিদিকেই অনুপায় আর বিতীষিকার ছছকার !

শোভা । তথাপি একধার আছেই আছে ? যার কোন উপায় নাই, তার
উপায়-অনুপায়ের উপায় ভগবান্ আছেন । তাঁর কাছে পুণ্যবানও যেমন
মহাপাপীও তেমি ; যে তাঁর কাছে উপায় চায়, তাকেই তিনি উপায়
দেন । তুমি অবিখাসিনী, তুমি কলঙ্কিনী ; পতিপ্রেমে তোমার অধিকার
নাই সত্য, কিন্তু সেই প্রেমময়ের অনন্ত-প্রেমের সাগর ত প'ড়ে আছে !
তাতে আর অধিকার-স্বনধিকার নাই,—সমান অধিকার সকলের ।
কেবল নিজের বলে সেই সাগরকূলে যেতে পারলেই নিশ্চিত । সেখানে

সবই একাকার পাপপুণ্যের বিচার ক'রতে কেউ নাই। সেই সাগরে
অতল জলে পুণ্যের বোঝা ফেলে দাও, সেও যেমন ডুবে যাবে; পাপের
বোঝা ফেলে দাও, তাও তেজি ডুবে যাবে! জ্ঞানহীনে! জাননা কি, যার
চরণে জন্ম ল'য়ে সুরধুনী ত্রিসংসারে কুলদামিনী নাম পেয়েচে, আর তাঁর
প্রেমের সলিলে জীবন-তরণী ভাসিয়ে দিলে, কুলহারা কুল পাবে না!
নাম তাঁর পতিত-পাবন, প্রেম তাঁর পরশ-রতন, তাঁর স্পর্শে অকিঞ্চি-
তেও কাঞ্চনের গুণ পায়। প্রমাণ তাঁর অনেকই আছে; সেই প্রেমের
স্পর্শেই মহাপাপী রত্নাকর মহর্ষি বাল্মীকিনাম লাভ ক'রেচে! তাঁর
কৃপায় অসম্ভব কিছুই নাই; তা না হ'লে কি আর কলঙ্কিনী পাষাণী
অহল্যা, মানবীরূপ ধারণ ক'রে, এ সংসারে প্রাতঃস্মরণীয়া
হ'তে পারে!

গীত

জাননা কি হায়, তাঁহারই কৃপায়,
অসম্ভব সম্ভব হয়, ভবের মাঝে ॥
অন্ধে দৃষ্টি পায়, যার করুণায়,
পঙ্কতে লজ্বল করে গিরিরাজে।
পাপী রত্নাকর তাঁহারই কটাক্ষে,
মহর্ষি বাল্মীকি দেখ না ত্রৈলোক্যে,
অকিঞ্চিতে হায়, কাঞ্চনের গুণ পায়,
ওগো সাগর-সলিলে রতন বিরাজে।
তাঁরই কৃপাবলে, জলে ভাসে শিলে,
বিষবৃক্ষশিরে, অমিয়-ফল ফলে,
পাপিনী পাষাণী, হয় মানবিনী—
ওগো সতীকুলমণি রমণী-সমাজে।

চিতার প্রবেশ

চিতা । রাত আর আছে কি ? আমার একটা ঘুম হ'য়ে গেল তোমাদের

কিন্তু কথা ফুরাল না ! আমি মনে ক'রেছি, ঘরের ভিতর শুয়েচ বুঝি !

চিন্তা । বিষ্মমঙ্গল এসেচে কি ?

চিতা । কই, বিষ্মমঙ্গল আসে নাই ; তবে আকালকুল ক'রে মেঘ এসেচে

বটে ; জলঝড়ও আস্ব আস্ব হ'য়েচে !

চিন্তা । কি ! মেঘ এসেচে ?

চিতা । এসেচে কেন, ঐ নাও, মেঘও এসেচে, জলও এসেচে, ঝড়ও

এসেচে ; এখন ওঘরে যাই কেমন ক'রে ?

চিন্তা । ওঘরে না গেলে তেমন ত কিছুই ক্ষতি নাই !

চিতা । রাতও যে আর নাই ; মেঘ না হ'লে এতক্ষণ পূর্বদিক্ ফরসা

হ'ত ।

চিন্তা । তাতেই বা ক্ষতি কি ?

চিতা । ঘুমতে হবে না ?

চিন্তা । ঘুমতে গেলেই কোন্ ঘুম হবে !

চিতা । না হবার আবার কারণটা কি হ'ল ?

চিন্তা । এই মহাছর্যোগ, এমন জল, ঝড়, বজ্রাঘাত ; বিষ্মমঙ্গল এখনও

এল না ।

চিতা । বটে, বটে, আমারই ছাই ভুল হ'য়েচে ; ঘুমপাড়ান কানাই ছেড়ে,

রাই কি গো ঘুমাতে পারে ? রাক্ষসীরা রাজকন্যাকে রূপোর কাটিতে

বাঁচাতো, সোনার কাটিতে ঘুমপাড়াতো ; তোমারও যে দেখ্‌ছি, সোনার

কাটিটা না ঠেকলে আর ঘুম আসে না !

চিন্তা । সেজ্ঞ কি ব'ল্‌ছি দিদি !

চিতা। তবে কি জন্ম ব'ল্চে দিদি ?

চিন্তা। এই দুর্যোগের সময় বিল্বমঙ্গল যদি পথে পড়ে ?

চিতা। ওমা ! এ যে ভূতের মায়ের পুত্রের শোক দেখ্চি গো ! রাত শেষ হব' হব' হ'য়েচে, জলঝড় মাথায় ক'রে দেবতা হাঁকার মার্চে, এ সময় বিল্বমঙ্গল এসে পথে প'ড়বে ! কেন, তার বুঝি ঘরবাড়ী কিছুই নেই !

চিন্তা। তাই ত মনে করি ; তার যদি ঘরবাড়ীই থাকবে, তাহ'লে কি আর এমন ক'রে চিন্তার কুটীরে এসে ঘর বাঁধে ?

চিতা। তোর মনের মাথা খেয়েচে ! তার ঘর আছে, বাড়ী আছে, সংসার আছে, স্ত্রী আছে, এতক্ষণ সে সুখের বাসর জাগাচ্ছে ; পথে আস্‌বার মহাদায় প'ড়েচে কি না ?

চিন্তা। তোর ভুল হ'য়েচে দিদি ! তোর ভুল হ'য়েচে । বিল্বমঙ্গলের যদি স্ত্রী থাকত, তাহ'লে আজ কি আর তাকে চিন্তার পাশে দেখতে পেতে ? লোকে জানে, বিল্বমঙ্গলের সব আছে ; কিন্তু বিল্বমঙ্গল জানে তার কেউ নাই । যে আপনার ঘর চেনে, সে কি আর বেষ্ঠার ঘর সাজাতে আসে ? যে আপনার স্ত্রীকে জানে, সে কি আর বেষ্ঠার প্রেমের ভিখারী সাজে ? বাহিরে বিল্বমঙ্গলের সবই আছে সত্য ; কিন্তু অন্তরে তার মহাশূন্য !—বাড়ী নাই, ঘর নাই, স্ত্রী নাই, সংসার নাই !

চিতা। জানি না দিদি ! তোদের মনের ঘোর ; পিরীত অনেক দেখেচি বটে, কিন্তু এমন পিরীত-খোর কখন দেখি নাই । বিল্বমঙ্গলই বুঝি বা তোকে মাটি করে !

চিন্তা। মাটি করে কি খাঁটি করে, তাই বা কে ব'ল্তে পারে ? মাটি ত হ'য়েচি, বাকী আর কি আছে ? এ মাটি যে আবার কিসে সোনা হবে, হায়, মঙ্গলময় ! তুমিই তা ব'ল্তে পার !

চিতা। এখন ঘরে গিয়ে শুইগে চল ; জলঝড় থেমে গেচে ।

চিন্তা। রাতও ফরসা হ'য়েচে ।

বিষমঙ্গলের প্রবেশ

বিষমঙ্গল। (প্রবেশ-পথ হইতে) হায় চিন্তা ! তোমার জন্ম প্রাণের
প্রতিও মায়া নাই। চিন্তা !—চিন্তা !

চিন্তা। কে গো তুমি ?

বিষমঙ্গল। (নিকটবর্তী হইয়া) আমি গো আমি ! কেন—চিন্তে
পার নাই ?

চিন্তা। বিষমঙ্গল ! সে কি ! এ দুর্ঘ্যোগে এলে কেমন ক'রে ?

বিষমঙ্গল। কেন চিন্তা ?

চিন্তা। এই জল, এই ঝড়, এই বজ্রাঘাত, আস্তে কি একটু শঙ্কা হ'ল
না ?

বিষমঙ্গল। কিসের শঙ্কা চিন্তা ! যে অহর্নিশি চিন্তার প্রেম-জলধি-জলে
নিমগ্ন, তার আবার এ মেঘের জলে শঙ্কা কি ? যার হৃদয়-আকাশে
শীত, বর্ষা বারমাসই চিন্তার চিন্তারূপ প্রবল ঝড় প্রবাহিত, তার আবার
এ সামান্য ঝড়ে ভয় কি ? যার চোখের উপর চমৎকারিণী চিন্তারূপের
মোহিনী-বিদ্যুৎ-ছটা বিনা মেঘেও হানা দিয়ে ব'সে আছে, তার আবার
এ বিদ্যাদ্বটার আতঙ্ক কি ? কি ব'ল্ব চিন্তা ! বিষমঙ্গলের চ'ক্ষে যে,
বারি-ধারার চিন্তার প্রণয় ধারা, ঝড়ের উচ্ছ্বাসে চিন্তার সোহাগ উচ্ছ্বাস,
বিদ্যাবিকাশে চিন্তার রূপের বিকাশ প্রকাশ পায় ।

চিতা। নদী পার হ'লে কেমন ক'রে ? খেয়াঘাটে নৌকা ছিল না কি ?

বিষমঙ্গল। তরিও ছিল না, কাণ্ডারীও ছিল না ; ছিল কেবল চিন্তারূপ

ধ্রুব-তারার উজ্জ্বল উদয়। সেই লক্ষ্যে নির্ভর ক'রে, একখানি কাঠের উপর ভর দিয়ে, প্রবল-তরঙ্গে পাড়ি দিয়েচি।

চিতা। ওমা! একখানা কাঠ ধ'রে এমন ভরানদী, ঝড়ের সময় পার হ'য়ে এলে! (স্বগত) সন্ন্যাসীঠাকুরদের ওষুধ এইবার ঠিক খেটেচে! (প্রকাশ্যে বিলম্বঙ্গলের প্রতি) ছয়োরে ত কপাট বন্ধ ছিল, বাড়ীতে এলে কেমন ক'রে?

বিলম্বঙ্গল। প্রাচীর লাফিয়ে প'ড়ে।

চিতা। অবাক কথা বাপু! প্রাচীরটে যে তোমা চেয়ে সাত হাত লম্বা বেশী; তুমি দেখ'ছি লাফিয়ে সাগর পার হ'তে পার!

বিলম্বঙ্গল। প্রাচীরের গায়ে একগাছি দড়ি ঝুলছিল, তাই ধ'রে উঠেছিলাম।

চিতা। নেশা ক'রে এসেচ না কি?

বিলম্বঙ্গল। কেন চিতা!

চিতা। কেন, আমার নাথা? মদন-গোপাল দোল খাবেন ব'লে, কেউ বুঝি পাঁচিলেতে দড়ি ঝুলিয়ে রেখে এসেছিল?

বিলম্বঙ্গল। আমি কি মিছে কথা ব'ল'চি, মনে ক'র'চ?

চিতা। ওমা! তা কি মনে ক'র'তে পারি? তুমি যে নেশার ঘোরে খেয়াল দেখ'চ!

বিলম্বঙ্গল। (স্বগত) চিতা! চিতা! এ কথার নাহি প্রতিবাদ!

চিন্তারূপ-মোহ-মদে জ্ঞানহারা আমি;

চিন্তা-প্রেম-সিদ্ধিপানে প্রাণহারা-প্রায়,

চিন্তা-ভাব ভাং সেবি উন্মত্ত সতত!—

কত যে প্রলাপ দেখি, কত বা খেয়াল।

কখন স্নেহের ছবি সন্মুখে বিরাজে,

কখন হুঃখের গীত কে আসি শোনায় ;
কখন আশার বাসা বাঁধি আকাশেতে,
কখন বা যাই ডুবি নিরাশা-সাগরে !

কি যে নেশা, কি সে নেশা, না পারি বুঝিতে ।

(প্রকাশ্যে) দেখ চিন্তা ! আমার কথায় বুঝি বিশ্বাস হয় নাই ?

চিতা । চিতা ত আর নেশা করে নাই !

বিদ্বমঙ্গল । আজ না করুক, একদিন অবশ্য ক'রেছিল ; এবং আমারই
মত খেয়াল দেখতে হ'য়েছিল । চিন্তা ! তোমারও কি আমার কথায়
অবিশ্বাস হয় ?

চিতা । অবিশ্বাস কেন হবে ? চিন্তাকে এত বিশ্বাস যার, তার কথায়
অবিশ্বাস ক'রলে, চিন্তার কি আর নিস্তার আছে ?

শোভা । পাগলও যে মহাজ্ঞানী পাগলের কাছে ! বিশ্বাসটা কথার দরে
বিকায় না,—কষ্টিপাথরে কম্ দেখে তবে মূল্য স্থির হয় ।

বিদ্বমঙ্গল । যোগি ! তোমার কথার অর্থ কি ?

শোভা । কথার অর্থ কথায় বলা নিরর্থক ; কার্য্য নৈলে কি সার্থকতা বুঝা
যায় ?

চিতা । বিদ্বমঙ্গল ! তোমার ভ্রম হ'য়েচে, সেটা বোধ হয় দড়ি নয় !

বিদ্বমঙ্গল । কি ব'লে মনে হয় ?

চিতা । দেখলেই ত সকল গোল মিটে যায় । আর ত অন্ধকার নাই, কৈ
কোন্থানে দেখিয়ে দেবে এস দেখি !

বিদ্বমঙ্গল । অস্ত্র কোথাও যেতে হবে না । (অঙ্গুলি নির্দেশ করিয়া)

সম্মুখে ঐ দেখতে পাচ্চ না ?

চিতা । কৈ মা ! দেখি দাঁড়াও ! (অগ্রবর্তী হইয়া) ওমা ! এ কি
সর্ব্বনাশ গো ! ও চিন্তে, ও চিন্তে ! এইখানে একবার দেখসে আর !

চিন্তা। (চিতার নিকট যাইয়া) কৈ, কোন্‌খানে ?—কি ?

চিতা। ঐ দেখ্ অভাগি ! ওমা, দেখে যে ভয়ে মরি গো ! ও কি দড়ি, না যমের বাড়ীর বরযাত্রী ! গায়ে যে কাঁটা দিয়ে উঠল দেখে ! অজাগর গোথ্রো সাপটা, লেজটা বলে মাটিতে প'ড়েচে ! ধন্তি কিন্তু বুকের পাটা ! ভাগ্যে গর্তের ভিতর মুখটো ছিল !

চিন্তা। সর্বনাশ ! বিলম্বল ! ক'রেচ কি ? এই অভাগিনী চিতার চিন্তাবিকারে জ্ঞানহারা হ'য়ে কাল-ফণী-ধারণেও শঙ্কিত হও নাই ?

শোভা। ভ্রমের বিকারে লোকের রজ্জুতে সর্পজ্ঞান হয় ; আর আসক্তির বিকারে যে, সর্পেতে রজ্জুজ্ঞান হবে, সেটা আর আশ্চর্য্য কথা কি ?

বিলম্বল। চিন্তা ! এটা আমাদের মহাপরীক্ষা !

চিন্তা। আমাদের কিসের পরীক্ষা, বিলম্বল ?

বিলম্বল। আমার অনুরাগ-পরীক্ষা, আর তোমার অদৃষ্টের পরীক্ষা ।

চিন্তা। তোমার অনুরাগ-পরীক্ষা হ'তে পারে ; কিন্তু আমার অদৃষ্টের পরীক্ষা এটা একরূপ বাতুলের কথা !

বিলম্বল। কেন চিন্তা ?

চিন্তা। এ অভাগিনী চিতার অদৃষ্টের বলে, আজ কালের মুখ হ'তে তোমার জীবন রক্ষা হ'য়েচে, তুমি ত এই কথা ব'ল্চ ? কিন্তু হায় ! পাগল ! এই চির-কলঙ্কিনী বারজন-বিলাসিনী চিতার অদৃষ্টের সঙ্গে, সতীসাক্ষীর জীবন দেবতা তুমি, তোমার জীবনের সঞ্চক। এ অপেক্ষা আর বাতুলতা কি হ'তে পারে ? যার অদৃষ্টের শুভাশুভের সঙ্গে তোমার অদৃষ্টের শুভাশুভ আবদ্ধ, যার অদৃষ্টের সুখদুঃখের সহিত তোমার জীবনের সুখদুঃখ সমানভাবে বিদ্বড়িত, এ পরীক্ষা তারই ; তোমার সেই জীবনমগ্নিনী, সতীসাক্ষী, পতিব্রতারই অদৃষ্ট-পরীক্ষা ;— চিন্তার নয় ! তারই অদৃষ্ট-বলে আজ স্বহস্তে ভুলস্ব ধ'রেও তোমার

জীবন বিনষ্ট হয় নাই ! তার অদৃষ্টকে ধন্যবাদ দাও, সেই তোমার এ প্রমাদে পরিত্রাণকারিণী ; পাপাচারিণী চিন্তাতে তেমন ক্ষমতা কিছুই নাই ! সতীর অদৃষ্টের বলে পতির জীবন-রক্ষা, এটা বড় বিচিত্র কথা নয় ! সেই বলে পরাভূত হ'য়ে, স্বয়ং-শমনরাজও একদিন সাবিত্রীকে সত্যবানের জীবন প্রত্যর্পণ ক'রতে বাধ্য হ'য়েছিলেন ! কিন্তু বল দেখি, পর-রমণী আমি, আমার মত কোন্ হতভাগিনীর কোন্ বলে, নিতান্ত পরপুরুষ তুমি, তোমার মত পরের জীবন কোন্কালে রক্ষা হ'য়েচে !

চিতা । দেখ্ চিন্তে ! আর একটা কথা শুন্বি, তেমন ঝড়ের সময় নদীতে যে একখানা কাট প'ড়েছিল, তা ত কিছুতেই বিশ্বাস হয় না ; দেখতে পেলে তবে বুঝতে পারতেন যে, কি !

বিষমঙ্গল । দেখতে পার !

চিতা । দেখতে পাওয়া যাবে ?

বিষমঙ্গল । ঘাটের পাশে একটা বেনাঝাড়ে বাঁধা আছে ।

চিতা । তবে আর না দেখে ছাড়্ চি না ; চল, তোমাকেও যেতে হবে, কোন্খানে বেঁধে রেখেচ দেখ্ বই দেখ্ ব ; কাট হ'লেও ত রান্না হবে !

বিষমঙ্গল । যাচ্ছি চল !

[বিষমঙ্গল ও চিতার প্রস্থান ।

শান্তি । কি সর্বনাশই না হ'ত ভগ্নি ! যখন তখন যেখানে সেখানে তোমার যেতে দেওয়া উচিত নয় ।

চিন্তা । যেতে আমি দিইও না ; তবে বাড়ী যেতে চাইলে, বারণও করি না ; পাছে মনে করে, চিন্তা আমাকে বাড়ী যেতে নিষেধ ক'রচে ! আমার আর অর্থে বাসনা নাই, অলঙ্কারে অভিলাষ নাই, আমার

আকাজ্জা-অনলে, বিশ্বমঙ্গল তার বিষয়বিভবও সব আহুতি প্রদান
ক'রুক, দিনেকের জন্তুও আর এমন ইচ্ছা করি না ; কিন্তু বিশ্বমঙ্গল
তা বোঝে কই ?

শোভা । তুমিই বা আকাজ্জাকে বোঝালে কেমন ক'রে ?

চিন্তা । সন্ন্যাসিনি ! সে কথার উত্তর আর তোমাকে কি প্রদান ক'রব ?

চিন্তা যে ক্রমে সবই বুঝতে পেরেচে । একে ত একজন পতিব্রতার
জীবনের সুখ কেড়ে নিয়েচি, আবার তার উদরায়ণেও ছাই প্রদান
ক'রব ? না, না, চিন্তা আর স্বপ্নেও তা অভিলাষ করে না । সে
পাপের ভার রাখ'বার যে স্থান হবে না !

শাস্তি । ভগ্নি ! তুমি যদি পর-রমণী না হ'তে, আর যার কথা ব'ল্চ,
সে রমণী যদি গুণগ্রাহিণী হ'ত, তাহ'লে বোধ হয়, তোমার মত
গুণবতীকে সে সতিনীর স্থান প্রদান ক'রেও, সুধিনী হ'তে পারত !
হায় ! হে ইচ্ছাময় ! যে কুসুম উত্তানে থাকলে আজ দেবতার চরণ
শোভা ক'রত, কোন্ ইচ্ছা পূর্ণ ক'রবার জন্ত, সেই কুসুম কণ্টক-
কাননে নিক্ষেপ ক'রেচ !

বিশ্বমঙ্গল ও চিতার পুনঃপ্রবেশ

চিতা । ও চিন্তে ! ও চিন্তে ! যা ভেবেচি তাই হ'য়েচে ! একটা জীৱন্ত
মড়া গো—একটা জীৱন্ত মড়া !

চিন্তা । কি মড়া, কিসের মড়া ?

চিতা । মানুষ ম'লেই মড়া হয়, তারই মড়া ! বাপ্ রে, একটা আজ্ঞাও
মিন্‌সে গো ! এখনও হাঁ ক'রে র'য়েচে ! আবার তাকে কেমন বেধে
রেখে আসা হ'য়েচে ! আজ্ঞাও মিন্‌সে গো, আজ্ঞাও মিন্‌সে !
খন্তি কিন্তু নেশাকে !

চিন্তা। বিষমঙ্গল! মড়াকে কি মড়া ব'লেও মনে জ্ঞান হয় নাই?

বিষমঙ্গল। মন যে তোমার দিয়ে নিশ্চিত হ'য়েচি চিন্তা! জ্ঞান হবে কি ক'রে?

চিন্তা। বিষমঙ্গল! তুমি আজ আমার কাঁদালে?

বিষমঙ্গল। কেন চিন্তা?

চিন্তা। তোমার এই শোচনীয় ছর্দশা দেখে, এই পাষণীর চোখেও আজ
জল প'ড়ল।

বিষমঙ্গল। না চিন্তা! পথে আসতে, কি নদী পার হ'তে, কিছা বাড়ী
প্রবেশ ক'রতে, আমার কিছুমাত্র কষ্ট হয় নাই!

চিন্তা। পাগল! সে ছর্দশা নয়, এবং সে জন্তুও বলি নাই। তোমার
মনের ছর্দশা, জ্ঞানের ছর্দশা, বিবেকের ছর্দশা দেখে, এ পাষণীর কঠিন
হৃদয়ও দ্রবীভূত হ'য়ে গেছে! অবোধ! ক'রুচ কি? কাচের সঞ্চয়জন্য
কাঞ্চনের অপব্যয় ক'রুচ? হায় বিষমঙ্গল! হায় জ্ঞানহীন! হায়
উদ্ভ্রান্ত! স্বর্গের দেবতার আজ এই ছর্দশা!

বিষমঙ্গল। কি চিন্তা?

চিন্তা! হায় বিষমঙ্গল! এখনও "কি"!! পাগল! এ কি ক'রতে
ব'সেচ? কপিলার ক্ষীরধারায় আলোকলতার সিঞ্চন ক'রুচ? পবিত্র
তুলসীপত্রে সারমেয়ের পূজা ক'রুচ? ছি, ছি! না না, তুমি স্বর্গের
দেবতা। বিষমঙ্গল! তুমি স্বর্গের দেবতা! কর্মবিপাকে অভিশপ্ত,
তাতেই এই ছর্দশাগ্রস্ত! কোন্ মহাপাপে এই কঠোর প্রায়শ্চিত্ত?
পতিতপাবন! স্বর্গের দেবতার এই কঠোর প্রায়শ্চিত্ত?

বিষমঙ্গল। কি ব'লুচ চিন্তা?

চিন্তা। কি ব'লুচি? অজ্ঞান! এখনও তা বুঝতে পার নাই? হায়!
জ্ঞান! তোমার যে মন এই পাপিনী চিন্তার রূপের চিন্তার অর্পণ
ক'রেচ, সেই মন যদি চিন্তার পরিবর্তে, সেই অগণ্যচিন্তামণির

স্বরূপচিন্তার অর্পণ ক'ব্তে, তাহ'লে যে আজ ছরস্ত ভবের চিন্তা হ'তে নিশ্চিত হ'তে পাব্তে ! হায় ! অজ্ঞান-প্রমত্ত ! যে প্রেমস্ত প্রাণ এই কলঙ্কিনী চিন্তার আসক্তি-সাগরে ভাসিয়ে দিয়েচ, সেই প্রাণ যদি প্রেমময় চিন্তামণির প্রেমের সাগরে ভাসিয়ে দিতে পাব্তে, তাহ'লে আজ পরমানন্দের শীতল হিল্লোলে তোমার সংসার-সস্তাপ বিদূরিত হ'য়ে যেত ! হায় ! উদ্ভ্রান্ত যুবক ! নিতান্ত ভ্রমের বশে বিমুগ্ধ হ'য়ে, যে হৃদয়ের রত্নসিংহাসনে, এই পিশাচীকে স্থান দিয়েচ, যদি এমনি যত্নে সেই সিংহাসনে সেই শান্তিদাতা চিন্তামণিকে স্থান প্রদান ক'ব্তে তাহ'লে যে, তার বিনিময়ে, এতদিন তুমি অনন্ত শান্তিরাজ্যের অধিকারী হ'তে পাব্তে ! আর না, বিশ্বমঙ্গল ! আর না, অনেক হ'য়েচে ; মহাযোগীর এ চিন্ত-বিড়ম্বনা ! পরম বৈষ্ণবের ভীষণ শ্মশানে এ শব-সাধনা, না ! ওঃ—আর না !

বিশ্বমঙ্গল । বল চিন্তা ! বল, বল, আবার বল ! কি ব'ল্চ, ভাল ক'রে আবার বল !

চিন্তা । আবার ব'ল বিশ্বমঙ্গল ! ভ্রান্ত ! উন্মত্ত ! বিকারগ্রস্ত ! আবার বলি ; এতদিন যে একান্তভাবে এই চিন্তারূপিনী বারবিলাসিনীর ভোগবিলাসের তৃপ্তিকামনার উৎসর্গ ক'রেচ, সেই ভাব যদি সেই চিন্তামণির যোগবিলাসের ভক্তি-সাধনার উৎসর্গ ক'ব্তে, তাহ'লে আজ প্রেমময়ের অপ্রমের প্রেমের ভাবে, মন-হারা, জ্ঞান-হারা, বুদ্ধি-হারা, প্রাণ-হারা হ'য়ে, পরমানন্দের আনন্দভাবে, তোমার অস্তিত্বভাবের তিরোভাব হ'তে পার্ভ যে ! এমন একাগ্রভাব, এমন মনোনিবেশ, এমন প্রাণ-উৎসর্গ, এমন হৃদয়-দান, বিশ্বমঙ্গল ! বিশ্বমঙ্গল ! এ অশান্তি-প্রতিমা-চিন্তায় কি কখন সম্ভব হয় ? সর্বসস্তাপহারিণী জাহ্নবীর পবিত্র কলধারা যদি যোগ-নিরত জহুর অর্ঠরেই আবদ্ধ থাক্ভ, তাহ'লে এই সংসার-জীবের

পাপতাপের কঠোর জালা কিসে স্মৃণীতল হ'ত ? বিষমঙ্গল ! তুমি স্বর্গের দেবতা ! এ কপটখেলা তোমার নয়, তুমি ত্রিবর্গের প্রতিষ্ঠাতা, এ লম্পট লীলা তোমার নয় ! যাও, যেখানে শান্তি, যেখানে শান্তিময়, যেখানে শান্তিরাজ্য, যাও, সেইখানেই কার্যক্ষেত্র তোমার !

বিষমঙ্গল । চিন্তা ! চিন্তা ! এ কি, এ কি ! এ কি ভাবের আবির্ভাব ! তুমি দেবী, না মানবী ? তুমি জ্ঞান, না মায়ী ? তুমি প্রাণ, না ছায়া ? তোমার নয়নপ্রাস্তে কিসের ধারা ? এ বিকার, না আরোগ্য ? এ বিলাস, না বৈরাগ্য ? তোমার রূপের ছটার, কিসের ঘট ? এ কি আলোয়ার আলোকরাশি, না ধ্রুবতারার সমুজ্জল রশ্মি ? এ কি পথিকের পথের ধাঁধা, না দিশেহারার দিক্‌বাধা ? তুমি—তুমি, তুমি কি সেই চিন্তা ? মানবিনী, না মায়াবিনী ?

চিন্তা । আমি, আমি,—আমি সেই চিন্তা ! মানবিনী, মায়াবিনী, বিমোহিনী ;—জ্ঞান নয়, অবিজ্ঞানস্বরূপিনী ! এখানে ঔষধ নাই, বিকার আছে ; এ রূপেতে আলোক নাই, ধাঁধা আছে ! পালাও, পালাও ভ্রান্ত পথিক ! ভ্রান্তির বিস্তৃত-পাশ ছিন্ন ক'রে, শান্তি-পথে ধাবিত হও !

বিষমঙ্গল । বল, বল, বল মায়াবিনি ! বল বিমোহিনি ! ব'লে দাও, শান্তি-পথের স্বরূপ-কাহিনী ! কোথায় শান্তি ! কোথায় শান্তিময় । কোথায় শান্তিরাজ্য । হও দেবি, হও জ্ঞানরূপিনি—আমার শান্তি মন্ত্রের দীক্ষা-দায়িনী !

চিন্তা । পামল ! ভ্রান্ত ! অশান্তি-প্রতিমা চিন্তা যে তাতে নিতান্ত অনধিকারিনী ! যাও, যেখানে শান্তি, সেইখানেই শান্তি, সেইখানেই শান্তিময়, সেইখানেই শান্তিরাজ্য ! শান্তিই তোমার শান্তি-শিকার

প্রথম গুরু, শান্তিই তোমার শান্তি দীক্ষার প্রধান গুরু, শান্তির সাহায্য
বই করতরুর তলার গিয়ে, শান্তি ফল-লাভের অস্ত্র উপায় কিছুই নাই !
যাও, যেখানে সেই শান্তি, সেইখানেই শান্তির প্রসন্ন-প্রতিকৃতি,
সেইখানেই শান্তিময়ের বিপুল বিভূতি, সেইখানেই শান্তিরাজ্যের প্রশান্ত
পথ-বিস্তৃতি !

বিধমঙ্গল । তবে বল দয়াবতি ! সে কোন্ শান্তি ?

চিন্তা । যে শান্তিকে অশান্তি-অনলে নিক্ষেপ ক'রে, ভ্রান্তি-সলিলে আত্ম-
বিসর্জন দিয়েচ, সে সেই শান্তি ! যে শান্তি-কুঞ্জের প্রণয়-প্রচ্ছায়া
শীতল সুখের আশ্রয় পরিত্যাগ ক'রে, চিন্তার আকাজকা-চিতার জীবনের
সহিত ইহকালপরকালের অন্ত্যষ্টি-ক্রিয়া সমাধান ক'রতে এসেচ, সে
সেই শান্তি ! সেই শান্তি, তোমার শান্তি—মুক্তির চিরসঙ্গিনী ! যাও,
নন্দন-বিহারি ! তুমি স্বর্গের সেই শান্তি-নিকেতনে । এ অশান্তির
রাজ্য তোমার নয় !

গীত

হার ভ্রান্ত, আর ভ্রান্তি-মাঝে খেক না ।

সাধের খেলা, পাপের লীলা, এ সব তোমার সাজে না ॥

তুমি মনে মনে মহাজ্ঞানী, কিন্তু কোন্ পাপেতে বল গুনি,

বল বল হে ;—

পড়ি মোহপাশে, এই নরকবাসের বাসে, কর বাসনা ॥

চিন্তা-রূপ-চিন্তায় যে মন আছে মগন,

চিন্তামণির স্বরূপ-চিন্তায় কর হে তার সমর্পণ,

ওহে রসরাজ ! (কেন ভুলেছ যার মোহে হ'রে মগন)

যাও শান্তি পাশে ;

আর মোহবশে, থেকে না হে সখা থেকে না,—

যেথা শান্তি রয়, সেথা শান্তিময়,

তা কি হে তুমি জান না—

(শান্তি প্রেমের শিক্কা-দীক্ষাগুরু)

(প্রেমের পিপাসা সব মিটিবে হে)

রাসবিহারী রাধা রাসেশ্বরী,

কর যুগলে যুগল-সাধনা,

পূর্ণ হবে কাম, সফল মনস্কাম,

রবে না ক কোন ভাবনা—

(প্রাণের পিপাসা সব মিটিবে হে)

(আকাজ্জিকা-অনল নিবে যাবে হে)

(ভবের ভাবনা আর রবে না হে)

ওহে, দীনবন্ধু বন্ধু হবে, সকল জালা দূরে যাবে,

এ ভবে আর এ প্রবাসে,

এমন বেশে আসতে কভু হবে না ॥

শোভা । (শান্তিকে জনান্তিকে) আর কেন ? এইবার কোনখানে ?

শান্তি । (জনান্তিকে) খুব সাবধানে । এইবার বৃন্দাবনে ।

[শান্তি ও শোভার প্রস্থান ।

বিশ্বমঙ্গল । বাজিল বিবেক-ভেরি বিজয়-নির্ঘোষে ।

জাগিল স্মৃষ্ট জ্ঞান, পাইল চেতনা ;

ছুটিল মোহের তন্দ্রা মানস-নরনে,

তাজিল কু-আশা-বপ্ন ইন্দ্রজাল-খেলা !

মিশাও রূপের তৃষ্ণা শান্তি-জলধরে ;

মিশাও আসক্তি-শ্রোত শাস্তি-সগেহেতে,
 মিশাও প্রবৃত্তি-মোহ, শাস্তি-সাধনায় !—
 বাজাও বিবেক ! ভেরি বিজয় নির্ঘোষে !
 মরিল সে বিষমঙ্গল চিন্তা-রঙ্গ-ভূমি,
 মরিল সে বিষমঙ্গল আসক্তি-সেবক,
 মরিল সে বিষমঙ্গল প্রবৃত্তির দাস,
 বাজিল বিবেক-ভেরি বিজয়-নির্ঘোষে !
 চল রে মোহিত মন, শাস্তি-অশ্বেষণে ।
 সাজ রে প্রমত্ত-প্রাণ, শাস্তি-রাজ্যলাভে,
 এস রে প্রবুদ্ধ-জ্ঞান, দাঁড়াও সম্মুখে,
 দেখাও শাস্তির পথ, সুগম যে দিকে !
 বিদায় মোহিনী-চিন্তা ! কামনার দাসী,
 বিদায় রঙ্গিনী-চিন্তা ! বিহ্বল-প্রতিমা,
 বিদায় সাপিনী-চিন্তা ! হলাহলময়ী,
 বিদায় পাপিনী-চিন্তা ! ডাকিনীর মারা !
 বিদায়, বিদায় চিন্তা ! জনমের শোধ ।

চিন্তা ।

যাও দেব ! যাও ভ্রাস্ত ! শাস্তি যেথা পোভে,
 একান্ত বসন্ত যেথা শাস্তভাব ধরে ;
 মনে তুমি মহাবোগী, প্রাণেতে পাগল,
 হৃদয়ে প্রেমের দাস, ভাবে মহারাজ;
 যাও দেব ! যাও, মুগ্ধ ! শাস্তিরাজ্য যেথা,
 স্বর্গের দেবতা তুমি, শাপ-বিমোচন !
 যাও, কিন্তু ব'লে যাও, চিন্তার উপায়,
 কোথা যাবে, কোথা যাবে, শাস্তির আশ্রয় ।

বিষমঙ্গল । যাও চিন্তা ! যাও দেবি ! যাও মারাবিনি !
 কু-আশা-কূহক হ'তে পালাও সেখানে,
 খুলিরাছে শাস্তিময় শাস্তিসত্র যেথা,
 ভবভ্রাস্ত পথিকের শ্রাস্তি উপশমে !
 বিশ্বাসঘাতিনী তুমি, পাপ-কলুষিতা,
 পতি-প্রেম-বিবর্জিতা চির-অনাধিনী ;
 অনাথের নাথ যিনি বিশ্বপতি হরি,
 একান্ত, একান্ত চিন্তা ! আশ্রয় তোমার !
 বিসর্জি এ খেলাঘর বিশ্বুতি-সাগরে,
 পাসরি এ প্রেত-লীলা সংসার শ্মশানে,
 পরিহরি পাপ-চিন্তা, একান্ত-অস্তুরে,
 হরি, হরি, ব'লে চিন্তা যাও যাত্রা করি,
 শ্রীহরি, শ্রীহরি মাত্র উপায় তোমার ।

[সবেগে বিষমঙ্গলের প্রস্থান !

চিন্তা । হরি, হরি, ব'লে তবে যাই যাত্রা করি,
 শ্রীহরি, শ্রীহরি মাত্র উপায় আমার !

চিতা । কিছুই স্মৃতে পারি না বাপু ! এ আবার কি হ'ল চিন্তে ?

চিন্তা । যা হবার তাই হ'ল ! শ্রীরামের শ্রীপদধূলা, পাষণীর শাপ বিমো-
 চন, পাপিনীর মহামুক্তি ! চিত্তে ! চিত্তে আজ মহাপ্রলয় উপস্থিত ;
 সেই প্রলয়ের প্রবল উচ্ছ্বাসে প্রসক্তির পাতান খেলাঘর ভেসে গেছে,
 আকাজকার সাজান বাসা ভেঙ্গে গেছে, পাপের প্রলোভন-খাঁধাঁ ছুটে
 গেছে ! ইন্দ্রিয়ব্যাধের মোহিনী ছলনার বিমোহিতা বিহঙ্গিনী পিঞ্জরাবদ্ধ
 হ'রেছিল ; পাপের শৃঙ্খল পারে প'রেছিল ; সে পিঞ্জর ভেঙ্গেচে, সে
 শৃঙ্খল টুটে গেছে, বিহঙ্গিনী উড়েচে ;—অনন্ত আকাশে, অনন্ত

উদ্দেশে, বিহঙ্গিনী আজ উড়েচে ! পাপের হাট পূর্ণ হইল, বেচাকেনা মিটে গেল । বারবিলাসিনীর ধন, বারজনের ধন ; বারজনকেই প্রদান ক'র । চিন্তার রূপের শৃঙ্খলে আবদ্ধ হ'য়ে, কত লোক সুখের জীবনে দুঃখের শৃঙ্খলে পায় পড়েচে ; চিন্তার পাপের ধন দুঃখীর দুঃখ মোচনে প্রদান ক'র । চিন্তার আকাঙ্ক্ষা-স্রোতে সর্বস্ব বিসর্জন দিয়ে, কত অতুল ঐশ্বর্যের অধীশ্বর, চিরদিনের জন্ত অনাথ সেজেচে ; চিন্তার আকাঙ্ক্ষা-অর্জিতধন অনাথের আশ্রয়-সংস্থানে অর্পণ ক'র । চিন্তার বিলাসবিষে অর্জিত হ'য়ে, কত মনস্বী, জন্মের মত মনরোগে শয্যা-শায়ী হ'য়েচে ; চিন্তার বিলাসের ধন আতুরের আরোগ্য-বিধানে প্রদান ক'র । দেখ, এই পিশাচী লীলার প্রধান সঙ্গিনী ! চিন্তার এই বিদায়-বাসনা পূর্ণ ক'র ।

হরি, হরি, ব'লে তবে যাই যাত্রা করি,
 শ্রীহরি, শ্রীহরি মাত্র উপায় আমার ।
 দীনবন্ধু ! কৃপাসিদ্ধু ! পতিতপাবন !
 কলঙ্কিতা, কলুষিতা, পাতকী এ দাসী,
 পাতকী-উদ্ধার তুমি কলঙ্ক মোচন !
 কি হবে, কি হবে এই পাপিনীর গতি !
 কতদিন যাপিয়াছি পাপের খেলায়,
 ভাসিয়ে জীবনতরি বিলাস-প্রবাহে ;
 ভাবি নাই পরকাল, ইহকাল সুখে
 মজিয়াছি, মজিয়াছি দশের সেবার !
 ভুলিয়াছি পতিপদ, মুক্তিপদ ভবে,
 বিকারেছি পরপদে, মোহমদে মাতি !
 ভুলিয়াছি সতী-ধর্ম, রমণীর ব্রত,

সঁপিয়া সতীস্বধন, পর-ইচ্ছা-ভোগে,
 স্বইচ্ছায় কিনিয়াছি নিরয়-নিবাস !
 দিয়েছি ত্রিকূলে কালি কামের কুহকে,
 মরিয়াছি জ্ব'লে সদা ইন্দ্রিয়-অনলে,
 কামনার ক্রীতদাসী হ'য়েছি জীবনে !
 কি হবে ! কি হবে হরি ! পরিণাম-দশা ?
 গতি-বিহীনের গতি, কি হবে দীনেশ ?
 কুলহীনা, কুল কোথা পাবে দয়াময় ?
 অনাথার কি উপায় অনাথের নাথ !
 ধর্মবল, কর্মবল, সাথে নাই কিছু ;
 পতিবল, সতীবল, পথে হারিয়েছি ;
 সম্বল তোমার সেই অপার করুণা,
 সম্বল তোমার সেই অভয়চরণ,
 সম্বল তোমার সেই দীনবন্ধু নাম !
 গুনিয়াছি, পতিতার গতি তুমি ভবে ;
 পদধূলা-স্পর্শে শিলা অহল্যা পাপিনী—
 সতী-শিরোমণি-নাম পেয়েচে সংসারে !
 গুনিয়াছি, পাতকীর ত্রাণকারী তুমি ;
 গুনিয়াছি চণ্ডালিনী—শবরীর কথা,
 করুণা-কটাক্ষে তব করুণা-নিধান !
 স্থান তার শান্তিধামে হ'য়েচে অস্ত্রমে।
 ভয়সা কেবল তাই, আশার আশ্রয়,
 সেই বলে বুক আজ বেঁধেছি হে হরি !
 - পাপিনী তথাপি ত্রাণ পাব তব নামে,

চণ্ডালিনী তবু গতি হবে তব গুণে ;
কুলকলঙ্কিনী তাই কুল-অন্বেষণে,
হরি, হরি, ব'লে আজ যায় যাত্রা করি,
শ্রীহরি, শ্রীহরি মাত্র উপায় আমার !

[সবেগে চিন্তার প্রস্থান ।

গীত

আজ চলিলাম অকুলকাণ্ডারী হে, অকুলেতে দিও যেন কুল ।
অপার ভব-জলধি কি হবে আমার—
তরঙ্গ-আতঙ্কে অঙ্গ কাঁপে নিরন্তর—
(কিবা হবে হে) (ভব-সাগর-পারের উপায়)
অগতির গতি তুমি এই ভূমণ্ডলে—
সেই আশায় বুক বেঁধে যাই হরি ব'লে,
(সম্বল নাই আর কিছু) (ধর্মবল কর্মবল সব হারিয়েছি)
দীনশরণ দীনতারণ,
শ্রীপতি পতিতপাবন,
দীনহুঃখহারী, তুমি হে মুরারি
কর দীনহুঃখমোচন ;
(আতঙ্কে সদা মরি মরি) (বল দীনের গতি কি হবে হে)
ভরসা কেবল সে চরণ-তরি ॥
শুনেছি শবরীর কথা ওহে দয়াময়,
চণ্ডালিনী তবু তারে দিলে পদাশ্রয়,
(তোমার সকলি সমান)
(ভালমন্দ ধর্মাদর্শ) (তোমার সকলি সমান)

পাপিনী পাবানী, সতী-শিরোমণি,

পরশি যে চরণ,

দেহি দয়াময় সেই পদাশ্রয়,

করি এই আকিঞ্চন ।

(তুমি পাতকীতারণ মধুসূদন)

(তোমার কৃপার সবই হয় হে ভবে)

(ওহে পতিতে উদ্ধার কর)

দিও হরি করুণাবারি ॥

চিতা । বাঃ, মজার ব্যাপার বটে ! একবারেতেই সব ফরসা ! যেন ভেঙ্কির খেলা গো, যেন ভেঙ্কির খেলা ! সন্ন্যাসী ঠাকুরেরা শুভক্ষণে পা দিয়েছিল, চিতের আঙ্গ হাট ক'রতে এসে, রাজ্যপাট লাভ হ'য়ে গেল ! কার ধন কে ভোগ করে, সে কথা আর কে ব'লতে পারে ? —আঃ মরু অভাগী, আপনিও মজলি, দশজনকেও মজালি ! দিনে ছুপুরে ডাকাতি ক'রে কত কি না জড় ক'রলি, কেবল চিতের অশ্রু রে, কেবল চিতের অশ্রু ! চিতের চিতে আবার জ'লবে, আবার পতঙ্গ পুড়বে, মাতঙ্গকেও ম'রতে হবে ! রূপের শিখা না উঠুক, ধনের আলোতো ছুটবে ! দশজনকে দিতে হবে ;—এই কথাটা ব'লে গেল নয় ? হায়, হায় ! মরি মরি ! তার কি আর কথা আছে ? একটা চাবি, দুটো চাবি, এই তিনটে চাবি ; বাবি ত, এত-দিন গেলে, আরও সুখের দিন দুটো বেড়ে যেত ! সোনার চাবিকাঠি গড়াব, রিক্তে রিক্তে গাঁধ্ব, আবার খুঁটে বাঁধ্ব ; ছুটে ছুটে পাড়া দিয়ে বেড়িয়ে আস্ব ! লুটব গো, লুটব,—কত মন, কত ধন, আবার কত লুটব ! গাটা ছলিয়ে এখন ত একবার বেড়িয়ে আসি ! .

[চিতার প্রস্থান ।

পঞ্চম দৃশ্য

(বিশাখা পুরী)

সুদেবের প্রবেশ

সুদেব । (স্বগত) বিজয়া-দশমীর মহানিশা ! সুখ-প্রতিমার বিসর্জন হ'য়ে গেচে,—শূন্য-মন্দির প'ড়ে আছে ! নিরানন্দের পূর্ণ-অধিকার ! শান্তির হাট ভেঙ্গে গেচে, ঠাট্‌মাত্র প'ড়ে আছে ! সুখ-চন্দ্রমা অন্তমিত, শান্তি-দীপ নির্বাপিত ! অন্ধকার, অন্ধকার, এই নিরবচ্ছিন্ন অন্ধকার ! এই অশান্তির কারাগারে, এই বিজন-নিরানন্দের কন্দরে, এই হতভাগ্য-রূপী সুদেব আজ নির্বাসিত ! পলাবার উপায় নাই, এই অশান্তির লীলাভূমি পরিত্যাগের পথ নাই ! বিষম কর্তব্য-শৃঙ্খলে নিতান্তই আবদ্ধ ; ইচ্ছা থাকলেও, সে বন্ধন-মোচনের ক্ষমতা নাই ! হায় বিষ-মঙ্গল ! এমন কুলাঙ্গার জন্মেছিলে ? তোমারই অত্যাচারে এই সোনার সংসার ছারখার হ'ল ! তোমারই অবিচারে এই প্রেমোদ-উত্তান মহাশ্মশানে পরিণত হ'ল ! তোমারই পাশব-ব্যবহারে এই সদানন্দের চির-রজালয়ে অশান্তির বিহার-মন্দির প্রতিষ্ঠিত হ'ল ! হায় মা ! জননী-রূপিণী শান্তি ! কোন্ পাপের ফলে তোমার এই আজীবন নিদারুণ শান্তি ! দিনেকের জন্তুও শান্তি-সুখ পাও নাই, ক্ষণেকের জন্তুও সে মুখে কখনও হাসি দেখি নাই ! মা যেন স্বর্গীয়-শান্তির মূর্তিমতী পবিত্র প্রতিমা । রূপে ভগবতী, গুণে অরুহতী, জ্ঞানে সরস্বতী । হায় বিধাতঃ ! অহর্নিশি অশান্তির অনলে দগ্ধ করবার জন্তুই কি

সেই স্বর্গীয়া-প্রতিমা, সেরূপ অমুপমা ক'রে, সৃজন ক'রে-
ছিলে ? যতদিন শাস্তি ছিল, ততদিন সুখ-শাস্তি সবই ছিল। শাস্তিও
গিয়েচে, সঙ্গে সঙ্গে সকলই গিয়েচে !

উদ্ভ্রান্তভাবে বিহ্বমঙ্গলের প্রবেশ

বিহ্বমঙ্গল ।

(প্রবেশ পথ হইতে)

শাস্তি ! শাস্তি ! কই শাস্তি ! কোথা আছ তুমি ?

উদ্ভ্রান্ত-পথিক পুনঃ পেয়েছে রে পথ ;

বিমুক্ত-কুহক-পাশ ক'রেছে ছেদন !

আসক্তির কারাবাস গিয়েছে রে ভেঙ্গে,

ছিঁড়েছে রূপের মোহ-শৃঙ্খল বিষম !

মর্ন্যাহত, কারামুক্ত বন্দী তাই আজ,

শাস্তি-নিকেতন-আশে হ'য়েছে ধাবিত !

এস তুমি, ধর্ম্মে-কর্ম্মে সাহায্যকারিণি !

এস তুমি, কামমোক্ষে জীবন-সঙ্গিণি !

এস তুমি, শাস্তিরূপা শাস্তি-স্বরূপিণি !

শাস্তিসহ শাস্তি-সুখ অব্বেষণে যাই ।

পরিতাপ-হতাশন জ'লেছে অন্তরে,

অশাস্তি-সমীর তায় বহিছে প্রবল ;

কৃত-কর্ম্ম, কাল-স্মৃতি, ইন্ধন প্রচুর,

দহিছে রে মর্ন্যস্থল কিবা দিবানিশি ;—

শাস্তি-বারি বিনা হায়, সে জ্বালা ভীষণ,

হবে না শীতল শাস্তি, হবে না শীতল !

সুদেব । ধর্ম্ম হে অগদীশ ! যেমন রোগ, তার উপশমের ঔষধ কি সঙ্গে

সঙ্গে বিধান ক'রে রেখেচ ? যেমন প্রায়শ্চ, তদনুযায়ী পরিণাম ; তা
না হ'লে আর তোমাকে সর্কশক্তিমান ব'লবে কেন ?

বিষমঙ্গল । কই শাস্তি, কোথা শাস্তি ! কোথা আহ তুমি ?

একি শুনি ! নিরুত্তর সব ।

প্রতিবাক্যে প্রতিধ্বনি দিতেছে উত্তর ।

নীরব, নীরব পুরী, কই শাস্তি কই ?

সুদেব । শাস্তি কই, এ কথার প্রতি-উত্তর প্রদান ক'রতে, আজ বিশাখা-
পুরীতে কেউ নাই ।

বিষমঙ্গল । তুমি কি শাস্তি নও ?

সুদেব । আমি শাস্তি নই—সেই শাস্তিরূপিণী চিরহুঃখিনী জননীর পরিত্যক্ত
সস্তান আমি ।

বিষমঙ্গল । আমি জ্ঞানহীন, আমি দৃষ্টিহীন, আমি পাগল ; বল, সত্য
ক'রে বল, তুমি কে ?

সুদেব । এই সংসার-জলধিক্ষেত্রে শাস্তির স্খাতাসে পাল তুলে, একখানি
সুখের তরি ভেসে যাচ্ছিল ; সহসা অশাস্তির চরে ঠেকে, সেই তরি
বান্চাল হ'য়ে গেছে ; আমি তারই নিদর্শনস্বরূপ হুঃখের তরঙ্গে ভাসমান
কাষ্ঠখণ্ড ! একদিন কে একজন এই সংসার-মন্দিরে একখানি সর্ক-
সুখময়ী শাস্তিপ্রতিমা প্রতিষ্ঠিত ক'রেছিল, সহসা ছরস্ত কাল এসে,
সেই প্রতিমা উস্তোঙ্গিত ক'রে, অশাস্তির মহাশ্মশানে তার সংকার-
সাধন ক'রে গেছে ; আমি সেই চিতা পাশে তার সাক্ষী-স্বরূপ অর্কদগ্ন
বংশদণ্ড ! কুমার । আমি এই অন্ধকারময়ী প্রেতপুরীর পরিতপ্ত
রক্ষাকারী !

বিষমঙ্গল । কে, সুদেব ! শাস্তি নাই ?

সুদেব । এই শাস্তিহীন বিজন-পুরীর প্রত্যেক দৃষ্টে, প্রত্যেক মিনিসে কি

সে কথা ব'লে দিচ্ছে না ?

বিষমঙ্গল । তবে শাস্তি কোথায় ?

সুদেব । যেখানে শাস্তির সুবাতাস প্রবাহিত হয়, সেই সস্তাপিতা বুঝি সেই-
খানে ! যেখানে বিনাদোষে শাস্তি নাই, অধীনের প্রতি অবহেলা নাই,
নিষ্ঠুরের অত্যাচার নাই, সেই উৎপীড়িতা বুঝি সেইখানে ! যেখানে
অনন্ত-আকাশের শাস্তি-মেঘের সদা উদয়, প্রেমধারার অবিরল সুধাবর্ষণ,
সেই অশাস্তি-আতপ-তাপিতা, পতি-প্রেম-পিপাসিতা চাতকিনী বোধ
হয়, সেই আকাশ-উদ্দেশে উড়ে গেছে ! কুমার ! শাস্তিদেবী এই
অশাস্তির শ্মশান হ'তে পলায়ন ক'রেচে !

গীত ।

মরি হায় কে বলিবে কোথায় সেই জনমহুঃখিনী ।

কি বিষাদে মনের খেদে, আজ ছেড়ে গেছে বিষাদিনী ॥

যথা পূর্ণিমার শশী, ঢাকি কাদম্বিনী-রাশি,

হয় গো মলিন যেমন সেই মুখশশী,—

ওগো মলিনা সেই হেমকান্তি, বসন্তে যেমন নলিনী ॥

সংসার-উজান'পরে সোনার লতা সুসমীরে,

হেলিত ছলিত সদা সোহাগের ভরে,

বিধি বাদী হ'ল তাতে, পড়িল ভীষণ অশনি ॥

বিষমঙ্গল । শোভা ?

সুদেব । যেখানে শাস্তি, সেইখানেই শোভা । শাস্তির চিরসঙ্গিনী শোভা

বোধ হয়, শাস্তির সঙ্গিনীই হ'য়েচে !

বিষমঙ্গল । ব্যবস্থা ঠিকই হ'য়েচে,—মহাপাপীর উপযুক্ত প্রায়শ্চিত্ত

সম্পূর্ণভাবেই সম্পন্ন হ'য়েচে ! শাস্তি গেচে, শোভা গেচে, তুমিই আছ ;

এই বিশালপুরী শূন্যাকার, তুমিই তা পূর্ণ ক'রে রাখ ! সুখের আলোক
নিভেচে, অন্ধকার ঘিরেচে ; তুমিই এ অন্ধকারে উপবিষ্ট হ'য়ে,
জগৎবাসীকে হুঃখের গীতি শ্রবণ করাও ! আনন্দের মেলা ভেঙ্গে গেচে,
উৎসব লীলা সাক্ষ হ'য়েচে ; অতীতের স্মৃতিস্বরূপ, এই পাষাণের
অপকীর্তির সাক্ষীস্বরূপ তুমিই এ সংসারবক্ষে বিরাজ কর ! সুদেব !
তুমিই এ শ্মশান-পুরীতে এখন সন্ধ্যা দাও ।

সুদেব । কেন ? কোন্ অপরাধে ?—কোন্ অপরাধে সুদেবের প্রতি আজ
এই কঠোর আদেশ ? কোন্ অপরাধে এই কঠোর কর্তব্যের ভার এই
আশ্রিত সেবকের উপর অর্পণ ক'রুচেন ?

বিদ্বমঙ্গল । অপরাধ, তুমি পাষাণ নও ; অপরাধ, তুমি বিশ্বাসঘাতক নও ;
অপরাধ, তুমি সেবকের চির-সেবিত ধর্মের অনধিকারী নও । সুদেব !
সুদেব ! আমি মহাপাপী, আমি বিশ্বাসহস্তারক, আমি প্রতিপালক
হ'য়েও প্রতিপালন-ধর্ম বুদ্ধি নাই ; আমি আশ্রয়স্থান অধিকার ক'রেও
আশ্রয়-স্থানীয় হ'তে পারি নাই !—

মানবরূপেতে আমি ছরস্তু দানব ;—
সুখের অমরাবতী করি ছারখার,
ধ্বংস করি দেব-কীর্তি, শাস্তি-রক্তভূমে
করিয়াছি প্রবর্তন পিশাচের লীলা !
নন্দনের পারিজাত সমূলে তুলিয়া,
করিয়াছি ভস্মীভূত জলস্তপাবকে !
নিতাস্ত অধর্ম্যচারী আমি রে পামর ;—
উদ্ভান-পালিতা-লতা সদা প্রফুল্লিতা,
স্বহস্তে তুলিয়া তারে সঘন্থে আনিয়া,
স্বহস্তে হৃদয়-কুঞ্জে করিয়া রোপণ,

সোহাগ-সলিল-সেকে করিয়া বর্জিতা,
 স্বহস্তে কুঠারাঘাতে ক'রেছি ছেদন !
 একান্ত পাষণ আমি, নির্দয়, নিশ্চয় !
 সর্বশূণে নিরুপমা, মমতাক্রপিনী,
 সোহাগের রক্তখনি ভক্তি মূর্ত্তিমতী,
 প্রেমের প্রতিমা হার স্থাপিয়া মন্দিরে,
 না করিয়া উষোধন, না করিয়া পূজা,
 ষষ্ঠীর বাসরে তার ক'রেছি বিজয়া,—
 দিয়েছি রে বিসর্জন অশান্তি সলিলে !
 নিষ্ঠুর, নিষ্ঠুর আমি ছর্কুস্ত নিষাদ,
 বনবিহারিণী হার, সরলা হরিণী—
 মনানন্দে ফিরিত রে কানন-নিবাসে,
 পাতিয়া স্নেহের ফাঁদ মারা-ইন্দ্রজালে,
 বাজারে মোহনবাণী শ্রেনের সঙ্গীতে,
 আনিবে সে ফাঁদে তারে বাধিয়া উল্লাসে,
 নিশিত বিচ্ছেদ-শর করিয়া নিষ্কেপ,
 বিধিলাম মর্মে তার ; পড়িয়া ধরায়,
 ধূলার লুপ্তিত-কার যার গড়াগড়ি !
 কে জানে রে, সে কি জালা, কি তীব্র যাতনা !
 দানব, দানব আমি মানব-আকারে !

সুদেব ।

এখন আর অমৃতাপে ফল কি ?

বিষমঙ্গল ।

অমৃতাপে ফল নাট ? সুদেব নির্বোধ !

একমাত্র অমৃতাপ উপায় এখন ।

হারিয়েছি চিরমুখ অদৃষ্ট-বিপাকে,

হারিয়েছি চিরশান্তি নিজ-কৰ্মদোষে,
 হারিয়েছি ইহকাল প্রবৃত্তি-পীড়নে,
 হারিয়েছি পরকাল পাপের কুহকে ।
 অণু আর কিছু নাই মঙ্গল এখন,
 অনুতাপ, অনুতাপ উপায় আমার !
 অনুতাপ সঙ্গে ম'রে বসিয়া বিজনে,
 অতীতের অপকীর্তি করিয়া স্মরণ,
 নিক্ষেপি নয়ন-বারি, কিবা দিবানিশি
 দারুণ অশান্তি-জালা করিব শীতল !
 অথবা সূদেব !
 পূৰ্বকৃত কৰ্মরূপ ইন্ধন-‘স্তুপেতে,
 জ্বালাইয়ে অনুতাপ-অনল ভীষণ,
 প্রবেশিয়ে তার মাঝে আমি রে পামর,
 মরিব পুড়িয়া হায় ইহ-পরকালে !
 সূদেব ! সূদেব । কি নিষ্ঠুর আমি !—
 অবিচারে অবলায়ে কাঁদিয়েছি কত,
 দিয়েছি রে সরলায়ে মরম-যজ্ঞগা ।
 পতিব্রতা সাধবী-সতী দিনেকের তরে
 পায় নাই স্বধশান্তি পায় নাই মনে !
 সংসার-মলামভূতা লবঙ্গ-মতিকা
 ধূলিধূসরিতা হায় লুপ্তিতা, দলিতা,
 চিরদিন, চিরদিন ; দোলে নাই কত
 সোহাগ-সমীর-তরে সহকার শাখে !
 জলে ছল ছল আঁধি; মলিন-বদনে

বাতাহতা লতা যেন একদিন হার,
 প'ড়েছিল চরণেতে আছে রে স্মরণ !
 চাই নাই, চাই নাই ফিরি মুখপানে,
 করি নাই আশ্রয়, মধুর কথায়,
 হয় নাই স্নেহোদয়, পাষণ হৃদয়ে !
 পড়িয়া ঠিষ্ঠুর-করে দানব পীড়নে,
 সোহাগ পুতলী সেই কমল-কলিকা,
 দহিয়াছে চিরদিন সন্তাপ-অনলে ॥
 সুদেব ! সুদেব ! কি পাষণ্ড আমি !
 এখনও বিদীর্ণ নাহি হইল হৃদয় ;
 রাজরাজেশ্বরী প্রায় ঐশ্বর্যা-ঈশ্বরী,
 আজ কি না অনাথিনী কাল্মলিনী হ'য়ে
 কোথায় যে ফিরিতেছ বুক ফেটে যায় !
 সে পাপের প্রায়শ্চিত্ত নাহি রে আমার !

গীত

দহিল মরম, দহিল জীবন ।
 অসুতাপ-হৃৎশন, ধিকি ধিকি অলিতেছে দিবাবিভাবরী ।
 মরি রে মরি রে হার দারুণ দাহন ।
 পতিব্রতা, সতীসাক্ষী গুণে নিরুপমা,
 মৃতিমতী শাস্ত, যেন প্রেমের প্রতিমা,
 নিদয়-হৃদয় পাষণ্ড আমি রে ;
 ছুঃখের সাগরে তারে দিলাম বিসর্জন ।

হ'য়ে রাঙ্করাণীসম, ঐশ্বর্যভাগিনী,
 আশ্র কি না অনাধিনী পথের ভিখারিণী,
 সস্তাপতাপিনী, বড় ছুঃখিনী রে ;--
 গিয়েছে জীবন তার করিয়ে রোদন ।

সুদেব । যখন আপনি এসেছেন, তখন শাস্তিও আসবে । যেখানে আরাধ্য-
 নিধি, সেইখানেই আরাধিকা । অন্ধের যখন দৃষ্টিশক্তি হ'য়েচে, রক্তের
 উজ্জলতা যখন তার চক্ষে লেগেচে, তখন সেই অযত্ন-উপেক্ষিত রক্ত
 আবার এই অন্ধকারপুরা আলোকিত ক'রবে । শাস্ত হ'ন্, সেই
 শাস্তি মেঘের সূশীতল ধোম-বারিধারায় অচিরেই এই অশাস্তির জ্বালা
 নির্দাপিত হবে ।

বিল্বমঙ্গল । সুদেব ! ভ্রান্ত ! কি সাহসনা প্রদান ক'রে শাস্ত হ'তে বল্চ ?
 আবার শাস্তি আসবে ? আবার এই অশাস্তির অমাবস্থায় শাস্তি-চক্রমার
 উদয় হবে ? পাগল ! এ বিশ্বাস এখনও কর ? শাস্তি আর আসবে
 না ; আমার চির শাস্তির সহিত সেই ছুঃখিনী শাস্তি, চিরদিনের জন্য
 মহাপ্রস্থান ক'রেচে রে, মহাপ্রস্থান ক'রেচে ! শাস্তির আর আশা
 নাই ; ইহলোকেও নাই, বোধ হয় পরলোকেও নাই ! সেই অনাদর-
 উপেক্ষিতা পতিব্রতা পতিপ্রেম-পিপাসায় একান্ত আকুল হ'য়ে, অনাধ-
 বন্ধু শ্রীপতিরূপী নবনীরদের শীতল আশ্রয় গ্রহণ ক'রেচে ! হাঁ রে
 নির্কোষ ! যে অমুক্তগণ সংসার-সস্তাপে সস্তাপিত, মনহুঃখে মর্ষাহত,
 নিরাশায় নিতান্ত উৎপীড়িত হ'য়ে, একবার সেই সস্তাপহরণ, ছুঃখ-
 নিবারণ, বাঞ্ছাকল্পতরুর সূশীতল আশ্রয় গ্রহণ করে, সে কি আর কখন
 সংসার মরুভূমিতে ফিরে আসতে চায় ? আর একটা কথা সুদেব !
 সংসারের শাস্তি একবার গেলে, আর কি কিছুতে ফিরে পাওয়া যায় ?

সুদেব । মা যে আমার বড় ছুঁখেই গেছে, তার আর কথা কি ! কে আর সাধ ক'রে, সাধের খেলাঘর ভেঙ্গে দিতে পারে ? সেই হাসিমুখে কখন হাসি দেখি নাই ;—দিবানিশি ভেবে ভেবে সোণার প্রতিমা, ঘোর মসিমাখা হ'য়েছিল ! দেখলেই মনে হ'ত, যেন শরতের শশিকলা পূর্ণিমায় পূর্ণ হ'তে না হ'তে, চতুর্দশী-বাসরেই ছরস্তু রাস্তুর করালকবল-পতিতা হ'য়েচে ! সেই নয়ন-ধারা যে দেখেচে, সে কি আর নয়ন-ধারে প্রবোধবাঁধ দিয়ে রাখতে পেরেচে ? সে ধারার বিরাম নাই, বিশ্রাম নাই, বিরতি নাই ; যেন গোমুখীর মুখ-নিঃসৃত জাহ্নবী-ধারা. অবিরল-গতিতে নিরাশা-সাগরে প্রবাহিতা হ'চ্ছে ! তার প্রতি-নিশ্বাসে শোকের উচ্ছ্বাস, প্রতিবাক্যে নিরাশ-বিগ্নাস ; অবকাশ কখনও পায় নাই,— মনের ছুঁখ প্রকাশ ক'রে, মর্শ্ব-যাতনা লাঘব-ক'রতে, মা আমার এমন অবকাশ কখনও পায় নাই !—তার যে ছুঁখের আক্রমণই অনুক্ষণ !

বিশ্বমঙ্গল । আর না, আর না সুদেব ! এই দাবানল-বিদগ্ধ বিটপি শিরে আর বজ্রের আঘাত ক'র না ! স্মৃতি-বিষধরী মর্শ্বের অন্তস্তলে দিবারজনী বিষম দংশন ক'রুচে ; আর সেই কালভূজঙ্গিনীকে উত্তেজিত ক'র না ! সুদেব ! আমি আজ নিতান্ত ভিখারী ; ধনের নয়, ঐশ্বর্যের নয়, বিভবের নয়,—কেবল দয়ার ভিখারী । দয়াহীন মানুষের কাছে এবং দয়াময় শ্রীহরির কাছে, সকলের কাছে আজ আমি সমানভাবে দয়ার ভিখারী । তোমরা আমাকে দয়া কর । সুদেব ! কৃতজ্ঞ ! প্রভুতজ্ঞ ! তোমরা আমাকে দয়া কর । তোমার প্রভুরূপী এই হতভাগ্য বিশ্ব-মঙ্গলের এই শেষ কথা, এই শেষ কামনা, এই শেষ আদেশ প্রতিপালন কর । চিরদিন যে ভাবে কর্তব্য প্রতিপালন ক'রে আসূচ, এই শেষ কর্তব্যও সেইরূপ পূর্ণভাবে প্রতিপালন কর । বল, আমার শেষ আদেশ পালন ক'রবে ত ?

সুদেব । বাঁর অয়ে চিরজীবন সুখ-স্বচ্ছন্দে প্রতিপালিত হ'য়ে আস্চি, তাঁর আদেশ-পালনে সুদেব প্রাণের মায়াও করে না ।

বিষমঙ্গল । শোন সুদেব ! এই দেখ, দুঃখিনী শান্তির অঙ্গের আভরণ স্তরে স্তরে সাজান আছে, এ অঙ্গের সাজ কখনও তার অঙ্গে উঠে নাই ! সুদেব রে ! পতি, সতীর জীবনের সকল শোভা ; সেই স্বভাবের শোভাময়ী শান্তি আমার সে শোভায় চিরদিন বঞ্চিত ; তাতেই এ রক্ত-আভরণের ছার শোভা তার কাছে অযত্নেতেই উপেক্ষিত ! এক কাজ ক'র, শান্তির এই অঙ্গের আভরণরাজি কোন পতিব্রতা ব্রাহ্মণ-কন্তাকে প্রদান ক'র ; ব'ল, কোন পতিবিরহিণী পতিব্রতার এ অঙ্গের সাজ বড় সাধের ; এ সাজে তোমার অঙ্গ সজ্জিত ক'রে, প্রাণপতির নয়ন-শোভা বর্ধন ক'র, তাহ'লেই সেই বিষাদিনীর মনের সাধ পূর্ণ হবে । বিষমঙ্গলের বিদায়-সাধ বুঝতে পারলে ত ?

সুদেব । সুদেবকে যে আজ একরূপভাবে বুঝতে হবে, এ হতভাগ্য স্বপ্নেও কখন তেমন সাধ করে নাই !

বিষমঙ্গল । আর এক কাজ ; ঐ যে দেওয়ালের গায়ে মুক্তার ঝালর দেওয়া পাখা, উহা শান্তির বড় সাধের ধন ; কিন্তু এ সাধের ধনে সে বিষাদিনীর মনের সাধ কখনও পূর্ণ ক'রতে পারে নাই ! সেই ভয় বিরহিণী স্বামীর চরণতলে উপবিষ্টা হ'য়ে দিনেকের জন্তও স্বামীর সস্তাপ-শান্তি বিদূরিত ক'রতে পার নাই ! এই পাখাখানি কোন সতীসাক্ষী সীমস্তিনীকে,—আমার শান্তির মত সতীসাক্ষী সীমস্তিনীকে—প্রদান ক'রে ব'ল, সে যেন তার স্বামীর চরণতলে উপবিষ্টা হ'য়ে, এই বিজনী-বাজনে তার পতিদেবতার সস্তাপ-শান্তি বিদূরিত করে ; তাহ'লেই শান্তির নিষ্ফল মনোসাধ সফল হবে । সুদেব ! বিষমঙ্গলের এই পরিণাম-সাধ পূর্ণ ক'রবে ত ?

সুদেব । কে জান্ত যে, সুদেবের পরিণাম এত বিষাদময় হবে !

বিষমঙ্গল । সুদেব ! আর একটা কাজ, এবং এই তোমার শেষ কাজ ।

সম্মুখে এই যে স্বর্ণ-সিংহাসন প'ড়ে আছে, বড় সাধ করে, শাস্তি একে শয্যা-গৃহে এনে রেখেছিল । সাধ ছিল, স্বামীসঙ্গে একাসনে এতে উপবিষ্ট হ'য়ে, মনের সাধে মনের কথা প্রকাশ ক'রবে ; কিন্তু এ পাষাণের দ্বারা তার সে সাধ ক্ষণেকের জন্তও পূর্ণ হয় নাই ! সতীর এই সাধের সিংহাসনে রাধাকৃষ্ণের যুগল-মূর্তি স্থাপনা ক'রে, সেই যুগলের শাস্তিমঙ্গল নাম দিও ; আর এই বিষমঙ্গল পরিত্যক্ত সমস্ত সম্পত্তি, শাস্তির মঙ্গল-কামনায় সেই শাস্তিমঙ্গলের সেবায় অর্পণ ক'রো । শাস্তিময় যেন শাস্তির কামনায় মঙ্গল করেন । দেখ সুদেব ! সেই বিষাদিনী শাস্তির অপূর্ণ সাধ পূর্ণ ক'রতে, যেন পলকের জন্তও অবহেলা ক'রো না !

সুদেব । এই মহাপ্রমাদের প্রত্যক্ষ সাক্ষীস্বরূপ হ'য়ে, হতভাগ্য সুদেব এই সংসার বক্ষে দণ্ডায়মান থাকবে, তাই কি নিশ্চয় সঙ্গল ?

বিষমঙ্গল । তাই নিশ্চয়-সঙ্গল সুদেব ! সেই সঙ্গলই ঋব-নিশ্চয় । সুদেব রে ! যে সংসারে দেবী-রূপিণী সতীসাধবীর স্থান হয় নাই, সে সংসারে কি এই দানবরূপী পাষাণের থাকা শোভা পায় ? বল সুদেব ! যে সম্পদ কখনও পবিত্রা পতিব্রতার সুখ-সন্তোকে আসে নাই, সেই সম্পদ কি এই পতিত মহাপাতকীর সুখ-সন্তোকে উপযুক্ত হ'তে পারে ? কি ব'লবে, শাস্তি মোর বনে বনে, অনিদ্রায়, অনশনে, তরুতলে জীবন-ধাপন ক'রুচে, আর আমি এই দ্বিতল-অট্টালিকায় উপবিষ্ট হ'য়ে, রাজ-ভোগে পরিপুষ্ট হ'ব ? সুদেব ! সুদেব ! তোমার এই সম্মুখের বিষমঙ্গল, সেই অতীতের সম্মোহন-বিমোহিত, মেহ-দরা-বিবর্জিত পাষণ-বিনির্মিত বিষমঙ্গল নয় ! দানবের পাষণ-কারা এখন মানবের মারা-

মমতা অধিকার ক'রে ব'সেচে ! (উদ্ভ্রান্তভাবে) ঐ দেখ, ঐ দেখ,
সরলাহরিণী দাবানলে ! ঐ দেখ, শান্তি আমার অশান্তি-অনলে দগ্ধ
হ'ছে ! ঐ দেখ, ঐ দেখ, পূর্ণিমার শশিকলা রাহু-কবলে ! ঐ দেখ,
ভ্রমর বিধাদরাহু শান্তি-চক্রমা গ্রাস ক'রেচে ! ঐ দেখ, শান্তি আমার
বিজনগহনে খাপদ-সঙ্কুল নিবিড়-কাননে পথহারা, দিক্‌হারা, পাগলিনী,
জ্ঞানহারা ! মরি রে, মরি রে ! কোমল অঙ্গ কণ্টক-আঘাতে ছিন্নভিন্ন,
সোনার অঙ্গে সর্বস্থানে শোণিত-চিহ্ন ! পারে না, পারে না,—কণ্টকময়
পথে আর ঠ'লতে পারে না ! ঐ দেখ, শান্তি আমার পর্বত-কন্দরে,
—মনুষ্যের সমাগম বিবর্জিত, ফলজলবিরহিত পর্বত-কন্দরে পাষণ-
শযাশায়িনী ! অনশনে, অনিদ্রায়, আত্মহারা উন্মাদিনী ! বাঁচে না,
বাঁচে না ;—অনিদ্রা-অনাহারে আর বুঝি বাঁচে না ! ঐ দেখ, শান্তি
আমার জাহ্নবীকূলে—পতির ধ্যানে যোগাসনে সন্ন্যাসিনী ! মরি রে, মরি
রে ! ঈশানী যেন ঈশানের স্বরূপ-ধ্যানে নিমগ্না ! রাখে না, রাখে না,
পতি-বিরহের দেহ বুঝি আর রাখে না !—হায়, হায় ! যার যার ! শান্তি
বুঝি সস্তাপের দেহ জাহ্নবী সলিলে বিসর্জন দিতে যার ? যেও না, যেও
না শান্তি ! সাধের জীবন অকালে বিসর্জন দিতে যেও না !—কথা
শুনবে না ? প্রাণ রাখবে না ? কই যাও বেগি !—

(মুচ্ছিত হইয়া পতিত)

(পুনর্বার উথিত হইয়া)

একি শান্তি ! একি শান্তি ! কি অপূর্ব ভাব !
শান্তির কোলেতে শান্তি করিছে বিরাজ !
নিভেছে অশান্তি-জালা হ'য়েছে শীতল,
বিরহ-সস্তাপ-খাস নিরাশার দাহ,
নাহি আর, নাহি আর, স্মৃশাস্ত সকলি,

শান্তি-সঙ্গে, শান্তি-অঙ্গে, অপূর্ব-মিলন !
 ভক্তি-জলে করি স্নান আবার কখন,
 শান্তি-কুম্বেরে তুলি অঞ্জলি অঞ্জলি,
 আনন্দ-চন্দন-চূয়া করিয়া চর্চিত,
 শান্তিময় চরণেতে দিতেছে উল্লাসে ।
 মরি রে, মরি রে শান্তি ! কি সাধনা তোর !
 আবার কখন ওই বিরজা-পুলিনে,
 গোপীকা সঙ্গিনী হ'য়ে মাতোয়ারা প্রাণে,
 গাহিতেছে শান্তি-গীত মাতায় গোলাক ;
 আনন্দে বিভোর শান্তি, আনন্দে বিভোর !
 আবার, আবার ওই রাধাকুঞ্জ মাঝে,
 পুঞ্জ পুঞ্জ তুলি ফুল বাছিয়া বাছিয়া,
 বিনাসূত্রে গাঁথিতেছে বনফুলে মালা,
 সূচিকণ, সূচিকণ, ভুবন-উজ্জ্বলা ;
 পরিতেছে গলা বেড়ি, আবার খুলিয়া
 দিতেছে কালার গলে, রাস-কুঞ্জচারী,
 মালা-বিনিময় করে বনমালীসনে !
 কার শান্তি, কার হ'ল, হরি, হরি, হরি,
 বল শান্তি হরিবোল, হরি, হরি, হরি,
 বলি আমি হরিবোল, হরি, হরি, হরি !

(মূর্ছিত ও পতিত)

সূদেব । হরি হে ! তোমার ইচ্ছায় সবই সম্ভব হয় । পাষণে রসের সঞ্চারণ,
 মক্কতুমিতে সলিল-প্রবাহ, তোমার ইচ্ছায় তাও অসম্ভব নয় ! আজ

অত্যাচারী দানব, কাল করুণাময় দেবতা ; আজ দস্যুরূপী, নর-
হস্তারক, কাল মহর্ষি পরমসাধক । তারকব্রহ্ম ! তোমার ইচ্ছা না
হ'লে কি রত্নাকর কবিগুরুরূপে অধিষ্ঠিত হ'য়ে, রামায়ণ-পাথার জগৎ
মাতাতে সমর্থ হ'ত ? ধন্য তুমি ইচ্ছাময় ! আর ধন্য তোমার
অপ্রতিহতগতি ইচ্ছা-শক্তি ! এমন পাষণ্ডদলন, অকাট্য ঔষধির
বিধি কৃপানিধি ! তুমি ভিন্ন আর কে ক'রতে জানে ?

গীত

দীন দয়াময়, তব লীলাচয়, এ ভবের মাঝে বল কে বুঝিবে !

তুমি কখন করে হাসাও, কখন করে কাঁদাও,

কখন করে ভাসাও আনন্দ-অর্ণবে ॥

আজ দেখি যারে রাজসিংহাসনে, সুসজ্জিত-দেহ রতন-ভূষণে,

কাজালবেশে পুনঃ হেরি সেই জনে,

এ চাতুরী হরি তোমারই সম্ভবে ॥

পাষণেতে দেখি রসের সঞ্চার, ছরন্তু দানব দয়ার আধার,

হেরি মক-মাঝে হরি, শান্তি-সরোবর—

ওহে তোমারই কৃপায় কেবল এই ভবে ॥

বিষমঙ্গল । (উক্তি হইয়া)

কার শান্তি কার হ'ল ? হরি হরি বল !

তুমি দিয়েছিলে শান্তি, তুমি নিলে হরি ;

লও শান্তি, লও শান্তি, শান্তিময় তুমি,

দাও শান্তি, দাও শান্তি, শান্তি-বিনিময়ে ।

তুমি দিয়েছিলে শান্তি, কিন্তু হে শ্রীকান্ত,
 ভ্রান্তি দিয়ে ভুলাইয়ে রেখেছিলে তুমি,
 চিন্তাবশে চিন্তাহারা করিয়ে আমার,
 শান্তি যে কেমন তা ত দিলেনা চিন্তিতে !
 দাও শান্তি, দাও শান্তি, ভ্রান্তি লও ফিরি,
 আমি হরি, ভ্রান্ত অতি, পথহারা ভবে,
 কোন্ পথে যাব বল, কোন্ পথে পাব,
 শান্তি-রাজ্য, শান্তি-কুঞ্জ, শান্তি-নিকেতন ।
 একদিন শান্তি-রাজ্যে রাজা ছিঁছু আমি,
 ছিল শান্তি বিরাজিতা শান্তি-কুঞ্জমাঝে ।
 কৰ্মদোষে ভাগ্যবশে সংসার-সংগ্রামে,
 অশান্তি হুঁস্বারবলে করি পরাজিত,
 হরিমাছে শ্রীহরি হে ! সৰ্বস্ব আমার ।
 দাও শান্তি, দাও শান্তি, শান্তি-ভিখারীয়ে !
 হৃদয় অশান্ত বড়, অশান্তি-পীড়নে,
 রাধাকান্ত ! রাধাকান্ত ! কি বলিব আর,
 একান্ত অনাথে দাও, অভয় আশ্রয় ।
 নাহি শিক্ষা, নাহি দীক্ষা, নাহি দীক্ষা-গুরু,
 নাহি পথ-প্রদর্শক, নাহি নিদর্শন !
 মোক্ষদাতা, মোক্ষদাতা, রক্ষা কর আজ,
 দাও শান্তি, দাও শান্তি, শান্তি-ভিখারীয়ে !
 হরিনামে শান্তিলাভ, ব'লে হরি হরি,
 যাত্রা করি চলিলাম যা কর শ্রীহরি !

[সবেগে বিষমঙ্গলের প্রস্থান]

সুদেব । একে একে সকলেই সংসার-বন্ধন ছিন্ন ক'রে চ'লে গেল ; কিন্তু
 বল হে, ভব-বন্ধন-নিবারণ ! কোন্ অপরাধের প্রমাণবলে, এই হত-
 ভাগ্য সুদেবকে অচ্ছেদ্য কর্তব্য-শৃঙ্খলে আবদ্ধ ক'রে, ভব-কায়াগারে
 রেখেছিলে ? তাই রাখ হরি ! তোমার ইচ্ছা, তুমিই পূর্ণ কর । অন্ত
 তিক্কা ক'র্ব না । শক্তি দাও, সর্বশক্তিমান্ ! শক্তি দাও ; বেন
 মাতঙ্গের দুর্ভর ভার, ক্ষুদ্র পতঙ্গ বহন ক'রতে সমর্থ হয় !

[সুদেবের প্রস্থান ।

ষষ্ঠ দৃশ্য

[কল্যাণপুর]

সুকর্ণা ও নন্দার প্রবেশ

নন্দা । আমার দেরি হ'য়ে গেছে ; তুমি কতক্ষণ এলে ?

সুকর্ণা । প্রায় ঋণ পাঁচ ছয় হবে ; তুমি কোথায় গিয়েছিলে ?

নন্দা । যমুনার ঘাটে ; সেইখানেই বিলম্ব হ'য়ে গেল ।

সুকর্ণা । কেন, কদম্বতলায় শ্রামসুন্দরের দেখা পেয়েছিলে না কি ?

নন্দা । তুমিই আমার শ্রামসুন্দর,—নন্দার হৃদয়-কুঞ্জের তুমিই নব-নটবর ।

কমল-আঁধি ! তোমায় দেখি, আর আপনাপনি ভুলে থাকি ।

সুকর্ণা । সুকর্ণার যে আজ সুপ্রভাত দেখ্‌চি !

নন্দা । এমন কথাটা কেন শুন্‌চি ?

সুকর্ণা । নন্দার হৃদয়-কপাট যে খুলে গেছে ?

নন্দা । কপাটে যে ধাক্কা লেগেছে

সুকর্ণা । অন্তায় হ'য়েছে ; আর কখন লাগবে না । যমুনার ঘাটে বিলম্বটা

হ'ল কিসের জন্ত ?

নন্দা । একজন সাধু এসেছেন, সেইজন্ত ।

সুকর্ণা । সাধু এসেছেন, কোন্‌খানে দেখলে ?

নন্দা । আমাদের স্নানের ঘাটের উপরেই ব'সে আছেন ।

সুকর্ণা । ব'সে আছেন ! যত্ন ক'রে আনলে না কেন নন্দা ?

নন্দা । তিনি সাধু কি অসাধু, সেটা ভাল বুঝতে পারলেম না । সেইজন্তই

আর আনবার চেষ্টা ক'রলেম না ।

সুকর্ণা । সাধুকে সাধু কি অসাধু ব'লে বুঝতে পারলে না ; কথাটা কিরূপ হ'ল ?

নন্দা । তিনি সাধু হ'তে পারেন ; কিন্তু তাঁর চক্ষু ছটো এখনও অসাধুই আছে ।

সুকর্ণা । ব্যাপারটা কি ?

নন্দা । তাঁর ব্যবহার দেখে অবাক হ'য়েছি ; তিনি আমার প্রতি বেরূপ একদৃষ্টিতে চেয়ে রইলেন, দেখেই আমার আত্মা-পুরুষ উড়ে গেছে !

সুকর্ণা । তাঁর দৃষ্টির সঙ্গে তোমার আত্মা-পুরুষের সম্বন্ধ ?

নন্দা । পর-জীবীর প্রতি সেরূপ নয়ন-ভঙ্গি সাধুর পক্ষে কখনও সম্ভব নয় । তাতেই ব'ল্চি, তিনি সাধুবেশ-ধারণ ক'রেছেন সত্য ; কিন্তু তাঁর চক্ষু ছটো সাধুতা-শিক্ষা করে নাই ।

সুকর্ণা । পর-জীবীর প্রতি একাগ্র দৃষ্টিপাতটাই কি অসাধুতার একান্ত লক্ষণ ব'লে মনে কর ? সিদ্ধাস্তটা বড় নূতন ধরণের বটে !

নন্দা । সংসার-বিরাগী সন্ন্যাসীর পর-রমণীর প্রতি সতৃষ্ণ কটাক্ষদৃষ্টি,—যাঁর দৃষ্টিতে কপট-লম্পটের লক্ষণ না হ'য়ে, সংযমী সাধুর লক্ষণে পরিগণিত হয়, তিনিও বিধাতার একটা নূতন সৃষ্টি বটে !

সুকর্ণা । দোষটা কি হ'ল নন্দা ?

নন্দা । দোষটা তত কিছু নয় । তিনি অঙ্গে ভস্ম লেপন ক'রেছেন বটে, কিন্তু তাঁর অপাঙ্গে এখনও কামনা-অঙ্গন মাখানো আছে ! তিনি সংসার পরিত্যাগ ক'রেছেন সত্য, কিন্তু এখনও কামিনী-কাঞ্চনের লোভ পরিত্যাগ ক'রতে পারেন নাই ! নয়ন যাঁর রাধারমণের চরণারবিন্দের অপরূপ শোভাদর্শনে নিয়োজিত, তাঁর দৃষ্টি কি কখন রমণীর রূপ-লাবণ্যে নিপতিত হয় ?

সুকর্ণা । এই কথা ? কিন্তু নন্দা ! ভেবে দেখলে তুমিই মূলে ভুল ক'রে

ব'সে আছ ! কার্যের আচরণ দেখে, স্বভাবের লক্ষণ জানা যায় বটে ; কিন্তু তার আগে কার্যের উদ্দেশ্যটাও জানা কর্তব্য । কার্য একরূপ হ'লেও উদ্দেশ্য পৃথকরূপ হ'তে পারে ।

নন্দা । তোমার কথার উদ্দেশ্য বুঝতে না পাবলে, উত্তর দিতে পারি না ।
সুকর্ণা । ভাল কথাই বটে ! মনে কর, একটি গাছে কতকগুলি সুন্দর সুন্দর ফুল ফুটেচে ; তিনটি লোক এসে সেই ফুলগুলি তুলে নিয়ে গেল । তার মধ্যে কেউ বা সেই ফুলে ঈষ্টদেবতার চরণ পূজা ক'রবে ; কেউ বা তাতে মালা গেঁথে, সেই মালার বিনিময়ে উদর-পোষণের উপায় ক'রে নেবে, আবার কারো দ্বারা সেই ফুলেতে বারান্দনার কেশ-বিষ্ঠাসের শোভা বর্ধনের উপকরণ হবে । কার্য তিন জনেরই এক, কিন্তু প্রত্যেকের উদ্দেশ্য সম্পূর্ণ পৃথক্ ।

নন্দা । তার পর ?

সুকর্ণা । সেইরূপ এখন ভেবে দেখ, তুমি গাত্র-বসন উন্মোচন ক'রে, ষমুনার ঘাটে স্নান ক'রচ ; তোমার এই অলৌকিক রূপরাশি তিনজন পথিক সতৃষ্ণ-নয়নে দর্শন ক'রচে । তার মধ্যে একজন ভগবদ্ভক্ত পরম সাধু ; তিনি হয়ত একাধারে একরূপ অপরূপ রূপের সমাবেশ দর্শন ক'রে, বিশ্বস্রষ্টার অপূর্ব সৃষ্টিবৈচিত্র্য আশ্চর্য হ'য়ে, ভগবতচিন্তে ভগবানের অপার মহিমা চিন্তা ক'রচেন , দ্বিতীয় ব্যক্তি হয়ত পত্নী-শোক-বিধুর হতাশ প্রেমিক, তোমার রূপলাবণ্যের সঙ্গে তার সেই পরলোকগত প্রেমময়ী পত্নীর রূপলাবণ্যের সাদৃশ্য দর্শন ক'রে, পুনর্বার বিশ্বতপ্রায় অতীত পত্নী-শোকে অভিভূত হ'য়ে প'ড়েচে ; তৃতীয় ব্যক্তি হয়ত, পরস্ত্রী-আসক্ত লম্পট-পুরুষ, রমণীর সম্মোহন সৌন্দর্য্য-মাধুর্য্যে বিমুগ্ধ হ'য়ে, সম্ভোগলালসায় অস্থির হ'য়ে উঠেচে ! তা হ'লেই দেখ, কার্য সকলেরই একরূপ, কিন্তু উদ্দেশ্য সকলেরই পৃথক্ পৃথক্ ; একই বস্তুদর্শনে

কারও হৃদয়ে বা ভগবৎ-প্রেমের আবির্ভাব, কারও হৃদয়ে বা লালসার
ভীষ-যাতনা। এখন বুঝলে ত, কার্যের উদ্দেশ্য না জেনে, কোন
একটা বিষয়ই কুভাবে গ্রহণ ক'রতে নাই। কারণ, সকল বিষয়েরই
ভালমন্দ দুই দিক আছে। সেই সাধু হয় ত তোমার এই অপক্লপ
রূপের ছটায়, বিশ্বস্ততার অপূৰ্ব শিল্প-কৌশল দর্শন ক'রে, ত্রিশী-শক্তির
অসীম-মাহাত্ম্য আশ্চর্য হ'য়েছিল ; অল্প কারণে নয়।

নন্দা। তাহ'লেও, কার্যের ভাব দেখে উদ্দেশ্য বোঝা যায়। তুমি যাই
বল, তাঁর যেরূপ ভাব দেখ্লেম, তাতে বোধ হয়, নিশ্চয় তিনি
কপটাচারী।

সুকর্ণা। তাই না হয় স্বীকার করি ; তথাপি ত তিনি সাধুবেশধারী !
ধর্মের ভাগও ভাল।

নন্দা। এটা আবার কেমন কথা হ'ল ?

সুকর্ণা। মন্দই বা কিসে বল ?

নন্দা। তোমরা পুরুষমানুষ, তোমাদের কাছে কিছুই মন্দ নয় ; ধর্মের
ভাগ প্রণয়ের ভাগ, ভালবাসার ভাগ, সকল ভাগই তোমরা ভালরূপ
জান ; কপটতাই তোমাদের চিরদিনের সম্বল। কিন্তু যে চোর, সেও
ত চুরী করাকে কুকর্ম ব'লে স্বীকার করে ; তুমি যে দেখ্চি, তাও
স্বীকার কর না !

সুকর্ণা। নিখাদ হ'তে একেবারেই সপ্তমে টিপ্ দিলে দেখ্চি !

নন্দা। অভিনয়-ক্ষেত্রের অবস্থা দেখেই দিতে হ'ল ; এক টিপ না দিলে,
সুর বাজে কৈ ? ব'লে কি না, ধর্মের ভাগও ভাল ; কিন্তু বল দেখি,
দস্যু অপেক্ষা সাধুবেশধারী দস্যুর দ্বারা অধিকতর সর্বনাশ-সাধন হয়
কি না ? দস্যু দেখে লোকে সাবধান হ'তে পারে, কিন্তু সাধুবেশধারী
কপটাচারীকে দেখে, সে সাবধান হবার প্রয়োজন হয় না। পথে

কাল-ভূজঙ্গ দেখলে লোকে স'রে দাঁড়ায় ; কিন্তু ছুইয়ের সহিত বিষ
মিশ্রিত ক'রে দিলে, কারও না কারও তাতে প্রাণ যায় । যেখানে
কপটতা, সেইখানেই সর্বনাশ ।

সুকর্ণা । মহশ্রবার তা স্বীকার করি ; কিন্তু অন্য দিকটাও দেখা উচিত ।
ধেমনি সঙ্গ, তেমনি স্বভাবের গতি ; ফুলের সঙ্গে থাকে ব'লেই, ঘৃণিত
কীটও দেবতার চরণে স্থান পায় । সন্ন্যাসবেশধারী কপটাচারী হ'লেও,
কেবল সেই সন্ন্যাস-সাজের সুসঙ্গ-প্রভাবে ক্রমে সে সৎপথের পথিক
হ'য়েই দাঁড়ায় ; তা নৈলে আর সৎসঙ্গের এত প্রশংসা কেন ? তাতেই
বলি, ধর্মের ভাণ্ড ভাল ।

নন্দা । তুমি যা ভাল বল, আমার তাই ভাল । এখন একবার স্থির হ'য়ে
ব'স ; পরিশ্রম ক'রে এসেচ, সর্কাজে ঘাম ছুইছে, একটু বাতাস
করি ।

অতিথিরূপী নারদের প্রবেশ

নারদ । দ্বারে অতিথি, ভিক্ষা দাও মা !

সুকর্ণা । আনুন, আনুন ; অতিথির পক্ষে এ দ্বার অনুক্ষণই অব্যবহৃত ।

নারদ । যুষ্টির ভিখারী, ভিতরে যাবার প্রয়োজন নাই !

সুকর্ণা । (নন্দার প্রতি) তবে ভিক্ষা দিয়ে এস ।

নন্দা । (নারদের প্রতি) একটু অপেক্ষা করুন ।

নারদ । বেশী অপেক্ষা করবার আমার সময় নাই ।

নন্দা । শীঘ্র ভিক্ষা দিবারও আমার উপায় নাই ।

নারদ । (অগ্রবর্তী হইয়া) অভ্যাগত অতিথিকে শীঘ্র ভিক্ষা দিবার উপায়
নাই ! কারণ ?

নন্দা । আমি এখন স্বামি-শুশ্রূষায় নিযুক্ত ।

নারদ । বড় আশ্চর্যের কথা ! অতিথির মন্তব্য-সাধন না ক'রে, স্বামি-
শুশ্রূষা সম্পাদন ক'রবে ?

নন্দা । আগের কাজ অবশ্যই আগে ক'রব !

নারদ । আগের কাজ কোন্টা ?

নন্দা । যবে যদি আপনার পতিব্রতা সহধর্মিণী থাকেন, তবে তাঁকে
জিজ্ঞাসা ক'রবেন ; তাঁর কাছেই এ কথার উত্তর পাবেন ।

নারদ । (সক্রোধে) জ্ঞান, আমি ব্রাহ্মণ !

নন্দা । গঙ্গায় যজ্ঞোপবীত দেখে তা ত বেশই জানতে পার্চি !

নারদ । ব্রাহ্মণের ক্রোধানলে ভস্মীভূত হবার ভয় রাখ না ?

নন্দা । ঠাকুর ! ভস্মীভূত ক'রবার ক্ষমতা থাকলে আর জঠরানলের তীব্র
দাহনে অস্থির হ'য়ে, অঙ্গে ভস্ম-বিভূতি মেখে, পরের দ্বারে ভিক্ষা
ক'রতে আসতে না ! অতিথি এসেচেন, উপবেশন করুন ; যথাসময়ে
যথাসাধ্য পূজা প্রদান ক'রব । অতিথি আমাদের পূজনীয়
পরমদেবতা !

নারদ । তোমার মত ধর্মহীনার নিকট রাজ্যধন পেলেও তাতে অভিলাষ
করি না !

নন্দা । হ'তে পারে আমি ধর্মহীনা, কিন্তু ধর্ম আমাকে ত্যাগ করে নাই ।
কায়মনে পতির চরণ-সেবা, যদি নারী-জীবনের পরমধর্ম হয়, তবে সে
ধর্ম আমি অনুক্ষণই প্রতিপালন ক'রে থাকি । অতিথি ! গর্ব করি
নাই, অহঙ্কারেরও কথা নয়, স্বামি-সেবা সঙ্গ না হ'লে, অতিথির
পরিচর্যা ত দূরের কথা; নারায়ণের সেবাতেও মনস্তৃষ্টি হয় না ।

নারদ । পতিকে তুমি একরূপ পরম-দেবতা ব'লে জ্ঞান কর ?

নন্দা । পতিব্রতার পতি হওয়া বোধ হয়, আপনার ভাগ্যে কখন ঘটে নাই ;
তাহ'লে আর এ কথার উত্তর আজ আমাকে দিতে হ'ত না ? শুধু

আমি কেন, সতীমাত্রেই স্বামীকে পরম-দেবতা ব'লে জ্ঞান ক'রে থাকে। ব্রাহ্মণ! তা কি কখনও শোনেন নাই? রমণীর পতিই আরাধ্য, পতিই আরাধনা, পতিই তপস্বী, পতিই সাধনা; যে কাশ্মনে পতি-পূজা ক'রে থাকে, তাকে আর নারায়ণের পূজা ক'রতে হয় না; কারণ, পতিই সতীর মোক্ষদাতা। যে রমণী একান্ত অন্তরে স্বামীর চরণ-ধূলা গ্রহণ করে, তার আর তীর্থযাত্রার প্রয়োজন হয় না; কারণ, স্বামীর রণই সর্বতীর্থের ফলপ্রদ। কি আর ব'লব দ্বিজবর! যে হতভাগিনী নারী-জন্ম গ্রহণ ক'রে, পতিভক্তি শিক্ষা করে নাই, স্বয়ং মুক্তিদাতা ভগবান্ও কখন তাকে মুক্তি দিতে পারেন না। এই সংসার তপোবনে রমণী-জীবনে স্বামীর সন্তোষ-সাধনই পরম তপস্বী। তাতেই বলি, অতিথি! ক্ষণেক অপেক্ষা করুন। এই স্বামি-সেবা-নিয়োজিতা অবলার প্রতি আকারণে ক্রোধ প্রকাশ ক'রে, ব্রাহ্মণ্য-তেজের অপচয় ক'রবেন না!

গীত

কিসের ভয় ভ্রাজ্জ দেখাও আমারে। (ওগো মুনি গো
 ও ভয়েতে নইক ভীত, নাহে সশঙ্কিত চিত,
 হয় না মন বিচলিত, নাহি কোন ভয় কারে ॥
 তুচ্ছ করি ছার সম্পদে, পতিপদ-কোকনদে,
 বিমোহিত মনভঙ্গ, ত'য়েছে আপন সাধে,
 কি বিপদে কি সম্পদে, স'পেছি মন শ্রীপদে,
 ভাবে সতী পদে পদে, পতিপদ অন্তরে ॥
 সকল ভয়ে হ'তে অভয়, ল'য়েছি পতিপদাশ্রয়,
 নাহি তাহে আর কোন ভয়, করি কি গো শমনের ভয়,

অপার এই ভবের বারি, নাহি তাহে শঙ্কা করি,
পতির চরণ তাহে তরী, পাড়ি দিব হস্তারে ॥

নারদ । আচ্ছা, সতি ! অপেক্ষাই ক'রুচি ; কিন্তু একটা কথা জিজ্ঞাসা করি, তোমাদের গৃহ হ'তে অতিথি যদি বিমুখ হ'রে ফিরে যায়, তা হ'লে তাতে কি তোমরা পাপের ভাগী হবে না ? শুনেচি, তোমার ঐ স্বামী যে অতিথি-সেবায়, জীবন-মন, ধন-ঐশ্বর্য, সকলই সমর্পণ ক'রেচে !

নন্দা । এ কথার উত্তর আমার স্বামী দেবেন,—আনার সঙ্গে এ উত্তরের কোন সম্বন্ধ নাই । অতিথির পরিচর্যা আমার স্বামীর জীবন-ব্রত, স্বামীর পরিচর্যা আমার জীবনের মহাব্রত ; অতিথির সন্তোষ-অসন্তোষের দায়ী আমার স্বামী, স্বামীর সন্তোষ-অসন্তোষের দায়ী আমি । যার যা কর্তব্য, সে তাই সম্পন্ন ক'রবে ।

নারদ । সে কি কথা মা ! তোমার স্বামীর ধর্ম্যকর্ম্য প্রতিপালনের দায়ী কেবল তোমার স্বামী, আর তুমি নও ? সতী যে পতির ধর্ম্য অর্ধের সাহায্যকারিণী, তা কি শোন নাই সতী ? ধর্ম্যরাজের আতিথ্য-ধর্ম্য-রক্ষার জন্ত বনবাসিনী দ্রুপদ-নন্দিনী, অতিথিগণের অপেক্ষায় যে সারাদিন যাপন ক'রতেন !

নন্দা । ব্রাহ্মণ ! সেটা তোমার নিতাস্তই ভুল । ধর্ম্যরাজের আতিথ্য-ধর্ম্য-রক্ষার জন্ত নয় ; নিজের সতীত্ব-ধর্ম্য রক্ষার জন্তই পাণ্ডব-রমণী দ্রুপদ-নন্দিনী, অতিথিগণের অপেক্ষায় অনশনে দিনযাপন ক'রতেন । দ্রৌপদীর প্রতি ধর্ম্যরাজের সেইরূপই আদেশ ছিল ; স্বামীর আদেশ পালনই যে রমণীর সার-ধর্ম্য । অনাহারে জীবন-যাপন ত সামান্ত কথা, স্বামীর আদেশে সতী, অনশনে জীবন-বিসর্জনও অনায়াসে দিতে পারে । স্বামীর আদেশপালনই যে সতী-জীবনের যোগ-সাধনা !

নারদ । কথাটা সচরাচর অনেকের মুখেই শুন্তে পাই বটে ; কিন্তু কার্যে

কখন কারো কাছে দেখা ঘ'টল না ।

নন্দা । সেটা আপনার ভাগ্য-বিড়ম্বনা । সতীসাক্ষীর পতি হওয়াও পরম-

সৌভাগ্যের কথা ; সে সৌভাগ্য যার হয়, সেই দেখতে পায় যে,

পতির আদেশে সতী সকল কার্যই ক'রতে পারে ।

নারদ । (স্বগত) ভাই দেখবার জন্মই ত নারদ আজ অতিথিবেশ-ধারণে,

তোমাদের এখানে উপস্থিত ! (প্রকাশে) আচ্ছা, মা ! সতীর সতীত্ব-

পরীক্ষা না দেখেও আজ আর যাচ্চি না ।

নন্দা । সতীর সতীত্ব-পরীক্ষা পতির কাছে, আর সেই সর্বান্তর্ঘামী

শ্রীপতির কাছে । সে পরীক্ষা অণু কাউকে দেখাবার প্রয়োজন হয়

না, এবং দেখবার কারও অধিকার নাই । দ্বিজবর ! সতীর পরীক্ষা

আপনি আর কি দেখবেন ? ধর্মরূপী স্বয়ং কৃতান্ত একদিন সে পরীক্ষা

দর্শন ক'রে, চিরদিনের জন্ম সতীত্বের সমাদর শিক্ষা ক'রেছেন । সতীর

পরীক্ষা যুগে যুগেই হ'য়ে আস্চে । সত্যে একদিন গহন-কাননে

কালের করাল-আক্রমণে সাবিত্রীর পরীক্ষা ; ত্রেতার জলন্ত-অনলে

সমুদ্রকূলে সীতার পরীক্ষা ; ছাপরে নন্দের গোকূলে যমুনার জলে

রাধার পরীক্ষা ! জলে, অনলে, শ্মশানে, মশানে সতীর পরীক্ষা সকল

স্থানেই হ'য়ে গেচে !

সুকর্ণা । অপরাধ মার্জনা করুন দেব ! অবলার সহিত বাক্চাতুরী

আপনার মত মহানুভবের শোভা পায় না ।

নারদ । তাতে আমি অসম্বৃত্ত নই,—পরম-সন্তোষলাভই ক'রেচি । পতি-

ব্রতার মনের তেজ, হৃদয়ের মহত্ব, জ্ঞানের গুরুত্ব দর্শন ক'রে, যথার্থই

চমৎকৃত হ'য়েচি ! তবে কার্যক্ষেত্রে এই তেজের সার্থকতা দেখতে

পেলেই জীবন সার্থক-জ্ঞান করি ।

সুকর্ণা । এখন তবে ভিক্ষা-গ্রহণে চরিতার্থ করুন ।

নারদ । সে জন্তু ব্যাকুল হবার প্রয়োজন নাই । তোমার আনন্দ-ভবনে ক্ষণকাল বিশ্রাম লাভের ইচ্ছা করি । যেখানে সতীসাক্ষী বিরাজমান, সেইখানেই সুখ-শান্তির অধিষ্ঠান, এবং সেইখানেই বিশ্রামের উপযুক্ত স্থান । তোমার মত অতিথির আশ্রয়স্থানীয় মহতের কাছে, আমার মত ভিখারীর আর সামান্য ভিক্ষার জন্তু ভাবনা কি ? অনাথ কাঙ্গালের পক্ষে তুমি যে পিতানাতাস্বরূপ !

সুকর্ণা । সে কেবল দীনবন্ধুর দয়া, আমার সাধ্য কি ?

নারদ । তুমি যে কঠোর ব্রতে ব্রতী, তাতে তোমার অসাধাই বা কি আছে ? তোমার মত আতিথ্য-পরায়ণ পুণ্যবান্গণ অতিথির সন্তোষ-সাধনে অনায়াসে ধন, জন, পত্নী, পুত্র সকলের মায়ী বিসর্জন দিতে সমর্থ হয় ! শুনেচি, মহাত্মা কর্ণ, এই আতিথ্য ধর্ম-পালনের স্কন্ধ, স্বহস্তে প্রাণ-পুত্রের নিধন-সাধন ক'রেছিলেন । প্রাতঃস্মরণীয় শিব-রাজ, স্বীয়-দেহের মাংস ছেদনেও কুণ্ঠিত হন নাই । তোমাদের জীবন-ব্রত বড়ই কঠোর ! তোমাদের এই অশুষ্ঠের-ধর্ম বড়ই কষ্টসাধ্য !

সুকর্ণা । কার সঙ্গে তুলনা ক'রুচেন ? ক্ষুদ্র মৃত্তিকাস্তূপ কি অদ্রিয়ারাজ হিমালয়ের সমকক্ষ হ'তে পারে ?

নারদ । তুলনায় আমার ভুল হয় নাই । সমাজে বা সম্পদে ছোট বড় হ'লেও, ধর্ম্যে বা কর্ম্যে নিশ্চয়ই তুমি তাঁদের সমতুল্য । অবস্থায় কখনও মানুষকে বড় ক'রতে পারে না ; যার হৃদয় বড়, সেই ষথার্থই বড়লোক । তা না হ'লে, লোকে বিশল্যকরণী উপেক্ষা ক'রে, শাল্মলীবৃক্ষেরই সমাদর ক'রত ! রাজসিংহাসনে উপবিষ্ট হ'লেই কি রাজা হওয়া যায় ?—রাজানাম লাভ হয় মাত্র ! যে মানুষ, মানুষের হৃদয়-সিংহাসনে উপবিষ্ট হ'তে পারে, সেই ষথার্থ কাজের রাজা । রাজ-

সিংহাসন শক্রতে অপহরণ ক'রতে পারে, কিন্তু হৃদয়-সিংহাসনের শক্র নাই ; এমন কি, পরম-শক্র কালও তা অপহরণ ক'রতে সমর্থ হয় না। ধনে কেবল রাজা সাজায় মাত্র ; মনের রাজাই প্রকৃত রাজা।

বিষ্মমঙ্গলের প্রবেশ।

বিষ্মমঙ্গল। (স্বগত) ডুবিলাম পুনর্বার বাসনা-সাগরে।
 আবির্ভাব ক্রবতারা, অশান্তি-বনেতে,
 হইলাম দিক্‌হারা, অবিষ্ঠা-আঁধারে,
 খণ্ড খণ্ড আশা-তরি মোহ-ঝঙ্কাবাতে,
 ভেঙ্গে গেল, জ্ঞান-হাল আসক্তি-তরঙ্গে ;
 ডুবিলাম পুনর্বার বাসনা-সাগরে !
 ধিক্ রে বিষ্ময় মন ! শতধিক তোরে ;
 স্বর্ণ-অট্টালিকা ত্যজি, রাজ-ঐশ্বর্য্য ভুলি,
 সুহৃদ-বান্ধবগণে দিয়ে বিসর্জন,
 ছিন্ন করি সংসারের মোহমায়া-ফাঁদ,
 অঙ্গে মাখি ছাই-শ্মশ্রু বৈরাগ্যের ভরে,
 গৈরিকবসন পরি, সন্ন্যাসীর সাজে,
 কি আশাতে এলি মন ! কি আশা সাধিলি ?—
 মায়ার মোহিনী-মন্ত্রে ভুলিলি আবার !
 ডুবালি, ডুবালি পুনঃ বাসনা-সাগরে !
 কোন্ পথে ল'য়ে যেতে, কোন্ পথে এলি,
 কি উদ্দেশ্য সাধিবারে, জানি না রে মন !
 ডুবালি, ডুবালি, পুনঃ বাসনা-সাগরে !

সুকর্মা । কে আপনি ?

বিষমঙ্গল । দিক্-হারা পথিক, সম্প্রতি অতিথি ।

সুকর্মা । আসুন ! এ গৃহ আপনাদেরই ।

নন্দা । (সুকর্মার প্রতি) ইনিই সেই সাধু ।

বিষমঙ্গল । (স্বগত)

রে নয়ন ! রে নয়ন ! কি দৃশ্য দেখালি !

কি কুহক-মন্ত্র দিগে ভুলাইলি মন,

রূপের ফাঁদেতে তারে ফেলিলি আবার ,

বাধিলি, বাধিলি পুনঃ কু-আশা-নিগড়ে !

কোথায় প্রবুদ্ধজ্ঞান, কোথা সতর্কতা ;

বিবেকের উপদেশ রহিল কোথায় ;

কোন্ ইন্দ্রজালে সব বিফল করিলি ?

শান্তিরূপা জাহ্নবীর সম্মুখ-উদ্দেশে,

বৈরাগ্য-তুফান তুলি, প্রবল বেগেতে,

বহিল রে মন-স্রোত ; কিন্তু রে নয়ন !

কি কোশলে,—কি কোশলে ফিরায়ে সে গতি,

কর্মনাশাতীরে তার করিলি মিলন !

করিলি রে সর্বনাশ, করিলি আবার !

ভ্রাস্ত মন ! ভ্রাস্ত মন ! তুই রে নির্কোষ !

কোন্ গুণে নয়নের এত বশীভূত ?

কোন্ জ্ঞানে নয়নের পরামর্শমতে,

চলিবি রে পদে পদে, পড়িবি বিপদে,—

তথাপি চেতনা লাভ হবে না কখন !

তাই যদি ছিল সাধ, নিতাস্ত রে তোয়,

রূপের শৃঙ্খলে বাঁধা, মোহ-কারা-মাঝে,
 অজ্ঞান আঁধারে পড়ি, ছিলি ত তখন,
 ছিলি ত নিশ্চিন্ত হ'য়ে, বল বল শুনি,
 কি আশায় ছিন্ন করি সে বন্ধন-পাশ,—
 কি আশায় ভগ্ন করি, সে কারা-কুটীর,
 পলাইয়ে এলি ! কিন্তু কি আশায় ছলে
 আবার পড়িলি বাঁধা পড়িলি বিপাকে ?
 মজিলি অশান্ত মন ! মজিলি আবার !

গীত

ডুবিল ডুবিল মন-বাসনা সাগরে ।
 হ'ল হ'ল রে মগন, আসক্তি তরঙ্গে পড়ি হ'ল রে মগন,
 বুঝি দিশেহারা হ'ল পুনঃ অবিদ্যা-আঁধারে ।
 কোন্ পথে যাব ব'লে, কোন্ পথে এলি,
 মায়ায় মোহিনী-মন্ত্রে সব ভুলে গেলি,
 (আবার মজিলি মজিলি) (কি কুহক-মন্ত্রে হার)
 (মোহেরই ছলনে ভুলে)
 পুনঃ বন্ধ হ'লি, মোহে ভুলি, মায়ায় ফাঁদে প'ড়ে ।
 মোহ-কারা মাঝে তখন ছিলি ত প'ড়ে,
 রূপের শৃঙ্খলে বাঁধা—ছিলি ত প'ড়ে,
 (কেন এলি রে এলি রে) (কি কার্য সাধিলি বল)
 (সে বন্ধন-পাশ ছিন্ন ক'রে) (সেই কারা-কুটীর ভগ্ন করি)
 ছিলি ত ছিলি ত মন, বল কি উদ্দেশে,

ছিন্ন করি সে মারাজাল, এলি রে প্রবাসে,

(সব ভুলে যে গেলি)

(সে দিনের সে সর্ব কথা—ভুলে যে গেলি)

এল মন-তরি, জ্ঞান-হাল ধরি, বৈরাগ্য-তুফান-বশে,
মোহ-ঝঙ্কাবাতে, প্রতিকূল-শ্রোতে, ডুবিল ডুবিল শেষে ;

(কেন জ্ঞান-হাল বা ছেড়ে দিলি)

এসে আপন বশে, অবশেষে কস্মনাশা-তীরে ॥

সুকর্মা । কি অভিলাষে এসেচেন ?

বিষমঙ্গল । (স্বগত) অভিলাষ ছাই-ভস্ম, উদ্দেশ্য বিনাশ !

বিমুগ্ধ চকোর আমি, অতৃপ্ত, তৃষিত ;

চক্ষুমা-কিরণ-ছটা-পতিত-নয়নে ;

উদয়-শিখরে তাই, সুপা-পান-আশে,

অহো ভ্রান্তি ! অহো ভ্রান্তি ! কামনার ক্ষুধা !

ছাই-ভস্ম, ছাই-ভস্ম, মম অভিলাষ !

সুকর্মা । কই, কোন উত্তর না দিয়ে চিন্তা ক'রচেন যে ? কি আশায়
এসেচেন, আদেশ করুন ?

বিষমঙ্গল । আশা, আশা, আমার আশা—পাগলের আশা ;—ছরাশা !

তার আবার আদেশ ?—

যে পথেতে গেছে জ্ঞান, গেছে রে বিবেক,

যাও লজ্জা, যাও লজ্জা, সেই পথে আজ !

বাসনার অনুগামী হও রে রসনা,

এস মন, লজ্জা কেন, দাও না উত্তর,

কি আশায় আসা হেথা, কিবা অভিলাষ ?

নারদ । (বিষমঙ্গলের প্রতি) মনের অভিপ্রায়টা প্রকাশ ক'রেই বলুন না ; তাতে আর বাধা কি আছে ?

বিষমঙ্গল । অভিপ্রায় পাগলের প্রলাপ-প্রায় ; নাশা নিতাস্তই চরাশা !

সুকর্মা । এমন কথা ব'ল্চেন কেন ? অবাধে মনের কথা বলুন, সাধা থাকলে অবশ্যই তা পূর্ণ ক'রুন !

বিষমঙ্গল । সাধা থাকলেও আমার আশা পূর্ণ করা তোমার নিতাস্তই সাধ্যাতীত !

সুকর্মা । সাধ্যাতীত হ'লেও আমি তা যথাসাধ্য পূর্ণ ক'রুন ; কারণ, আপনি আজ আমার কাছে প্রার্থিত অতিথি ! অতিথির প্রার্থনাপূরণের জন্ত কত মহাত্মা জীবন, ধন, এমন কি জীবনাদপি প্রিয়তম পুত্রধন পর্যন্ত বিসর্জন দিতে কুণ্ঠিত হন নাই ; আর আমি আজ সেই নারায়ণ-স্বরূপ পুত্রনীর অতিথিকে বিমুখ ক'রুন ? আপনি কি আমাকে এতই নরাধম জ্ঞান ক'রলেন ?

বিষমঙ্গল । তুমি নরাধম নও ; কিন্তু যাকে পুরুষোত্তম নারায়ণ-প্রতিম জ্ঞান ক'রুন, তোমার সেই আগত অতিথি যে নরাধমের নরাধম, এবং সেই নিতাস্ত নরাধমের প্রার্থনা যে ততোধিক জঘন্যতম ! অতিথির প্রার্থনায় লোকে জীবন, ধন, এমন কি পুত্রধন পর্যন্ত বিসর্জনে উত্তত হ'য়েচে সত্য ; কিন্তু আমার মত পাপাত্মার ঘৃণিত প্রার্থনা কেউ কখন পূর্ণ করে নাই,—মাহুষে তা পূর্ণ ক'রতেও কখন পারে না ! আমার এ পশুর প্রার্থনা, অথবা দানবের প্রার্থনা ; অথবা মানব যদি মনে কর, তবে নিতাস্ত জ্ঞানহীন পাগলের প্রার্থনা !

সুকর্মা । আপনি যখন অতিথিরূপে আমার গৃহে সমাগত, তখন পশু হ'লেও আজ আপনি আমার পক্ষে নারায়ণ, দানব হ'লেও নারায়ণ এবং জ্ঞানহীন মানব হ'লেও নারায়ণ ! সাক্ষী সেই সর্বসাক্ষী-ভূত অন্তর্ধ্যামী

নারায়ণ । আমার সাধের বহির্ভূত না হ'লে, নিশ্চয় আমি আপনার
প্রার্থনা পূর্ণ ক'রব !

বিল্বমঙ্গল । এ নরাধমের অধম কার্যে আর নারায়ণকে সাক্ষী ক'বার
প্রয়োজন নাই ।

সুকর্ণা । অসঙ্কোচে মনের ভাব প্রকাশ করুন ।

বিল্বমঙ্গল । মনো-স্বপ্ন—দানবের ভাব,
মানবের দেহধারী, বেশে দেবভাব,
মনে কিন্তু দেব-ভাব পূর্ণ তিরোভাব !
স্বভাবে লম্পট আমি, ইন্দ্রিয়ের দাস,
আসক্তির উপাসক, অভিশপ্ত ভবে !—
বিষম-ব্যসন-বিষ-পানাসক্ত-মন,
অমুরক্ত আমি তার, ভক্ত বশীভূত ;
অস্তিত্ব গিয়েছি ভুলে, আত্মহারা প্রায়,
যে পথে লইয়া যাব, যাই সেই পথে :—
নাহি ভাবি, নাহি সাধা, মন্ত্রমুগ্ধ যেন !—
বাসনা-সাগরে সদা ডুবাইয়া মারে !

সুকর্ণা । আপনিও যে আমাদিগে সন্দেহ-সাগরে ডুবিয়ে মারুচেন !

বিল্বমঙ্গল । বিবেক পরশমণি, জ্ঞান-রত্ন-ধন,
হরণ করিয়া মন, নয়নের বশে,
রূপের কাঙ্গাল ক'রে রেখেছে আমার !
পত্নী তব সুরূপা সুন্দরী,
অকলঙ্ক শশিকলা স্নিত-জ্যোৎস্নাময়ী,
মোহিত চকোর আমি, বাসনা-তৃষিত,
কামনা মে সুধাপান, উন্মাদ প্রলাপ !

সুকন্যা । (স্বগত) সর্বনাশ ! কি বলে অতিথি ।

পত্নী মম পতিব্রতা সুরূপা সুন্দরী
 শরতের শশী জিনি সৌন্দর্যের ছটা,
 নিশ্চলা, শীতলা, সদা পবিত্রতানয়ী ;
 অতিথির অভিলাষ সেই সুধাপানে !
 কামুক, লম্পট, ঘোর কপট সন্ন্যাসী
 অথবা উন্মাদ ; তাই নিশ্চয়, নিশ্চয় !
 কামুকের কামনা কে দেয় প্রশ্রয় ?—
 লম্পটের লীলা কেবা করে সমর্থন ?
 বাতুলের বাতুলতা অবজ্ঞার কথা ;
 তাই সত্য, তাই সত্য, নাহিক সন্দেহ,
 তথাপি অতিথি কিঙ্ক প্রার্থী, অভ্যাগত ;
 অতিথি বিষুথ হ'লে ধর্মহানি ভার !
 ভুল, ভুল, সে ধারণা, মীমাংসা তার এই,—
 অনাথ, আশ্রয়হীন, উপায় রহিত,
 সংসার-বিরাগী, সাধু, তাদের পালন,
 আতিথ্য-ধর্মের মর্ম, কোন্ শাস্ত্রে বলে
 ধর্মহীন পাষণ্ডের পুরাতে বাসনা ?
 কোন্ ধর্ম-শাস্ত্র বল দেয় এ বিধান ?
 পর-পত্নী-অভিলাষী, বিলাসী কামুক,
 সফল করিতে তার পাপ-অভিলাষ !
 কপট লম্পট এই সাধুবেশধারী,
 অতিথিনামের যোগ্য নহে কদাচিত্ত,
 আতিথ্যের অধিকার পূর্ণ-বিবর্জিত !

তাই সত্য ব'লে মানি, কিন্তু এক কথা,
 নারায়ণ সাক্ষী করি ধর্মের সম্মুখে,
 সাধুবেশধারী এই লম্পটের কাছে
 করিয়াছি সত্য আমি, বন্ধ অঙ্গীকারে,
 সত্যরক্ষা মহাধর্ম, সত্য ব্রহ্মময়,
 সে সত্যের অপলাপ কেমনে করিব ?
 কিবা তার যুক্তিবাদ, কি আছে বিচার
 সত্যরক্ষা মহাধর্ম নাহিক অন্তথা !
 বিষম পরীক্ষা আজ সম্মুখে আমার !
 সঙ্কটের সন্ধিস্থল ; হর তাই হ'ক ;
 হ'ক কর্মক্ষেত্রে আজ পরীক্ষা আমার ;
 হ'ক সত্য-সনাতন ! ইচ্ছা পূর্ণ তব ।
 করিব ধর্মের রক্ষা, না হবে অন্তথা,—
 দিব পত্নী অতিথিরে না হবে অন্তথা ।
 ধর্মময়, কর্মময়, ইচ্ছাময় হরি !
 হ'ক তব ইচ্ছা পূর্ণ উপলক্ষ আমি ;
 দিব পত্নী অতিথিরে সত্যের পালনে ;
 করিব প্রতিজ্ঞারক্ষা সাক্ষী তুমি হরি !

গীত

দেহি চরণে শরণ তোমার কারা-উদ্ধার ।
 তুমি সারাৎসার, করুণা-সাগর, স্বগুণে কর হে করুণা বিস্তার ॥
 সত্য-সনাতন, তুমি লীলাময়, ধর্মাধার হরি ধর্মেরই আশ্রয়,
 হৃদয়ে দেহি বল, ভকত-বৎসল, নাহি কোন বল, সম্বল তুমি বিনা আর ॥

এ যোর জলধি-তরঙ্গ ভীষণ, পূর্ণব্রহ্ম তার কর পরিজ্ঞান,
তোমারই ইচ্ছায়, সব সম্ভব হয়, ল'য়েছি আশ্রয়,
কর হে কর পারাপার ॥

নারদ । বণিকপ্রবর ! চিন্তা ক'রুচ কি ? অভ্যাগত অতিথির প্রার্থনা
পূর্ণ ক'রে, আতিথ্য-ধর্ম রক্ষা কর ।

সুকন্যা । (স্বগত) পর-পত্নী মাতৃসম শাস্ত্রের বারতা ;

পর-পত্নী মাতৃসম ভাবে সাধুজন ;
সাধুবেশধারী এই অতিথি-ব্রাহ্মণ,
সেই পরপত্নীরূপে বিমোহিত আজ ;—
সেই পরপত্নী আজ সম্ভোগ-বিলাসী !
অপূর্ব অতিথি এই অদ্ভুত প্রার্থনা !
নিশ্চয় চলনা কার' ; হয় ঘাই হ'ক,
সে বিচারে আছে কিবা মম প্রয়োজন ?
সত্যরক্ষা মহাধর্ম ; সে ধর্ম-পালন,
করিব, করিব আমি, বৃথা তর্ক তার ।
দাঁও বল হৃদয়েতে হৃষীকেশ হরি !
কর পার কৃপাসিদ্ধ ! সত্যসিদ্ধুমাবে,
দাঁও বল বাসুদেব ! অবলার মনে,
রক্ষা কর মোক্ষদাতা সতীর সম্মান ;
ধর্মময়, কর্মময়, ইচ্ছাময় হরি ।
হ'ক তব ইচ্ছাপূর্ণ, হ'ক দয়াময় !
(প্রকাশে) নন্দা !

নন্দা । কেন ?

সুকর্ণা । অতিথির অভিপ্রায় শুনলে ত ?

নন্দা । শুনেচি !

সুকর্ণা । এখন উপায় ?

নন্দা । আপনার কি অভিপ্রায় ?

সুকর্ণা । সত্যরক্ষার সঙ্গে ধর্মরক্ষা করাই আমার অভিপ্রায় !

নন্দা । আদেশ করুন ।

সুকর্ণা । এই অতিথিরূপী ব্রাহ্মণের মনস্কামনা পূর্ণ কর ।

নন্দা । অনুমতি দিন ।

সুকর্ণা । আদেশ ক'রুচি, অনুমতি দিচ্চি, আজ এই অতিথির সম্ভোগ-লালসা পরিতৃপ্ত কর । পতির আদেশে, পতির অনুমতিতে এই অতিথিকে পতির স্বরূপ জ্ঞান ক'রে, মানস-নয়নে প্রাণপতির প্রেমময়-মুক্তি দর্শন ক'রতে ক'রতে, সন্তুষ্টি-হৃদয়ে, বিশুদ্ধ-অস্তরে পতিতপাবন রমাপতির পবিত্রনাম স্মরণে আজ এই অতিথিকে প্রেমালিঙ্গন প্রদান কর । যাও, সতি ! তোমার পতির এই অনুমতি ।

নন্দা । যাই স্বামিন্ ! পতির আদেশ শিরোধার্য্য । পতির অনুমতিতে সতীর অকার্য্যও অনুর্ঠের কার্য্য !

হরি, হরি, দীনবন্ধু ! পতিতপাবন !
 বিপদবারণ ! তুমি অবলার বল,
 সঙ্কট-সাগর-মাঝে পারের কাণ্ডারী ।
 অস্তুর্য্যামি ! জান তুমি অস্তরের কথা,
 ভাবগ্রোহি ! জান তুমি হৃদয়ের ভাব,
 ধর্মরূপি ! জান তুমি মর্ম্ম-ব্যথা যত ।
 পতি আজ সত্যে বন্দী, পতিব্রতা সতী
 পতির আদেশ-রক্ষা জীবনের ব্রত,

পতির চরণ-সেবা ধর্মকর্ম ভবে,
 পতিমাত্র গতিমতি এ নারী-জনমে ।
 নাহি জানি অগ্র ধর্ম বিনা পতি-সেবা ;
 নাহি ভাবি অগ্র কর্ম বিনা পতি সেবা ;
 নাহি বুঝি অগ্র ব্রত বিনা পতি-সেবা !
 শুনি তুমি মহাটের শ্রীমধুসূদন,
 মহাটে পতিতা দাসী, রক্ষা কর তারে !
 শুনি তুমি চিন্তামণি ! শুনি যুগে যুগে,
 সতীসাক্ষী পতিব্রতার সহায়-সম্বল !
 শুনি তুমি রমাপতি ! শুনি যুগে যুগে,
 সতীর নয়ন-জল মুছাও আসিয়ে !
 কুরুরাজ-সভা-মাঝে বাজুকল্লতরু !
 শুনেছি, বসনরূপে রেখেছ সতীরে !
 শিশুপাল-কাল-গ্রাসে হে কৃষ্ণীপতি !
 রেখেছিলে কৃষ্ণীরে অভয়-প্রদানে !
 শিশুপালরূপী এই অতিথি-ব্রাহ্মণ,
 সতীর সতীত্ব-রত্ন চায় হরিবারে,
 এস হরি, রাখ হরি ! নিবার হে তার !
 যদি আমি সতী হই, সাক্ষী-পতিব্রতা,
 রক্ষা কর, রক্ষা কর, পতিতপাবন !
 যদি আমি পতি ভিন্ন অগ্র কোন জনে,
 শয়নে স্বপনে কিছা নাহি ভেবে থাকি ;
 রক্ষা কর, রক্ষা কর, তবে অন্তর্যামি !
 দাও হে স্মৃতি, এই ব্রাহ্ম অতিথিরে ;

দাও দিব্যজ্ঞান, এই মোহ-অন্ধজনে !
 দাও হে শ্রীপদাশ্রয় কাতর দাসীয়ে ;
 রক্ষা কর মোক্ষদাতা সঙ্কট-সময়ে ;
 নিলাম, নিলাম হরি ! শরণ তোমার ।

গীত

নিলাম শরণ, বিপদবারণ, তোমার অভয়-চরণতলে ।
 কোথায় আছ মোক্ষদাতা, রক্ষা কর বিপদকালে ॥
 শুনি কুরুরাজ-রোষে, বাঙ্কাকল্পতরু এসে,
 বসনরূপ ধরি হরি, দাসীর মান ত রেখেছিলে ॥
 অবলার কি আছে আর বল, তুমি বুদ্ধি তুমি হে বল,
 সেই বলে বাঁধিয়ে হৃদয়, ডাকি হরি হরি ব'লে ॥

নারদ । সতি ! সম্মুখেই তোমার মহা-পরীক্ষা ! সতীর যে কত মহিমা,
 কর্মক্ষেত্রেই আজ দেখতে পাব মা !

নন্দা । বিজবর ! আশীর্বাদ করুন । ব্রাহ্মণের আশীর্বাদ, পতির
 আদেশ, আর সেই রমাপতির করুণা । যদি আমি সতী নামের যোগ্যা
 হই, তবে অবশ্যই মহিমা দেখতে পাবেন ! সেই সর্বভূতস্থিত
 সর্বধর্মময় হরি যদি অন্তর্ধ্যামী হন, আর এই বণিক-পত্নী যদি কায়মনে
 পতিপূজা ক'রে থাকে, তবে নিশ্চয় দেখবেন, এই পতিব্রতার পবিত্র
 দেহ, কিছুতেই অপবিত্র হবে না । যিনি চরণধূলা প্রদান ক'রে,
 অপবিত্রা পাষণীকে পবিত্রা সতী-সমাজে স্থান দিয়েছেন, তিনিই আজ
 এই পতিব্রতার পবিত্রতা রক্ষা ক'রবেন । পতিতপাবন !
 পতিতপাবন ! বলবার আর কিছুই নাই । শ্রীহরি ! শ্রীহরি !

শ্রীহরি ! (বিষমঙ্গলের প্রতি) এস তবে, এস অতিথি ! বিষমঙ্গল ।
কোথায় যাব ?

নন্দা । কোথায় যাবে ? সে কথার উত্তর তবে তোমার ঐ বিষ্ময় মনকে
জিজ্ঞাসা কর । পর-পত্নীর সন্তোগরূপ-বিষম-বিষপানে যদি চিরজীবন
অর্জিত হ'তে চাও, তবে চল, এই বণিক-বনিতার শয্যাপাশে ; যদি
দাম্পত্য-প্রণয়-প্রসূনের সুমিষ্ট মধুপানে ইহজীবনে স্বর্গ-সুখ অনুভব
ক'রতে চাও, তবে যাও তোমার পরিণীতা-পত্নীর সকাশে ; আর যদি
হরিপ্রেমের ভব-ক্ষুধাহারী সুখা-পানে অনন্তকালের অমৃত আনন্দ-সাগরে
নিমগ্ন হ'তে চাও, তবে যাও, সেই শাস্তিময়ের শাস্তি-নিবাসে । বল
ব্রাহ্ম ! বল অতিথি ! এখন কোথায় যেতে ইচ্ছা কর ?

বিষমঙ্গল । বল, তুমিও বল,—কি ব'ল্চি, আর একবার বল ।

নন্দা । ব'ল্চি,—আবার ব'ল্চি ; যদি বিষ চাও, তবে আমার সঙ্গে এস ;
যদি মধু চাও, তবে গৃহবাসিনী পত্নীর কাছে যাও ; যদি সুখা চাও,
তবে হৃদয়বাসী স্বধীকেশের শরণ লও । বল অতিথি ! বল অন্ধ !
এখন কোন্ পথে যেতে চাও ?

বিষমঙ্গল । (স্বগত)

ভেঙ্গে গেল মোহ-নিদ্রা ভাঙ্গিল আবার !

আবার সুষুপ্তজ্ঞান জাগিয়া উঠিল !

কে রে, কে রে এ রমণী !

একি দৈববাণী সহসা হইল !

কোন্ পথে যেতে চাও, মহা-প্রশ্ন এই ;

আকাশেতে প্রতিধ্বনি উঠিল তাহার ;—

কোন্ পথে যেতে চাও উদ্ভ্রান্ত পথিক !

হৃদয়ে হইল শব্দ গভীর নিনাদে,—

কোন্ পথে যেতে চাও উদ্ভ্রান্ত পথিক !
 তরু-লতা বলিতেছে পবন-উচ্ছ্বাসে,—
 কোন্ পথে যেতে চাও, উদ্ভ্রান্ত পথিক !
 কোন্ পথে যেতে চাও, কি দিব উত্তর ?
 কোন্ পথে যাব ব'লে এসেছি তখন,
 কোন্ পথে এসেছি রে সে পথ ভুলিয়ে !
 কোন্ পথে যাব পুনঃ, কি দিব উত্তর ?
 কোন্ পথে, কোন্ পথে ব'লে দাও দেবি !
 পথ-হারা, দিক-হারা, জ্ঞান-হারা আমি ।

নন্দা । কি ভাব্চ অতিথি ! বল বল, এখন কোন্ পথে যেতে চাও ?
 বিল্বমঙ্গল । সতি ! সতি ! কে তুমি ? তুমি কি কোন স্বর্গবিচ্যুতা
 দেব-রমণী ?

নন্দা । অতিথি ! অতিথি ! আমি, আমি সেই পতিব্রতা বণিক-রমণী ।
 বিল্বমঙ্গল । তুমি জ্ঞান-স্বরূপিণী, মোহ-নাশিনী ; চিন্তা শিক্ষা, শান্তি দীক্ষা,
 তুমি রক্ষাকারিণী ! জননী, জননী তুমি মা জগদ্ধাত্রী-স্বরূপিণী, আমি
 অজ্ঞান-সন্তান, তুমি মা জ্ঞান-দায়িনী, রক্ষা কর ; ভিক্ষা দাও, সন্তানের
 অপরাধ মার্জনা কর !

নারদ । জয়, সতীর জয় ; জয় সাধবীর জয় ; জয় পতিব্রতার জয় । সতি !
 সতি ! তোমার মহিমার সীমা নাই,—কটাক্ষে তুমি পাষণ্ড দমন
 ক'রতে পার, লাস্তকে তুমি যুক্তিপদ দিতে পার, পাষণ-হৃদয়ে
 ভক্তিশ্রোত বহাতে পার ! তোমারই আজ মহাজয়, আমার সম্পূর্ণ
 পরাজয় !

বিল্বমঙ্গল । সতি ! যদি রক্ষা ক'রলে, তবে একটা ভিক্ষা প্রদান কর মা !
 নন্দা । কি চাও বৎস !

বিষমঙ্গল । তোমার ঐ কবরী-বন্ধনের দুটি স্বর্ণ-শলাকা আমাকে প্রদান কর ।

নন্দা । প্রয়োজন ?

বিষমঙ্গল । প্রয়োজন আছে মা ! তোমার চুল বাধার দুটি সোনার কাটা আমাকে খুলে দাও ।

নন্দা । (কাটা প্রদান করিয়া) এই নাও বৎস !

বিষমঙ্গল । (কাটা লইয়া) তুই কামিনীর শিরোভূষণ, কাঞ্চনে তোর অঙ্গ-গঠন, তাতেই ত কামিনী-কাঞ্চন-সম্মিলিত ; মনও আমার কামিনী-কাঞ্চনে বিজড়িত । মনের প্রভু-নয়ন, নয়নেরও কামিনী-কাঞ্চনে আকিঞ্চন । আয় রে, তুই কামিনীর ভূষণ কাঞ্চন ! আজ তোকে দিয়েই নয়নের সেই কামিনী-কাঞ্চনের চির-সাধ নিবারণ করি ।

হয় বিধে বিষক্ষয় নিদান-বিধানে,
কণ্টকে কণ্টক তোলা নীতি-শাস্ত্রে বলে ।
সংসারে কণ্টক মম তুই রে নয়ন !
কামিনী-কাঞ্চন তোর সাধের অঞ্জলি ;
কামিনী-কাঞ্চনে তোর পুরাইব সাধ !

(শলাকাদ্বারা দুই নয়ন বিদ্ধ করিয়া শলাকা দূরে নিক্ষেপ)

দূর হও, কামিনী-কাঞ্চন !
দূর হ'য়ে যাও, তুমি পাপিষ্ঠ-নয়ন !
রে নয়ন ! রে নয়ন ! পুরিল ত সাধ ?
কত দিন কত কার্য্য করিয়া এসেছ,
পেলে ত, পেলে ত আজ তার পুরস্কার ?
অন্ধকার ! অন্ধকার ! চির-অন্ধকার !
কোথা মন, কোথা তুমি দেখ একবার ;

কোথা তব প্রিয়-সখা, নয়ন-যুগল ?
 কে দেখাবে স্বর্গের শোভা কামিনীর রূপে !
 কে দেখাবে সুখ-ছবি আকাজকা-চিতায় !
 কে দেখাবে শান্তি-কুঞ্জ প্রবৃষ্টি-শ্মশানে !
 সব গেল, সব গেল, কি হ'ল রে মন !
 কি হ'ল রে, বাসনার আরক-বোধনে !
 কি হ'ল রে, আসক্তির প্রাণ-প্রতিষ্ঠায় !
 কি হ'ল রে অশান্তির মহা-অষ্টমীর !
 সব গেব, সব গেল, সব গেল আজ !
 বিজয়া-দশমী তোর আশা-প্রতিমার !
 অন্ধকার, অন্ধকার, চির-অন্ধকারে,
 থাক্ রে নয়ন তুই থাক্ রে এখন ;
 নয়নের ক্রীতদাস তুই মুগ্ধ মন !
 তুইও থাক্, তুইও থাক্ সেই অন্ধকারে !
 দাও প্রভু, দাও হরি, দাও দয়াময় !
 জ্ঞান চক্ষু উন্মীলিত ক'রে দাও আজ ;
 দাও কৃষ্ণ ! দাও সখা ! দাও দীননাথ !
 অন্ধকারে দিব্য-জ্যোতিঃ জ্বলে দাও দেখি,—
 শান্তিপথে চ'লে যাই হরি হরি ব'লে ।
 (সবেগে অন্ধের হ্রাস উত্থান ও পতন)

গীত

জাহি দয়াময়, দেহি পদাশ্রয়,
 কত বা আর সয় মোহ-নির্ঘাতন ।
 হেরি অন্ধকার, এ ভব-সংসার, চিরকাল তার,
 ও হে জ্ঞানালোকে কর তমঃ-বিনাশন ॥
 পড়িয়ে বিপাকে অকুল-পারাবারে,
 হ'য়েছি আকুল এ ভব-পাথারে,
 যাই ভেসে ভেসে, রক্ষ হে আমারে,
 দাও অকুলেতে কুল, নিত্য-নিরঞ্জন ॥
 এ কার্য সাধিতে আসি এ ভব-প্রবাসে,
 কি কার্যে রত থাকে মোহবশে,
 মায়া-ইন্দ্রজালে, যায় সব ভুলে, কুহকের ছলে ;—
 কেবল আশার সুখের আশায় হয় নিমগন ॥

সুকর্মা । (নারদের প্রতি) দ্বিজবর ! একি বিচিত্র ব্যাপার ! কিছুই ত
 বুঝতে পারলেম না !

নারদ । বোঝবারও তত কিছু প্রয়োজন নাই । তবে সারমাত্র এই বুঝে
 রাখ, এক শরলক্ষ্যে তিন শিকার । প্রথম পরীক্ষা—তোমার কর্ম-সাধ-
 নার ; দ্বিতীয় উদ্দেশ্য—পতিব্রতার মহিমা-প্রচার ; তৃতীয় উপায় নির্দ্ধা-
 রণ,—মহাপাপীর সমুদ্বার ! এ শিকার যার, তার কেমন চমৎকার শর-
 সন্ধান বল দেখি ! যাই হ'ক সুকর্মা ! তোমাদের কাজে আজ বড়ই
 সন্তোষ-লাভ ক'রেচি । বল বৎস ! কি বর প্রার্থনা কর ; এই
 অতিথি ব্রাহ্মণরূপে আজ মহর্ষি নারদ এসে তোমাদের সম্মুখে
 দণ্ডায়মান ।

সুকর্ণা । আপনি সেই লোক-পাবন দেবর্ষি নারদ ! এ দাসের সহিত
এরূপ ছলনা কেন প্রভু ?

নারদ । এ ছলনা সেই ছলনাময় শ্রীহরির ছলনা বলেই জেনে রাখ ।
এখন বল বৎস ! কি বর অভিলাষ কর ?

সুকর্ণা । ঋষিবর ! অন্য আর কি অভিলাষ ক'রুব ? আশীর্বাদ করুন,
যেন আমার এই অনুষ্ঠিত ধর্ম অক্ষুণ্ণ থাকে ।

নারদ । (নন্দার প্রতি) তুমি কি চাও মা ?

নন্দা । আশীর্বাদ করুন, যেন আমার পতিভক্তি অচলা হয় ।

নারদ । আশীর্বাদ ক'রুচি সেই ইচ্ছাময়ের দয়ায় তোমাদের সকল ইচ্ছাই
পূর্ণ হবে । আজ এখন আসি, আবার একদিন তোমাদের কাছে
আসুব ।

সুকর্ণা । আবার কোন্ দিন আসবেন ?

নারদ । যে দিন তোমাদিগে বৃন্দাবনে নিয়ে গিয়ে, বৃন্দাবনবিহারীর যুগল-
মূর্তি দেখাতে পারুব, সেই দিন আবার আসুব ।

সুকর্ণা । সে দিন কোন্ দিনে হবে ?

নারদ । সময় হ'লেই দেখতে পাবে । এখন চ'ল্লেম ।

[নারদের প্রস্থান ।

সুকর্ণা । আমরাও যাই চল, নন্দা !

[সুকর্ণা ও নন্দার প্রস্থান ।

সপ্তম দৃশ্য

প্রান্তর ভূমি

শান্তি ও শোভার প্রবেশ ।

শোভা । একবার এই গাছতলাটায় বসি এস ; বড় তৃষ্ণা পেয়েচে ।

শান্তি । তোমার এত ঘন ঘন তৃষ্ণা পায় কেন শোভা ?

শোভা । আমার ঘন ঘন তৃষ্ণা পায় বটে, কিন্তু সে ঘন-তৃষ্ণা আবার ঘন ঘন নিবৃত্তিও পায় ; তোমার তৃষ্ণা যে অনুরূপ লেগেই আছে ! আমার ত জোয়ার-ভাটা খেলে, তোমার যে একটানা স্রোত ।

শান্তি । আমি যে ক্ষুদ্র উপনদী শোভা ! এ উপনদীর স্রোত গিয়ে নদীতে পড়ে, সাগর যে আমার অনেক দূরে ; তাতেই ত অবিরাম ভাটার টান, জোয়ারের উজান-স্রোত কখন প্রবাহিত হয় না ।

শোভা । কেন, নদী ত এখন শুকিয়ে গেচে,—উপনদীই প্রবল হ'য়েচে ! শুকনা নদীর পথ ধ'রে উপনদীর স্রোতই ত এখন সাগরে গিয়ে প'ড়'চে, জোয়ার-ভাটা তবে না খেলে কেন ?

শান্তি । নদী শুকিয়েচে সত্য, কিন্তু সাগরের সীমা যে দূরেই আছে ; জোয়ার কি এতদূর চেপে আসতে পারে ?

শোভা । স্রোতের টান যদি বেড়ে যায়, তাহ'লে সাগর কি আর দূরে হয় ? স্রোত বাড়াও, নিকট হবে ; যত টান দেবে, ততই টান পড়বে, এটা ত তোমারই কথা ।

শান্তি । টান দিলে যদি টান পড়ে সখি, তাহ'লে আর কার টানে আমরাগে

এতদূরে এসে পড়তে হয় ! যাকে টানা যায়, সেই নিকটে আসে ; কিন্তু আমরা যত টান বাড়াচ্ছি, ততই যে দূরে এসে প'ড়'ছি !

শোভা । দূরে এসে প'ড়'ছি, কি নিকট হ'চ্ছি, তাই বা কে ব'লতে পারে ?

শাস্তি । নিকট হ'লে কি আর এ দূরের বেশ এখনও থাকে ? যারা সংসার ছেড়ে দূরে আসে, তারাই ত এই বেশ ধ'রে বসে !

শোভা । সেটা তোমার ভুল হ'য়েছে । এটা দূরের বেশ নয়, নিকটেরই বেশ । সুদূরের সংসার ছেড়ে নিকটে আসব ব'লেই লোকে এ বেশ ধ'রে থাকে ; সংসারই ত দূরের পথ, সেখান হ'তে যত দূরে থাকবে, ততই নিকট হবে । বল দেখি, কত নিকটেই ছিলাম,—পাশাপাশি, মেশামিশি, দিবানিশি ; সংসারে এসেই ত দূর হ'য়ে প'ড়েছি ।

শাস্তি । সংসার হ'তেও ত দূরে এসে প'ড়েছি, কিন্তু নিকট হ'তে পারছি কৈ ?

শোভা । পারছিই বা না কেন ? যখন বৃন্দাবনের পথ ধ'রেছি, তখন নিকট হ'য়েও প'ড়েছি ।

শাস্তি । মদনমোহনেরও দেখা পেয়েচিস্ না কি ?

শোভা । আজ পাই আর না পাই ; যখন বৃন্দাবনে যাব, তখন মদনমোহনও পাব ; আমার ত আর তোমার মত ঘরে মদনমোহন নাই ! আমার কেবল যে সেই ব্রজের কানাই ; জীবন, যৌবন, মন সকলই তার চরণে অর্পণ ক'রে দিয়ে, কৃষ্ণায় নমঃ ব'লে পথে দাঁড়িয়েছি । মদনের নয়ন-ইঞ্জিতে ভয় করি না, শমনেরও কোন ধার ধারি না ; আমার যে "যা কর তুমি মদনমোহন," তবে আর মদনমোহন দেখা না দেবেন কেন ?

শাস্তি । শোভা ! আজ আবার তুই কাঁদালি ! ঘরে যদি মদনমোহন

পেতাম, তাহ'লে কি আর মদনমোহন দেখবার জগ্ৰ বৃন্দাবনে
যেতে হ'ত ?

শোভা। ষরে না পাও, হৃদয়-মন্দিরে ত পেয়েই আছ !

শান্তি। তাতেই ত সব দিক নষ্ট ক'রেচি শোভা ! কুলও হারিয়েচি,
শ্রাম পাবারও উপায় রাখি নাই। কি ব'লব আর বল, যে নয়নজল
মানুষের চরণে বর্ষণ ক'রেচি, সেই জলে যদি সেই সজল-জলদাগ শ্রাম-
টাঁদের চরণ-যুগল ধোত ক'বুতেম, তাহ'লে যে এতদিন মনের কালি
মুছে যেত ! হৃদয় জোড়া ক'রে ফেলেচি। চিন্তামণি রাখবার স্থান
যে আর রাখি নাই ! জীবন আমার নয়, মন আমার নয়, হৃদয় আমার
নয়, সম্বল রেখেচি কেবল নয়ন-জল ; তাও যে হরিপাদপদ্মে পতিত
হ'য়ে, জাহ্নবী-প্রবাহে মিশাতে চায় না !

শোভা। তবে আর বৃন্দাবনে যাচ্ছ কি নিয়ে ? তীর্থে গেলেই, সেই
তীর্থের দেবতাকে কিছু দিয়ে আসতে হয়। তোমার কাছে আছে কি
যে বৃন্দাবন-বিহারীকে দিয়ে আসবে ? সবই ত হারিয়ে ব'সেচ !

শান্তি। সবই ত হারিয়েচি শোভা ! কিন্তু এখনও যা আছে, তাই তাঁকে
দিতে যাচ্ছি। নন্দরাণী মন দিয়েছিল, গোপ-রমণী জীবন দিয়েছিল,
রাধাবিনোদিনী হৃদয় দিয়েছিল, আর চির-দুঃখিনী আমি ; আমার সকল
সম্বল এই নয়ন-জল, সেই নীলমণিকে অর্পণ ক'রে, জন্মের মত নিশ্চিত
হ'য়ে আসব। সখি রে ! আজ আমি নয়নজল উপহার ল'য়ে, ব্রজরাজ-
দর্শনে বহির্গত হ'য়েচি !

শোভা। সর্বনাশ ক'রেচ আর কি !

শান্তি। কেন শোভা ! দুঃখিনী ব'লে কি সেই জগৎস্বামী আমার উপহার
নেবে না ?

শোভা। নেবে না কেন, তাকে যে যা দান করে, সে তাই গ্রহণ করে ;

কিন্তু কার' দান যে সে কখন গায়ে রাখে না । তাকে একশুণ দান
ক'রলে, সে যে তার প্রতিদানে সহস্রশুণে তা প্রদান ক'রে থাকে !
তাতেই বলি, সেই করুণা-নিদানকে নয়নজল দিও না, তাহ'লে এই
জল আবার সহস্রশুণে বেড়ে উঠবে !

শান্তি । শোভা ! সেটা তোর নিতান্ত ভুল ! সেই চিন্তামণি কৃপাময়ের
কৃপারূপ স্পর্শমণির সংস্পর্শে সোনা তামার আর প্রভেদ থাকে না ; তার
স্পর্শে সবই সোনা হ'য়ে যায় । তাকে ভাল মন্দ ঘাই দাও, সে ভাল
বই আর মন্দ কাউকে দেয় না । তা নইলে কি প্রহ্লাদ তাকে বিষ
দিতে সাহস ক'রত ? আমিই কি কেবল আজ তাকে নয়নজল দিতে
যাচ্ছি ? আমার মত কত ছুঃখিনী যে কত দিন হ'তে তার চরণে
নয়নবারি বর্ষণ ক'রচে । সেই জন্তই ত সুর-শৈবলিনী তার চরণে
তরঙ্গিনী ! তার চরণে কি আর নিবারণিনী আছে ; বিরহিনীর নয়ন-
বারিই সস্তাপবারিণী জাহ্নবীরূপে প্রবাহিতা হ'য়েচে । মনস্তাপের যে
কত জালা, সেই জন্তই ত জাহ্নবী তা ভালরূপে জেনে নিয়েচে । সেই
জন্তই শিবের অটায় বিরাজ ক'রে, নীলকণ্ঠের সেই বিষের জালা শীতল
ক'রে রেখেছে ; এবং ভবে এসে সংসার-জীবের পাপ-তাপের দারুণ
জালা নিবারণ ক'রে দিয়েচে ! সখি রে, হরি-পাদপদ্মে সমর্পিত বিরহিনীর
উত্তপ্ত নয়ন-বারিই সস্তাপ-বারিণী জাহ্নবী-বারিতে পরিণত হ'য়েচে !

গীত

জান না কি সখি, সেই কমল-অঁধি,
দীনহীনের গতি এ মহীমণ্ডলে ।
ভক্তি ক'রে তারে, বিষ দিলে পরে,
অম্বনি সে তাহার নের গো সূধা ব'লে ॥

ভাল-মন্দ তার সকলি সমান,
 ভক্তাধীন সে যে ভক্তির ভগবান,
 ভক্ত চণ্ডালেতে পায় সে চরণে স্থান,
 ব্রাহ্মণ দূরে রয় ভক্তিহীন হ'লে ॥
 যে চরণ-পরশে পাপিনী পাষণী,
 সতীকুলমণি রমণীর মণি,
 যে লয় গো আশ্রয়—সেই পদাশ্রয়—
 তার নাহি থাকে ভয়, কালেরই কবলে ॥
 যে চরণ-পরশে সুর-শৈবলিনী,
 হ'য়ে সমুদ্ভূতা পাপী নিস্তারিণী,
 সে চরণ-রাজীবে শরণ নিলে ভবে,
 পাপ-তাপ-জ্বালা যায় সব ভুলে ॥

ব্রাহ্মণ-বালকবেশে কৃষ্ণের প্রবেশ

কৃষ্ণ । এই ছপরের রোদে মাঠের মাঝখানে দুটি পথিক দেখ্‌চি যে !
 শোভা । পথে যতক্ষণ, ততক্ষণই পথিক ; গৃহে গেলে আর পথিক থাকে
 না ।
 কৃষ্ণ । তোমাদের তবে গৃহ নাই বুঝি ?
 শোভা । গৃহ থাকলে আর গাছতলায় দেখ্‌তে পাও কি ?
 কৃষ্ণ । গাছতলায় দেখ্‌তে পেলেই যে গৃহ থাকে না, এমন ত কোন কথা
 নাই ! কৈলাসপতিও শ্মশানে থাকে ।
 শোভা । বেশ দেখেও ত বুঝ্‌তে পারা যায় ।
 কৃষ্ণ । তাই বা কেমন ক'রে যায় ! গোলোক-রাজাও ত রাধালবেশে
 সেরে থাকে !

শোভা । সেট তার সাধের সাজ ।

কৃষ্ণ । সাধ ক'রেও ত তা হ'লে অন্য বেশে সাজা যায় । তবে আর বেশ দেখে বোঝা যায় কেমন ক'রে বল দেখি ? ধর না কেন, তোমার নিজেই কথা ; তোমাকে দেখলে কিরূপ মনে হয় ?

শোভা । আমি যা, তাই মনে হয় !

কৃষ্ণ । তুমি কি ?

শোভা । দ্বাদশ-বর্ষীয় বালক, এখন সন্ন্যাসী, তাই কি নয় ?

কৃষ্ণ । কখনও কি হয় ? দ্বাদশ-বর্ষীয়া রূপসী—এখন সাধ করে সন্ন্যাসী ; কেমন এই ত নিশ্চয় !

শোভা । তুমি কি পাগল ?

কৃষ্ণ । যে মেয়ে হ'য়ে পুরুষ সাজতে পারে, সে পাগল না আমি পাগল ?

শান্তি । ব্যাপারটা মন্দ নয় দেখ্‌চি ! পথে পথে দেখা হ'ল, আলাপ-পরিচয় সব গেল, একবারেই গণ্ডগোল উঠে প'ড়ল !

কৃষ্ণ । নূতন কথাই বা কি হ'ল ? পথে পথে দেখা হয়, আলাপ-পরিচয় আর কে লয়, সবাই ত গণ্ডগোলই জুড়ে দেয় । আমারও পথে পথে দেখা, তোমারও পথে পথে দেখা ; আবার তুমি যাকে দেখতে চাও, তারও পথে দেখা ; যার জন্ত এই পথের দেখা, তার যে এই নিয়েই সংসার রাখা ! তোমরা ত এই হ'জন, অমুকণ সঙ্গ সঙ্গ থাক ; কিন্তু কে ছিলে, কেন এলে, কোথায় আছ, কোথায় যাবে, এ পরিচয় কেউ কারও নিয়েচ কি ? পথে পথেই দেখা হয়, দেখতে দেখতেই থেকে যায়, পরিচয় কেউ কারও নেয় না গো, পরিচয় কেউ কারও নেয় না !

শান্তি । বালক ! কে তুমি ?

কৃষ্ণ । তাই বা কেমন ক'রে জানি ? আজ বালক, কাল যুবক, পরশু

বৃদ্ধ, তবে কেমন ক'রে ব'ল'ব, কে আমি ? ব'ল'লে ত আর কিছুই ঠিক হবে না ! তুমি কে সন্ন্যাসিনী ?

শান্তি । আমি সন্ন্যাসিনী ।

কৃষ্ণ । কিন্তু সীমস্তিনি ! বোধ হয়, তুমি পতি-বিরহিণী ।

শান্তি । না বালক ! আমি পতি-বিরহিণী নই, পতি-সোহাগ-বিরহিণী ।

পতি-বিরহিণী হ'লে পর, বিলাসিনীই হ'তেম ; তাহ'লে কি আর সন্ন্যাসিনী সঙ্গে বৃন্দাবনবাসী হ'তে যেতেম ? যারা পতির সঙ্গে বিরহ ঘটায়, তারাই ত কু-মতির কুহকে প'ড়ে, নরকের দিকে ছুটে যায় ।

কৃষ্ণ । তাহ'লে পতির সোহাগ না পেয়েই তোমার এরূপ মন-বিরাগ উপস্থিত হ'য়েচে ? কিন্তু আর কি তোমার কেউ নাই ?

শান্তি । একটি ভাই আছে ।

কৃষ্ণ । তাহ'লে কি এরূপ আসাটা ভাল হ'য়েচে ?

শান্তি । ভাইও যে আমার ভেমনি ; দিনেকের জ্ঞাও যদি তার সোহাগ পেতেম, তাহ'লেও পতি-সোহাগ-বিরহ ভুলতে পারতেম ।

কৃষ্ণ । ভাইও তোমাকে ভালবাসে না ?

শান্তি । ভালবাসা দূরের কথা, কখনও দেখা দিতে কাছে আসে না ।

তাকে দেখলেও যে মনের জালা ভুলতে পারি !

কৃষ্ণ । সে তবে ত বড় নির্ধুর বটে !

শান্তি । কাজ দেখে মনে হয় ; কিন্তু লোকে আবার অন্তরূপ কর । সবাই বলে, তার হৃদয়ে অপার দয়ার তরঙ্গ খেলে ।

কৃষ্ণ । এখন যাবে কোথায় ?

শান্তি । ভাইটার অনুসন্ধানে ।

কৃষ্ণ । সে থাকে কোন্‌খানে ।

শান্তি । ওনেচি, বৃন্দাবনে ।

কৃষ্ণ । সে যে এখান হ'তে অনেক পথ,—ততদূর কি যেতে পারবে ?

শান্তি । যে তার কাছে যেতে চায়, শুনেচি, তার পথ যে আপনি নিকট হয় ।

কৃষ্ণ । তবে ত তার গুণও অনেক ।

শান্তি । তার গুণ অনেকই বটে, কিন্তু অনেকে আবার তাকে নিগুণও ব'লে থাকে । সে গুণবান্ কি গুণহীন, তা ত কিছুই স্থির ক'রে কেউ কখনও ব'লতে পারে নাই ।

কৃষ্ণ । সেটা তোমার ভুল কথা ; যারা তাকে স্থির ক'রেচে, তারাই তার গুণ জেনে নিয়েচে । যারা অস্থিরেতে প'ড়েচে, তারাই তাকে নিগুণ ভেবে ব'সে আছে । গুণ না জানলে কি আর স্থির হ'য়ে থাকা যায় ? যার গুণ নাই, তার কাছে কোনও ভরসা নাই ।

শান্তি । তাই জেনেই ত তার অনুসন্ধানে যাচ্চি !

কৃষ্ণ । তা ত বাচ্চ, কিন্তু তার দ্বারা তোমার কি কাজ হবে বল দেখি ?

শান্তি । অল্প কাজ আর কি হবে ; এই আজন্ম-দুঃখিনীর দুঃখ-সঞ্চিত নয়ন-জল তাকে প্রদান ক'রে ব'ল্ব, তাই রে ! এই পতি-সুখ-বিরহিনীর বড় সুখের নয়নজল আজ তোর চরণে উপহার দিলাম ; এই জল যেন তোর শ্রীপদে হৃদ-নিঃসৃত জাহ্নবী-জলের সঙ্গে মিলিত হ'য়ে, আমার মত সস্তাপিনীর মনের সস্তাপ শীতল করে ! তার কাছে আমার এই কাজ !

কৃষ্ণ । আর ত কোন প্রয়োজন নাই ?

শান্তি । আছে বই কি ! লোকে আমার ভাইকে মনোমোহন ব'লে থাকে । শুনেচি, তাকে দেখলে মদনেরও মন ভুলে যায়, সেই মদন-মোহনকে একবার সঙ্গে ক'রে নিয়ে আস্ব !

কৃষ্ণ । সেই মনোমোহন দেখিয়ে বুঝি স্বামীর মন মোহিত ক'রবে ?

শান্তি । তাই ত মনে ক'রেচি ।

কৃষ্ণ । তোমার সেই ভাইটির নাম কি ?

শান্তি । নাম তার শ্রীপতি ।

কৃষ্ণ । আমারও নাম যে শ্রীপতি গো, তা হ'লে আজ হ'তে আমি তোমার ভাই, তুমি আমার ভগ্নী ; কেমন ভগ্নি ! আমি তোমার ভাই হ'লেম ত ?

শান্তি । ভাই রে ! তোমার কথা শুনেই প্রাণ শীতল হ'য়ে গেল ; তোমার মত গুণের ভাই পেলে, কে আর না নিতে ইচ্ছা করে ? আজ হ'তে তুমি আমার ভাই, আমি তোমার অনাথিনী ভগ্নী । নিদারুণ সংসার-সন্তাপে প্রাণ যখন নিতাস্তই জ্বলে উঠবে, তখন শ্রীপতি রে ! তোমাকে কোলে ল'য়ে,—তোমার ঐ মধুর কথা শ্রবণ ক'রে, সেই দারুণ জ্বালা শীতল ক'রব । (কৃষ্ণকে কোলে করিয়া) এস ভাই ! একবার কোলে করি ; এ অভাগিনী যে ভাই ব'লে কখন কাউকে কোলে নিতে পায় নাই !

গীত

আয় আয় দেখি ভাই কোলে ।

জ্বালা জুড়াই রে, জুড়াই রে,

ও ভাই চাঁদমুখেতে ডাক দিদি দিদি ব'লে ॥

কি বলিব বল, ওরে যাদুমণি,

কৈঁদে কৈঁদে যায় দিবস-যামিনী,

আমি বড়ই জনম-দুঃখিনী ;—

ওরে সংসার-সন্তাপে, সদা মনস্তাপে,

দারুণ জ্বালায় প্রাণ যায় রে জ্বলে ।

দুঃখসিকুনীরে ভাসি অনিবার,
তুই রে শ্রীপতি, ক'রে দিলি পার,

হ'য়ে কর্ণধার ;—

যেন থাকিস্ না রে ভুলে, অভাগিনী ব'লে,
সস্তাপ শীতল ক'রিস্ মধুর কথা ব'লে ॥

কৃষ্ণ । (স্বগত) আজ আমাকেও কাঁদতে হ'ল—এই পতিব্রতা সতী-
হৃদয়ের শীতলস্পর্শে আমারও প্রাণ যেন স্নশীতল হ'য়ে গেল ! এই নেহ-
ময়ী ব্রাহ্মণবালার কোলে উঠে, গোকুলের সেই মা যশোদাকে মনে
প'ড়ল ! আজ যেন সেই নন্দরাণীর কোলে উঠেচি ! (কোল হইতে
নামিয়া প্রকাশে) ভগ্নি ! আর তোমাকে বৃন্দাবনে যেতে হবে না ।

শান্তি । কেন ভাই ?

কৃষ্ণ । আমিই তোমার স্বামীর মন ভুলিয়ে দিব ।

শোভা । তুমি কি তা পারবে ?

কৃষ্ণ । কেন পারব না ? তোমরা বেষ্টার মন ভুলাতে পেরেছিলে, আর
আমি বেষ্টাসক্ত-পুরুষের মন ভুলাতে পারব না ? আমি এমন বশীকরণ
জানি, মানুষ ত মানুষ, তাতে কত দেবতা, গন্ধর্ভ, কিন্নর এমন কি
সমস্ত জগৎবাসী পর্যন্ত আপনাকে আপনি ভুলে যায় । কখন কখনও
ভোলানাথও তা হ'তে পরিত্রাণ পায় না ।

শোভা । তুমি ত তাহ'লে সর্বনাশ ক'রতে পার দেখ'চি ! আমাকেও
ভুলিয়ে রাখবে না কি ?

কৃষ্ণ । তোমাকে ভুলাতে কি আর বাকী রেখেচি ? যখন গায়ে ছাই
মেখেচ, তখনই ত তোমাকে ভুলিয়ে নিরেচি ।

শোভা । (শান্তির প্রতি) খুব ভাই পেলে কিন্তু যা হ'ক ; এই ভাইটার

শুণে এখন হ'তে মদনও ভুলবে। আর যিনি মদন-দাহন, তিনিও ভুলবেন ; কিন্তু সাবধান ! ভয়ের ভুলে প'ড়ে, আপনাকে আপনি ভুলে যেও না।

কৃষ্ণ। তুমি একটু সাবধান হ'য়ে যেও ; কোথায় যাবে বল দেখি ?

শোভা। আমিও বৃন্দাবনে যাব।

কৃষ্ণ। প্রয়োজন ?

শোভা। জীবন-মন মনোমোহনকে অর্পণ ক'রে, তাঁর চরণের সেবাদাসী হ'ব।

কৃষ্ণ। যেও না, যেও না।

শোভা। কেন বল দেখি ?

কৃষ্ণ। তাহ'লে আর বাঁচবে না ; কেঁদে কেঁদেই চিরকালটা কেটে যাবে। তার যে সেই কমলা আছে, তা কি জান না ? স্বভাবতঃই সে প্রবলা ; সতিনীর নাম শুন্লে, উতলা হ'য়ে কারও আর রক্ষা রাখে না। বিরজাই তার ভয়ে জল হ'য়ে,—নদীরূপ ধারণ ক'রে, কল্লোলের ছলনায় দিবানিশি উচ্চৈঃস্বরে রোদন ক'রচে। তাতেই বলি, সেখানেতে যেও না, তেমন কাজ ক'রো না, সতিনীর জ্বালায় চির-জীবনটা জ্ব'লে-পুড়ে ম'রতে হবে।

শোভা। তুমি ত সঙ্গে যাবে, তাহ'লে আর সে ভয়ই বা কেন থাকবে ? তুমি সতী-অসতী সব ভুলাতে পার, আর সতীন ভুলিয়ে দিতে পারবে না ? তা যদি না পার, তাহ'লে সবই তোমার মন-ভুলানো কথা হ'ল ! তোমায় নিয়ে আর কাজটা কি হবে বল দেখি ?

কৃষ্ণ। আমি না হয়, তোমার সতীন-বশই ক'রে দিলাম ; কিন্তু তুমি যার দাসী হবে, তোমাকে নিয়ে, তার ত কিছুমাত্র সুখ হবে না !

শোভা। কেন ?

কৃষ্ণ । যে তুমি ঝগড়া ভালবাস ? পথের লোক পেলেই যখন ঝগড়া আরম্ভ ক'রে দাও, তখন তাকেও ঝগড়ায় ঝগড়ায় তিত ক'রে তুলবে ।
শোভা । এই কথা ? তা হ'ক, সে জন্য তোমাকে ভয় ক'রতে হবে না । আমি যার দাসী হ'তে যাচ্ছি, তিতকে মিষ্ট করবার তাঁর বেশই ক্ষমতা আছে । নামে যার সুধা ক্ষরে, মধুর ভাব যার স্বভাব ধরে, বালক ! তিত আর কতক্ষণ তার কাছে তিত থাকবে ? সুধার সাগরে প'ড়ে, স্বভাবের এ তিল-ভাবও মধুর হ'য়ে যাবে ।

সন্ন্যাসিনীবেশে চিন্তার প্রবেশ

চিন্তা । হ্যাঁ গা, এ অভাগিনী কোন্‌দিকে বৃন্দাবন যাবে ?

শোভা । বৃন্দাবন যাবার কি আর কোন দিক নিদর্শন আছে ? উত্তর দক্ষিণ, পূব, পশ্চিম যে দিকে যাবে, সেইদিকেই বৃন্দাবন । চোখ বুজে আপন মনে চ'লে যাও ।

চিন্তা । আপনারা এখানে ?

শান্তি । কে চিন্তা ? হাঁ ভগ্নি ! এ সাজ কেন ?

চিন্তা । সংসারেতে এসেছি, কত সাজে সেজেছি, কিন্তু শান্তি কৈ পেয়েছি ? তাতেই অনেক ভেবে চিন্তে এই অন্তিমের সাজ ধ'রেছি !
দিদি ! এই সাজেই যে শান্তি পায় শুনেছি ?

শোভা । কোথায় যাবে ?

চিন্তা । বৃন্দাবনে ।

শোভা । কেন ?

চিন্তা । শুনেছি, যেখানে শান্তি-মেঘে কুপাবারি বর্ষণ করে । আমি পাতকী চাতকিনী, চিরদিনটা সুশীতল বারি জ্ঞানে বিঘের ধারা পান ক'রেছি !
না গো না, মেঘে বারিবর্ষণ হয়, আবার বিহ্যৎও বিকাশ পায় ;

চাতকে বারিপান ক'রে থাকে আমি কেবল সেই বিদ্যাৎ অনল পান
ক'রেচি ! সে অনলের জ্বালা এখন জ্ব'লে উঠেচে ; সেখানে গেলে
সে জ্বালা কি শীতল হবে না ?

কৃষ্ণ । হবে না কেন ? হবে ব'লেই ত লোকে সেখানে গিয়ে থাকে !

চিন্তা । তুমি কে বালক ?

কৃষ্ণ । আমি বৃন্দাবনযাত্রীর সঙ্গের সাথী গো, সঙ্গের সাথী !

চিন্তা । আমাকে কি তবে সঙ্গ ক'রে নিয়ে যাবে ?

কৃষ্ণ । যাব না কেন ? এই ত আমার কাজ, যে আমার সঙ্গ বেতে
চায়, তাকেই আমি ল'য়ে যাই ।

চিন্তা । বালক রে, বালক রে ! তোর এত দয়া ! এ অভাগিনীর
মুখপানে কেউ যে ফিরে চায় না !

কৃষ্ণ । দেখ, যাকে কেউ চায় না, তার মুখপানে আমি দিবানিশি চেয়ে
থাকি । চল না কেন, আমার সঙ্গ গেলে আর কারও মুখপানে
চাইতে হবে না ।

চিন্তা । ততদূর কি যেতে পারব ?

কৃষ্ণ । পারবে না কেন ? এত দূর ত এসেচ, আর তত বেশী দূর
নাই ।

চিন্তা । পথের সম্বলও যে আমার কিছুই নাই ।

কৃষ্ণ । কেন ? কিছুই কি সঙ্গ ক'রে আন নাই ?

চিন্তা । এনেছিলাম, আস্বার সময় যথেষ্টই এনেছিলাম,—এমন কি রাজা
সেজে এসেছিলাম ; কিন্তু এমনি গাছের তলায়, কি আর ব'ল্ব
বালক ! একদিন এমনি গাছের তলায়, একজন চোরের সঙ্গ দেখা
হ'ল ; বুঝতে না পেরে তাকে সর্বস্ব দিয়ে, এখন কাঙ্গাল সেজেচি
য়ে, কাঙ্গাল সেজেচি ! কিছুই কাছে রাখি নাই ।

কৃষ্ণ । তা ত বুঝতেই পার্চি ; তা চল, সেজন্ত এখন আর আটক থাকবে না, কিন্তু বৃন্দাবনে যাবে কি মানসে ?

চিন্তা । যার চরণ-পরশে পাপিনী অহল্যার উদ্ধার হ'য়েছিল, বৃন্দাবন তার লীলা-নিকেতন ; যমুনা-পুলিনে, নিকুঞ্জ-কাননে, সকল স্থানেই তার চরণ রেণু পতিত আছে ; ব্রজের সেই মহা-রজ স্পর্শ ক'রে, আমার এই পাপের দেহ পবিত্র ক'রবে । অণু আশা ক'রলেও ত তা সফল ক'রবার বল নাই ! এই পতিতা পাপিনী কি সেই পতিতপাবনের পদধূলা পাবে না ?

কৃষ্ণ । পাবে না কেন ? পতিতকে চরণ-ধূলা দিয়ে পবিত্র না ক'রলে, আর তাকে পতিতপাবন ব'লে কে ডাক্ত ? দেখ পতিত, তাপিত, তাড়িত, ত্রাসিত, একান্ত-চিত্তে যে তাকে ডেকে থাকে তাকেই সে আশ্রয় দিয়ে রাখে ।

গীত

ভক্তি ক'রে ডাকলে পরে
ও সেই ভক্ত-সখা, দেয় গো দেখা,
না এসে কি থাকতে পারে ॥
ওগো হরি হরি ব'লে, এ ভব-মণ্ডলে ;
তার চরণ-তলে লইয়ে আশ্রয়,
(তাকি জান না জান না গো)
(কত মহাপাপী ত'রে গেল)
সেই নামের গুণে, শমন-শাসনে,
থাকে না ক ভয় এ ভব-সংসারে ।
(কে না জানে বল)

ওগো যার কৃপাবলে, জলে ভাসে শিলে ;—
 কাষ্ঠ-তরী স্বর্ণ হয় গো, (বল বল কে না জানে)
 (তার কৃপার গুণে) অকূলেতে কুল,
 যে না পায় গো কুল, কুল দেয় হরি অকুল-পাথারে ॥
 (সে যে অকুল কাণ্ডারী-হরি)

চিন্তা । কেমন ক'রে তাকে ডাকতে হয় ?

কৃষ্ণ । যেমন ক'রে ডাকচ, মন প্রাণ হৃদয় তিনই ঐক্য ক'রে ডাকতে হবে, তবে সে শুনতে পাবে ;—অমনি এসে দেখা দিবে, আপনার আশ্রয়ে নিয়ে যাবে ! তুমি যে এখন ডাকতে শিখেচ গো !

চিন্তা । পাপিনীর এ ক্ষীণ কণ্ঠস্বর কি ততদূর যাবে বালক !

কৃষ্ণ । খুব যাবে যে তাকে ডাকে, তাকে আর তার কাছে যেতে হয় না, সেই তার নিকটে আসে । দেখ আর একটা কথা, কিন্তু বড় মজার কথা বটে, পাপী যখন পাপ চিন্তে পারে, তখন আর সে পাপী থাকে না ।

শান্তি । (চিন্তার প্রতি) ভগ্নি ! মূলে যদি আপনাকে আপনি চিন্তে, তাহ'লে এই বৃক্ষমূলে এমন ভাবে আজ আর এই তিনের মিলন দেখতে হ'ত না ।

কৃষ্ণ । এমনভাবে তিনের মিলন না হ'লে, আর আমাকেই বা দেখতে পেতে কেমন ক'রে ? ভক্তি, জ্ঞান, কর্ম, আমিই তার মর্ম্ম জানি গো, আমিই তার মর্ম্ম জানি । এখন বৃন্দাবনে নিয়ে যাই চল ; পথে আরও কাজ আছে ।

[সকলের প্রস্থান ।

অষ্টম দৃশ্য

প্রথম গর্ভাক্ষ

[প্রান্তর ভূমি]

বিষমঙ্গলের প্রবেশ

বিষমঙ্গল ।

উদ্ভ্রান্ত পথিক আমি জানি না ক পথ,
নাহি তাহে কোন লক্ষ্য দৃষ্টিহীন আঁখি,
কোথা যাই, কিবা করি, নাহি রে স্থিরতা,
কোন্ পথে যাব তার নাহিক নির্ণয়,
ল'য়ে যায় মন যথা, যাই সেইদিকে ।
গহন কানন কত পর্বত কন্দর,
কত স্থান কত দেশ কত তীর্থভূমি—
শান্তি শান্তি রবে হায় ফিরিলাম কত !
মনে করি ওই শান্তি ডাকিছে আমায়,
শান্তি শান্তি বলি অগ্নি যাই রে ছুটিয়া,
কিন্তু হায়, কোথা শান্তি, ভ্রান্তিময় সব !
নহে শান্তি, নহে শান্তি মনের বিকার !
কখন শান্তির বশে পথশ্রমহেতু,
যদি বা তন্ত্রার ঘোরে হই বিচেতন,
মনে করি শান্তি বুঝি বসি শিয়রেতে,
শান্তিদূর করিতেছে বীজনী-ব্যঞ্জে !

চমকিত হ'য়ে উঠি, যাই ধরিবারে,
 শান্তি শান্তি রবে হায় ধাই চতুর্দিকে,
 কিন্তু হায়, কোথা শান্তি, শূন্যময় সব !
 ভ্রান্তি ভ্রান্তি—ভ্রান্তিময়, আর কেন হরি,
 ভ্রান্তি দিয়ে ভুলাইতে ক'রেছ বাসনা ।
 যাক্ শান্তি, নাহি ক্ষতি ওহে শান্তিদাতা !
 দাও স্থান চরণেতে কর শ্রান্তি দূর ।
 তুমি দিয়েছিলে শান্তি, তুমি নিলে হরি ।
 নাও হরি, নাও হরি, নাহি ক্ষতি তায়,
 আর কেন, আর কেন, ভ্রান্তির বিকারে
 ভুলাইতে চাও, ওহে ভব-কর্ণধার !
 কই কৃষ্ণ, কোথা কৃষ্ণ, ভব-কষ্টহারি,
 কর পার কর্ণধার, এ ভব-তরঙ্গে ।

লীলাময় ! লীলাময় ! না, না, আর যে পারি না, দারুণ পিপাসা !
 এইখানে একটু বিশ্রাম করি ।

বালিকাবেশে রাধিকার প্রবেশ

রাধিকা । এই মাঠের মাঝে কে একজন লোক ব'সে র'য়েচে নয় !

বিষমঙ্গল । ওঃ, প্রাণ যায় বড়ই পিপাসা,
 কোথা যাই, কোথা পাই পিপাসার জল,
 কেমনেতে করি হায় তৃষ্ণা নিবারণ !
 কে আছে এখানে দেয় পিপাসায় জল ।
 কই কৃষ্ণ, কোথা কৃষ্ণ, ওহে বংশীধারি !
 শান্তি-বারি-বরিষণে ওহে শান্তিদাতা,

ক'রে দাও শান্তিদূর শান্তির নিদান

পিপাসার হাত হ'তে পাই পরিভ্রাণ !

রাধিকা । এ জনহীন মাঠের মাঝে কে গা তুমি ?

বিহ্বমঙ্গল । কে এমন মধুরস্বরে সন্বেদন ক'রলে ?

রাধিকা । আমি পথিক, তুমি পিপাসায় কাতর হ'য়ে জল জল ক'রছিলে,

তাই তোমাকে জল দিতে এসেছি ।

বিহ্বমঙ্গল । বড়ই মধুর, বড়ই মনোমুগ্ধকর, বড়ই আশাপ্রদ । বীণা-

বিনিন্দিতস্বরে বাঁশরীর রবে, কে তুমি সাস্তনা-শীতল-বারি প্রদান

ক'রতে এলে ?

রাধিকা । আমি ব্রাহ্মণ-বালিকা !

বিহ্বমঙ্গল । তুমি ব্রাহ্মণ-বালিকা ! এখানে কি ক'রতে এসেচ ? তোমার

সঙ্গে আর কে আছে ?

রাধিকা । আমার সঙ্গে আর কেউ নাই ।

বিহ্বমঙ্গল । এই জনহীন বিজন প্রান্তরে তুমি একলা এসেচ কেন ?

তোমার কি কেউ নাই ?

রাধিকা । আমার সব আছে গো—আমার সব আছে । আমার ঘর আছে,

সংসার আছে, স্বামী আছে ; কিন্তু হ'লে কি হবে, থাকতেও আমার

কিছুই নাই গো, সব থাকতে কিছুই নাই ।

বিহ্বমঙ্গল । তোমার স্বামী আছে, তবে তোমার স্বামীর কাছে থাক না

কেন ?

রাধিকা । আমি থাকব কি গো, সে যে আমায় থাকতে দেয় না ।

বিহ্বমঙ্গল । কেন ?

রাধিকা । থাকতে দেবে কি, সে যে কোথায় থাকে তারই সন্ধান পাই

না । তাকে দেখতে না পেলে, তার কাছে থাকি কেমন ক'রে বল ?

বিষ্মমঙ্গল । কেন, তোমার স্বামী কি বাড়ীতে থাকে না ?

রাধিকা । না গো না ।

কখন পুলিনে, কখনও কাননে
 কখন পর্বতে, কখনও কন্দরে,
 কখনও বা ধায় জলন্ত-আগুনে,
 কখনও বা থাকে জলের ভিতরে ।
 কখনও বা শুনি ফিরে মাঠে মাঠে,
 কখনও গোঠেতে করে বিচরণ ।
 কখনও বা শুনি বসি রাজপাটে,
 রাজকার্য্য কত করে অলোচন !
 কখনও বা শুনি কদম্বের তলে,
 বাঁশরীর স্বরে গোপীকার মন,
 বাজায় মধুর রাধা রাধা ব'লে,
 হরে গো তাদের কুলমানধন ।

বিষ্মমঙ্গল । তোমার কথা কিছু বুঝতে পারলাম না । তুমি কি পাগল ?

রাধিকা । আমি পাগল নই গো আমি পাগল নই ; সেই যে আমাকে

পাগল ক'রেচে !

বিষ্মমঙ্গল । কে তোমায় পাগল ক'রেচে ?

রাধিকা । সেই গো সেই ।

যার গোলেতে প'ড়ে, সবাই বেড়ায় ঘুরে ঘুরে,
 গোলকধাঁধার গোলের মত কেউ পালাতে পারে ।
 আমি পাগল, তুমি পাগল, পাগল সবাই ভবে,
 নইলে কি আজ এখানেতে আস্তে এমন ভাবে ।

গীত

ওগো আমি ত নই গো পাগল ।
 পাগল ক'রেচে আমায় সে বিশ্ব-পাগল ॥
 যে পাগলের গোলে প'ড়ে, ভোলা সতীদেহ বুকে ক'রে,
 (কত কেঁদেছিল গো) (হায় সতী কোথায় সতী ব'লে)
 (তাকি জান না জান না) (কোন্ পাগলের খেলায় প'ড়ে)
 ও তা জানতে যদি, তাহ'লে কি ব'লতে পাগল ।
 যে পাগলের গুণগানে, পঞ্চানন পঞ্চ-বদনে,
 (সদা হরি হরি বলে গো)
 (বিষণ বাজায়, সিদ্ধি খায়, আর হরি বলে গো)
 (শ্মশানে মশানে বেড়ায়, আর হরি বলে গো)
 (কিছু চাহে না চাহে না) (তাঁকে বিনা কিছু চাহে না)
 ওগো তারই পাগলামিতে চলে এই ভূমণ্ডল ।

বিন্মঙ্গল । এখন তুমি কোথায় যাবে ?

রাধিকা । কোথায় যাব কেবা জানে,

কেউ কি ব'লতে পারে ।

জানলে পরে এমন ধারা,

বেড়ায় কি গো ঘুরে ।

কোথায় ছিলাম কোথায় এলাম,

এখন যাব কোথা ;

জানব যদি, এমন ভাবে,

কহিতে হয় কি কথা ।

বিশ্বমঙ্গল । কোথায় যাবে তাই যদি জান না, তবে বালিকা, ঘর ছেড়ে
এলে কেন ?

রাধিকা । কি কাজেতে এসেছিলাম,
মজেছি কি কাজে ।
কেবা ভাবে কেবা বোঝে,
বল ভবের মাঝে ।

বলি হাঁ গা, আমায় একটা কথা ব'লবে ?

বিশ্বমঙ্গল । কি ব'লতে হবে, বল ?

রাধিকা । তুমি যে এই একলা মাঠের মাঝে ব'সে র'য়েচ, আমি নিত্য
আসি, নিত্য যাই, কিন্তু তোমাকে ত দেখি নাই !

বিশ্বমঙ্গল । আমাকে দেখবে কেমন ক'রে ? আজ আমি এখানে
নূতন এসেচি ।

রাধিকা । তোমার বাড়ী কোথা ?

বিশ্বমঙ্গল । আমার বাড়ী অনেক দূর ব'ললে কি বুঝতে পারবে ?

রাধিকা । যদি বুঝতে না পারি, তবে ব'লে কাজ নাই ; কিন্তু তোমার
কে আছে, তা ব'ললে ত বুঝতে পারব ।

বিশ্বমঙ্গল । আমার সবই আছে । না না না,—একদিন ছিল ; সুখ
ছিল, শান্তি ছিল, সম্পদ ছিল, শোভা ছিল ; কিন্তু এখন আর
কিছুই নাই ।

রাধিকা । গেল কিসে ?

বিশ্বমঙ্গল । কিসে গেল কি বলিব আমি,
চিন্তারূপ মোহ-ঘোরে হ'য়ে বিমোহিত,
শান্তিকে অশান্তি-জ্ঞানে দিয়েছি ভাসিয়ে,
শান্তির সঙ্গিনী শোভা গেছে তার মাথে ।

রাধিকা । শুন্লেম সব, বুঝলেমও বেশ ; কিন্তু এখন কি ক'বে ?

বিদ্বমঙ্গল । শান্তি গেচে, শোভা গেচে, সেইজন্তে শান্তিহীন সুখ সম্পদ
পরিত্যাগ ক'রে, শান্তিদাতার অশেষে বৃন্দাবনে যাব ব'লে
এসেচি ।

রাধিকা । তুমি বৃন্দাবনে যাবে ? তবে চল না আমিও তোমার সঙ্গে যাই ।

বিদ্বমঙ্গল । তুমি আমার সঙ্গে যাবে ? আমি তোমার সঙ্গী হব ! হায়
বালিকা ! এই দৃষ্টি-শক্তিহীন তোমার পথ-প্রদর্শক হ'য়ে যাবে !

রাধিকা । কেন, তুমি কি অন্ধ ?

বিদ্বমঙ্গল । দেখে বুঝতে পার্চ না ?

রাধিকা । না, তোমার চক্ষু তো বেশ র'য়েচে ?

বিদ্বমঙ্গল । চক্ষু আছে বটে,—কিন্তু চ'ক্ষের দৃষ্টি-শক্তি নাই ।

রাধিকা । কেন, তুমি কি জন্ম-অন্ধ ?

বিদ্বমঙ্গল । না তা নয় । তবে সম্প্রতি হ'য়েচি বটে ।

রাধিকা । কিসে হ'ল ?

বিদ্বমঙ্গল । সে অনেক কথা, সময়ান্তরে ব'লব ।

রাধিকা । তবে চল, আমি তোমায় রাস্তা দেখিয়ে নিয়ে যাই । তুমি
আমার সঙ্গে এস ।

বিদ্বমঙ্গল । তুমি অপরিচিত, তোমার সঙ্গে যাব কি ক'রে ?

রাধিকা । পরিচয় কি আপনা হ'তে হয় ? পথে পথে দেখা হয়, পথে
পথে পরিচয় হয় ! আর কোন্ কালে কার পরিচয় পায় ? পরকে
আপন ক'রতেও পারলেই আপন হয় । আমার কেউ নাই, তোমারও
কেউ নাই ! তুমিও পর, আমিও পর । এখন তুমিও আপনার,
আমিও আপনার । এখন তুমি আমার ভাই, আমি তোমার ভগ্নী ।
কেমন ভাই ! এখন আপনার হ'তে পারবে ত ?

বিদ্বমঙ্গল । এই হতভাগ্যকে এমনধারা আপন ব'লে সছোধন ক'রতে, এ সংসারে আর কেউ নাই । তুমি দয়াবতী, তাই এ পতিতকে আপন ব'লে কোলে টেনে নিলে ; কিন্তু দেখ' ভগ্নি ! আর যেন ত্যাগ ক'র না ।

রাধিকা । না গো না, এখন তবে চল ।

[বিদ্বমঙ্গলের হাত ধরিয়ৱা রাধিকার প্রস্থান ।

দ্বিতীয় গর্ভাঙ্ক

[বৃন্দাবনধাম]

শান্তি, শোভা, চিন্তা ও রাধালবেশে কৃষ্ণের প্রবেশ

কৃষ্ণ । এই ত ভগ্নি, বৃন্দাবনে এসেচি !

শান্তি । শ্রীপতি রে, বৃন্দাবনে আনলি, কিন্তু সেই বৃন্দাবনবিহারী কৈ ? সেই পতিতপাবনকে দেখা ভাই ! সেই সস্তাপহারীর চরণ-তলে নয়নজল নিক্ষেপ ক'রে মনের অনল স্তুশীতল করি ।

কৃষ্ণ । ভগ্নি এখন বৃন্দাবনে এসেচ, তখন বৃন্দাবনবিহারীরও দেখা পাবে ।

শোভা । এখন তা ব'ললে ত আর ছাড়'চি না ! তখন যে কত কথাই ব'লেছিলে ; এখন যদি ভাল চাও, বনমালীকে এনে দাও ।

কৃষ্ণ । আমি বনমালীকে কোথা পাব ? তুমি বেশ মজার লোক ! একদণ্ড ঝগড়া না ক'রলে যে, থাকতে পার না দেখ'চি !

শোভা । ঝগড়া কি সাধে করি, ঝগড়া না ক'রলে যে তোমার মন পাওয়া যায় না ।

কৃষ্ণ । (চিন্তাকে) কৈ তুমি ত কিছু ব'ললে না ?

চিন্তা । কি আর ব'লব বল, এই পতিতা পাতকিনী তোমারই কৃপায়

সেই পতিতপাবনের লীলা-ক্ষেত্র বৃন্দাবন-ধামে যখন আসতে পেরেচে, তখন অল্প প্রার্থনা কি ক'র'ব বল ; আর ক'র'লেই বা এমন সাধনা কি আছে যে, সেই সাধনের ধন পতিতপাবন, এই পতিতা পাপিনীর নয়ন-পথের পথিক হ'য়ে, এই পতিতাকে পদ-রজ দিয়ে, উদ্ধার ক'র'বেন ! শ্রীপতি রে ! সে কামনা করি না ; আর ক'র'লেই বা সে ছুরাশা সফলের আশা কোথা ? বালক রে, যার কণামাত্র করুণা পাবার জন্ম, শুকদেব সুখময় সংসার ত্যাগ ক'রে কাননবাসী ; শঙ্কর সোনার কৈলাশ পরিহার ক'রে শ্মশানচারী ; ব্রহ্মা যোগাসন সার ক'রেচে ; মহর্ষি নারদ যার নামগুণগানে অহর্নিশি হরিবোল হরিবোল ব'লে এই বিশ্ব-ব্রহ্মাণ্ড ভ্রমণ ক'র'চে ; তার দর্শন-আশা কেবল কি ছুরাশা নয় ? তবে সেই দীনতারণ যদি নবধন-শ্রামরূপে শাস্তি-সুধা-বরিষণে এই পিপাসিতা চাতকিনীর প্রাণের পিপাসা শূন্যতল ক'রে দেয়, সেটা কেবল সেই দয়াময়ের দয়ার গুণ ; তাতে আর অল্প কিছুই নাই !

বিষ্ণুমঙ্গলের হস্তধারণপূর্বক রাধিকার প্রবেশ

রাধিকা । (প্রবেশপথ হইতে) এই সেই বৃন্দাবন ।

বিষ্ণুমঙ্গল । এই সেই বৃন্দাবন ?

কৃষ্ণ-লীলা নিকেতন !

কিঙ্ক কই শুনি চুপূর-বন্ধার,

কই শুনি বাশরীর স্বর ;—

রাধা-গুণ-গানে সদা থাকে অবিরত ।

গোকুল আকুল হয় যে বাশীর স্বরে,

আকুল গোধন-কুল ধায় সেই দিকে ।

কুল ত্যজি গোপীকুল, ছাড়ি গৃহবাস,
 ত্যজ্য করি ভাই-বন্ধু আত্মীয়-স্বজন,
 ত্যজ্য করি পতি-পুত্র সুহৃদ-মণ্ডলী,
 যায় সবে কদম্বের তলে—
 ধায় সবে যমুনার কূলে ।
 যমুনা উজ্জান বয় প্রতিকূল-শ্রোতে,
 কেন নাহি শুনি হয়, সে বাণীর স্বর,
 নীরব, নীরব হয়, কেন ব্রজধাম ।

কৃষ্ণ । দেখ ভগিনি ! কেমন দুটী লোক আসচে ! ওদিকে কি চিন্তে
 পার ?

শোভা । শাস্তি ত আর চিন্তামণির হৃদয়-বিহারিণী নয় যে, যাকে দেখবে,
 তাকেই চিন্তে পারব !

শাস্তি । চিনেচি শ্রীপতি রে, চিনেচি ভাই ! যার ভালবাসায় বঞ্চিতা হ'য়ে
 স্বজন-সংসার পরিত্যাগ ক'রে বিজন-বাস আশ্রয় ক'রেচি ; ধন-রত্ন
 উপেক্ষা ক'রে, ভিখারিণী বেশে দেশে দেশে ভ্রমণ ক'রেচি ; যার
 বিহনে সম্পদে মন ম'জত না, ধনে মনের সুখ পেতাম না, সেই ধন-
 রত্ন-পরিপূর্ণ সংসার-বাসে কেবল অশাস্তি-অনলে জর্জরিত হ'তেম,
 যার ক্ষণিক দর্শনে, এই অশাস্তিপূর্ণ হৃদয়-মরুতে সহসা শাস্তি-উৎস
 প্রবাহিত হ'ত, নারী-জন্মের একমাত্র সঞ্চল, হৃদয়-মন্দিরের একমাত্র
 দেবতা, সংসার-জলধি-জলে এই জীবন-তরণীর একমাত্র কাণ্ডারী,
 সেই পতি, শ্রীপতি রে সেই পতি ভাই !

কৃষ্ণ । ভগিনি ! তুমি পতির দেখা পেয়ে, সব ভুলে গেলে যে ! এখনই
 হয় ত আমাকে পর্যাস্ত ভুলে যাবে !

শাস্তি । শ্রীপতি রে ! যার জন্ত সংসার ভুলেচি, স্বজন ভুলেচি, ধন-সম্পদ

সমস্ত ভুলেচি ; সেই পতিকে যদিও কখন ভোলা সম্ভব হয়, কিন্তু তোকে কখনও ভুলব না ! ভাই শ্রীপতিরে ! ভুলব কি, যখন চক্ষু মুদিত ক'রে, এই হৃদয়-মন্দিরে প্রতিষ্ঠিত প্রাণপতির পবিত্র-মূর্তি দর্শন করি, তখন দেখতে পাই, হৃদ-পদ্মাসনে প্রাণপতির প্রেমময় পবিত্র মূর্তির সহিত তোর ঐ নবঘনশ্যাম-বিনিন্দিত সুন্দর স্মৃঠাম-মূর্তি একাসনে বিরাজ ক'রুচে ! ভুলব কি ভাই ! তুই যে মনপ্রাণ সমস্ত অধিকার ক'রে ব'সেচিস্ !

রাধিকা । এই ত বৃন্দাবনধামে এসেচ, এইবার আমি যেতে পারি ?

বিব্রমঙ্গল । কোথায় ?

রাধিকা । কেন, নিজের কাজে । তুমিও নিজের কাজে যাও, আমিও নিজের কাজে যাই । আর ত তোমার সঙ্গে আমার ঘুরলে চ'লবে না !

বিব্রমঙ্গল । তা বুল্লেম, কিন্তু ;—

রাধিকা । কিন্তু আবার কি ? বৃন্দাবনে যাব ব'লেছিলে, বৃন্দাবনে ল'য়ে এসেচি ; এখন তোমার যেখানে ইচ্ছা, যেতে পার ।

বিব্রমঙ্গল । তুমি বৃন্দাবনে আনলে, কি কোন্ নিবিড় বনে আনলে, তারই বা প্রমাণ কি ?

রাধিকা । আমি তোমার সঙ্গে ত এত গল্পাঙ্গলী করতে আসি নাই ! তোমার ইচ্ছা হয় যাও, না হয় এইখানে থাক ।

(বিব্রমঙ্গলের হস্ত ছাড়িয়া দিয়া কিঞ্চিৎ দূরে দণ্ডায়মান)

বিব্রমঙ্গল । সে কি ভগিনি ! তখন যে ভাই ব'লে, কত আদর ক'রে সঙ্গে ল'য়ে এসেছিলে ? এখন এত নিষ্ঠুরা হলে কেন ? সে আদর, সে যত্ন, কোথায় গেল ?

রাধিকা । এই ত এখানে র'য়েচি, তুমি এস না !

বিব্রমঙ্গল । কৈ, কোন্ দিকে দেখতে না পেলে, কেমন করে যাই বল ?

রাধিকা । তবে দেখ ।

(বাধাক্ষেপের যুগলভাবে দণ্ডায়মান)

বৃন্দা, বিশাখা, ললিতা প্রভৃতি সখীগণের প্রবেশ ।

গীত

দেখ বে দেখ নয়ন-ভ'রে এ রূপের মিলন ॥

কিবা অপরূপ রূপের শোভা মরি কি মধুর-দর্শন ॥

নব-নীরদেব কোলে, যেন বিজলী খেলে,

ওব থেকে থেকে আপনি দোলে—

মন-শিথি হয় মগন ॥

কিবা করেতে বাঁশী, কিবা অধবে হাসি,

সদা রাধা রাধা রাধা ব'লে— করে সবার মন-হরণ ॥

বিষমঙ্গল । নবীন নীরদের কোলে সৌদামিনীর বিকাশ ! মবি, মরি ! কি
অপরূপ রূপের সমাবেশ ! একি ভ্রাস্তি ! (চোক মুছিয়া) না না,
তাঁই বা কেন হবে ? যমুনার কূলে কদম্ব-তরুমূলে রাধাক্ষেপের যুগল-
মিলন ! সখীগণ-পরিবেষ্টিত নব-ঘন-শ্যামেব উদয় হ'য়েচে ; মরি মরি !
রূপের তুলনা নাই রে, এ রূপের আর তুলনা মেলে না রে !

শান্তি । শ্রীপতি রে ! ভগ্নি ব'লে কোলে গিয়ে, যার মনের জ্বালা শীতল
ক'র্নলি, তার সঙ্গেও ছলনা ! হাঁ ভাই ! ছলনা ক'র্নতে জান ব'লেই
কি ছলনা ক'র্নতে হয় ?

শোভা । ছলনা প্রবঞ্চনা প্রতারণা যাব চিরকালের স্বভাব, তার সে
স্বভাব যাঁবে কেমন ক'র্নরে ?

কুক । কিছ তোরায়ও ত ঝগড়া করা স্বভাব গেল না !

শোভা । ঝগড়া কি সাধে করি, ঝগড়া না ক'রলে যে তোমার মন পাওয়া যায় না ।

স্বকর্মা ও নন্দার সহিত নারদের প্রবেশ

নারদ । হরি হরি, মরি মরি, লীলাময় হে ! তোমার লীলা-রহস্য বোঝা বড় বিষম দায় । কখন যে তুমি কি ভাবে কোন্ খেলার অবতারণা কর, তা কি কারও বোঝবার ক্ষমতা আছে ! যুগে যুগে যা কেউ কখন বুঝতে পারে না, এষ্ট ক্ষুদ্রমতি নারদ তা কেমন ক'রে বুঝবে বল ! (বণিক-পত্নীর প্রতি) মা ! তোমাদের কাছে একদিন আমি সত্যে আবদ্ধ হ'য়েছিলেম ; আজ সেই সত্য হ'তে মুক্ত হ'লেম ।

নন্দা । মহর্ষি গো, এ কি স্বপ্ন না সত্য । আপনার চরণ-রূপায় যে অমূল্য-ধনের অধিকারী হ'লেম, সে ধন যে কেউ কখনও সহজে পায় না । বার দর্শন পাবার আশায় অনশনে, অনিদ্রায়, অহর্নিশি লোকে যোগাসন সার করে ; সেই সাধনার ধন, ভক্তের হৃদয়রঞ্জন বিনা সাধনায় এই ভক্তিহীনার নয়নপথে নিপতিত ! মরি মরি ! এ যে স্বপ্নের অতীত ! এ যে দুঃখাশার অবশ্যস্তাবী ফল !

রুক্ষ । মা ! সতীর সতীত্ব-বল অপেক্ষা কি সাধনার বল বেশী ? যে রমণী কায়মনে পতির চরণে মন-প্রাণ বিক্রয় করে, পতিভক্তি যাদের সার-ধর্ম, পতির চরণ-সেবা যাদের একমাত্র কর্ম, তাহিগে আর স্বতন্ত্রভাবে এই কমলাপতির আরাধনা ক'রতে হয় না । তাদের সেই পতিভক্তির বলেই যে, এই বিশ্বপতি তাদের কাছে অচ্ছেদ্য-বন্ধন-পাশে বাঁধা থাকে মা !

নন্দা । নিলমণি রে, মা ব'লে ডেকেচিস্, দেখিস্ বাপ, আর যেন এই দুঃখিনী মাকে পরিত্যাগ করে বাসনে ।

কৃষ্ণ । হাঁ মা ! সম্ভান কি কখনও মা-বাপকে পরিত্যাগ ক'রতে পারে ?

নারদ । বণিক-প্রবর ! কই তুমি ত কিছু ব'ললে না ?

সুকর্মা । ঋষিরাজ ! ঐ সম্মোহন রূপের ছটায় যে মনঃপ্রাণ বিমোহিত হ'য়ে গেছে ! মন যে ঐ রূপ-সাগরের অতল-তলে নিমগ্ন হ'য়ে আছে !

আর কি কিছু বলবার যো আছে ।

শান্তি । শ্রীপতি রে, তখন ভাই রাখালবেশে এই দুঃখিনীর কোলে গিয়ে-

ছিলি, এখন আয় ভাই রাখালরাজ ! এই মদনমোহনবেশে কোলে

এসে, দুঃখিনী ভগ্নীর মনের বাসনা পূর্ণ কর ।

নন্দা । এস মা ! চিন্তামণির হৃদয়-বিহারিণী তুমি, এই বণিক-বনিতার

কোলে এসে শূন্য কোল পূর্ণ কর মা !

(শান্তির কোলে কৃষ্ণ ও নন্দার কোলে রাধিকা)

সখীগণ ।

গীত

আয় রে আয় সবাই মিলে হরি ব'লে আয়,

হরি ব'লে, আয় রে চ'লে, ভব-পারাবারে যাই ।

ক'লে হরিনাম সার, ভবে ভাবনা কি রে তার,

সকল আশার হয় রে সুসার, থাকে না ক কোন ভয় ॥

[সকলের প্রস্থান ।

যবনিকা পতন

